





4
He do de Domingos Ciruatho.

1184
Custodi 100 Fed nunc

Handel Baro von Richarz

SCRIBEBAT


Doctor Gaspar Pinto Correa Theolo-
gus Lusitanus Garalalensis in Bar-
cellonensi Collegiata Canonicus
penitentiarius.



Cum Consulate Superiorum

Impone ex officina Pauli Exarbeeck

Anno Domini 1622



LVSITANIÆ
CAPTIVITAS
SVB PHILIPPO:

LIBERTAS, ET FE-
LICITAS SVB
IOANNÈ.

LIBRI QVINQVE QVA
*historico, quâ oratorio stylo
interpuncti.*

SCRIBEBAT

Doctor Gaspar Pinto Correa Theolo-
gus Lusitanus Garaialensis in Bar-
cellorum Collegiata Canonicus
Pænitentiarius.



Cum facultate Superiorum

Vlyssipone, ex officina Pauli Craesbeeck
Anno Domini 1643.

Manuel Barboza Machado

CAPTIVITAS

ET LIBERTAS

LIBERTAS

LIBERTAS

LIBERTAS

LIBERTAS

LIBERTAS

LIBERTAS

LIBERTAS

LIBERTAS

LIBERTAS

LIBERTAS

LIBERTAS

LIBERTAS

LIBERTAS

AVGVSTISSIMO,
FELICISSIMO, INVICTI-
tissimo Lusitanorum REGI
IOANNI huius nominis
quarto salutem, & sem-
pitemnam felicitatem
precatur Gaspar
Pinto Correa.



*AT IS calamitosè per sexa-
ginta annos cum Lusitanis actū
est, imò in omnem Lusitaniam
satis acerbè sævitum; at nunc
incidimus in ætatem vere auream. Et in sæ-
culum fortunatum. Quam enim miseriarum
caliginem Lusitanorum oculis Philippus in-
duxerat, hanc tuæ maiestatis splendor puncto
temporis dissipavit. Inopinato casu multoties*

opprimuntur regna, at multo maius est ab
ipsis cineribus, & cadaueribus inſperatum
regnum ſuſcitari. Hæc tua felicitas, Rex au-
guſtiſſime, qui diuturna ærumnarum con-
ſuetudine obductum callum non ſolum ab-
ſterſiſti, ſed etiam ex angui, atque emortuo re-
gno vitam, & ſanguinem reſtituiſti. Huc ades
inter tot Regum cineres ſemiſepulta regij
ſanguinis ſcintilla, quam non extinctam, ſed
ad Mahometana perfidiæ conflagrationem,
ad Turcarum incendium, ad Maurorum ex-
cidium, ad hæreticorum perniciem, ad totius
terrarum orbis lucem, ad Chriſtiana religio-
nis ſplendore ſeruataſſe agnoſcimus. Huc
ades, o Ioannes præſantiſſimæ Catharinæ
nepos, magni Theodoſij filius, rediuiua Luſi-
tani ſceptri maietas, iuſtitie reſtitutor, reli-
gionis ſeruator, veritatis cuſtos, fidei deſenſor,
quem iniuriarum vindicem, tuæ gentis vltor-
em, Iberorum flagellum, & præſens, & ſu-
tura

*rua ætas mirabitur. Huc ades non vano, sed
fatidico multorum hominum spiritu decan-
tatus, quem nobis præsagæ mentes, & sum-
mæ felicitatis initium, & aureæ ætatis au-
ctorem prædixerunt. In te senescens, imo iam
decrepitum regnum iuuenescit. In te satis in-
firmum, & debilitatum Lusitaniæ corpus
convalescit. In te regiæ stirpis iam fere excisæ
truncus reuivescit. A te fortunatior Regum
series ortum ducet, quæ per nunquam inter-
ruptam nepotum, ac pronepotum posteritatē
occasū nesciet. A te noui imperij propagatio,
& catholicæ fidei dilatatio extremas orien-
tis, & occidentis solis metas peruadet. A te
conuulsis Turcarum lunis sanctissimum cru-
cis vexillum in Solymæ templis efferetur, do-
nec dissipata errorum caligine, omnique ex-
tincta superstitione, vnum sit ouile, & vnus
pastor. Huc igitur ades, Rex inuictissime,
& non minus amandum, quàm formidan-*

*dum tux maiestatis supercilium huc parum-
per inflecte, meamque in multis tibi perspe-
ctam, & exploratam fidem in hoc libro ite-
rum agnosce. Deus te prosperet, tuumque
regnum feliciter. Olyssipone pridie kalend.
Septemb. anno salutis 1643.*

Gaspar Pinto Corrêa.

Volumen hoc a Doctore Gaspare Pinto Correa editum summa cum voluptate , & cum narratione eorum , de quibus agit, tum egregia linguæ latinæ, qua vitur concinnitate delectatus, perlegi, nihilque in eo Fidei Catholicæ , & bonis moribus aduersum reperti. Quin potius multa, imo omnia, quæ in laudem gentis nostræ a Castellanorum captiuitate in libertatē sub inuidiſſimo Rege nostro Ioanne assertæ eleganter scribit communi exterarum nationum, quæ nostrum idioma ignorant, applausu suscipienda esse non dubito. Vnde opus hoc prælo dignissimum iudico In Conuentu Sancti Dominici Vlyſſip. II. die Septembris 1643.

Fr. Ignatius Galuã Magister.

Vista as informações pode se imprimir este liuro intitulado Lusitanæ Captiuitas sub Philippo &c. Autor Gaspar Pinto Correa & depois de impresso tornara ao conselho pera se coferir como original , & se dar licença pera correr , & sem ella não correrá Lisboa 25. Setembro 1643 .

Fr. Ioaõ de Vasconcellos . Francisco Cardoso de Torneo ,
P. da Silva .

Pode se imprimir Lisboa 3. de Outubro 1643.

O Bispo de Targa.

Pode se imprimir este liuro ; visto as licenças do S. Officio, & depois de impresso torne pera se taxar , & sem isto não correrá. Lisboa 2. de Outubro de 1643.

Pinhero.

Coelho.

Este liuro esta conforme con seu Riginal S. Domingos
Lisboa 13. de Nouembro 1643.

M. Fr. Ignatio Galuã

Visto estar conforme com o Original pode correr est liuro Lisboa 3. de Nouembro de 643.

Fr. Ioaõ de Vasconcellos. Francisco Cardozo de Torneo.
P. da Silva.

Taxo este liuro em meio toaio. Lisboa 16. de Nouemb. de 642
Menses. Coelho.

AD LECTOREM.



NON otio, aut desidia torpe-
 bat calamus, dū feruidioribus
 stimulis accensus animus in
 publica Lusitanorum lætitia
 excitabatur. Non friget meus scribendi
 ardor: non languescit meæ Musæ feruor:
 imo dum in tanto scribentium numero
 libens conticesco, ad maiora, & solidio-
 ra studia accingor. Quamplurimi hac
 tempestate ea dixerunt cum Laconismo
 quæ non nisi vberissima latinitatis vena,
 & lauta eloquentiæ supellectile erant di-
 cenda. Hi quidem dum breuitati consu-
 lunt, multa supprimunt, & nonnunquam
 incidunt in obscuritatis Scyllam. Non
 battologiam, non inconcinnam verbosi-
 tatem, sed eam tantum laudamus eloquē-
 tiam in Tullij, Sallustij, Liuij, & aliorum
 clarissimorum virorum fontibus propi-
 natam. An Sallustius, Titus Liuius, Sue-
 tonius, Quintus Curtius, Cornelius Ta-
 citus, Iustinus scripserunt Laconice? Nō
 equidem: sed per numerosas periodos,

per

per venustum eloquentiæ circuitum, per
dissimiles verborum, & sententiarum
formulas, nunc ad locorum, & temporū
descriptiones, nunc ad hominum mores,
gestusque exprimendos, historiæ filum
deduxerunt. Fuit profecto Laconismus
ignorantiæ asylum, quo se recipiunt ho-
mines elingues, quibus ipsa latinitatis
inopia impedimento est. At quibus adest
Latij sermonis Cornucopia (qualis inter
Lusitanos fuit Oforius) hi nō pressis, sed
solutis habenis spatiantur: non contra-
ctis, sed explicitis velis nauigant. Horū
vestigijs modo insistimus, neque riuulos,
sed vberiores Scriptorum fontes inse-
ctamur. Nos enim quā diurna, quā no-
cturna manu illorum scripta sæpissime
euoluimus. Quapropter iniquè, & pera-
cerbè feremus, si quis latinæ linguæ non
admodum gnarus, critico, & censorio
supercilio ad hunc librum legendum
accesserit. Quid enim iniquius, & acer-
bius toleratu est, quàm homines qui pri-
moribus tantum labris Tullianam dul-
cedinem degustarunt, quique pulcherri-
mos

mos Sallustij, & L. iij hortos à primo
limine salutarunt, se aliorum scriptorum
libris non minus impudentes, quam te-
merarios exhibere Aristarchos. At mit-
tamus hanc aculeatā mordacitatem.

Hunc librum cum autumnō damus,
in quo non acerba, sed iam caduca, & de-
cocta sunt poma. Nihil in illo reperiēs
acerbitatis, aut amaritudinis, nisi forte
quidquid Lusitanis dulce, Iberis acerbū,
& amarum videbitur. At nostrum non
est, hosti palpiū obtrudere, imo pungen-
tem repungimus, & non blandimentum,
sed cruciamentum damus. Si verō cælū
in tanta luminū varietate mirandam
ostendit cælaturam: te, mi Lector, in hoc
libro delectabit varietas, necnon alter-
nantis captiuitatis, & libertatis viciissi-
tudo. Videbis in hoc libro deficientem
Hispaniæ lunam, orientem Lusitaniæ so-
lem, clarissimorum virōrum intermican-
tes stellas, bellorum obductas nubes, ar-
morum fulgura, fulmina, & tonitrua. Vi-
debis Lusitaniam non sine dedecore, &
ignominia despectissimam sub Philippo:

mox

mox eandem sub Ioanne clarissimam, &
ipsis syderibus parem . Si vero omnis
animaduersio, & castigatio debet vacare
contumelia, sic erit à nobis calami spi-
culo in hostes animaduertendum. vt ni-
hil Regi Philippo contumeliosum pro-
feratur: cuius auctoritatem suspicimus,
tremendamque maiestatem omni vene-
ratione prosequimur, Reges enim in ter-
ris Dei vices agunt. Quidquid igitur in
hoc libro catuillationis fuerit inspersum,
id totum ministris imputetur, quorum
deliria cultro digna, saltem calamo sunt
plectenda, vt pote qui peccant in publi-
cam vtilitatem. Sed quanuis non verse-
mur in rebus cæcis, atque ab aspectus
iudicio remotis, versamur tamen in plu-
ribus, quæ videntur esse supra caput
humanæ cogitationis, & quæ posteritati
vix erunt credibilia, sunt etenim mira-
culo proxima. vidit quippe nostra ætas
nec sine admiratione vidit ingens pro-
digium, quod iam per omnes orbis re-
giones celeberrime acclamatum est, di-
gnum profecto vt in dies magis ac ma-
gis

gis qua poctarum carminibus, qua oratorum vocibus, qua annalium monimentis celebretur. Hoc igitur opus triennio elaboratum, & assiduis lucubrationibus expolitum non vngui, & denti, sed lectoris ingenio dāmus. Tu legito, fruitor, & valet. Olyssipone quarto Idus Septem, anno salutis 1643.

A R G V M E N T V M In Primum Librum

Rex Sebastianus Africano bello superatur. Henricus Regis Emanuelis filius sceptro potitur. Post huius obitum in discordi, & factioso regno cernitur de successione. Præcipui fuerunt petitores Philippus, Catharina, & Antonius Infantis Ludouici filius illegitimus. Pro Catharina pugnatur. Pro Philippo cernitur violentia, neque iure, sed ferro occupat Lusitaniam. Pro Antonio stat parua ex ignobilibus, atque ex mancipijs collecta manus. Theodosius in oppido Sanlucar, fraude officiosa, per summum nefas detinetur.

LVSITANIÆ
CAPTIVITAS
SVB PHILIPPO;
LIBERTAS, ET
FELICITAS SVB
IOANNE.

LIBER PRIMVS.



TANDEM aliquando, o Lusitani, durissimo seruitutis iugo excusso; nostra respiravit Lusitania. Iam tot, tantisque laboribus distentū, & diuturna ærumnarum fatigatione afflictum regnum pristinae paci, & tranquillitati restituitur. Iam nobilissimus ille, atque invictissimus Lusitanorum spiritus decumanis miseriarum fluctibus prope interclusus suum in dies magis deficientem recepit anhelitum. Iam lethalem, & in Lusitaniæ perniciē quotidie renascentem Philipporum hydram com-
A pres-

entra
nhaui

pressimus, Castellānorū furorē contudimus,
ardētes Hispanæ avaritiæ faces extinximus,
nostris ceruicibus imminentem tributorum
mucronē auertimus, & penitissimis totius
regni medullis insidentem pestem iam tandē
euomuius. Illuxit dies illa felicissima, tot
maiorum nostrorum suspirijs expetita; tot fa-
tidicorum hominum vocibus decantata: tot
portentis, ac prodigijs manifesta: tot cælo,
terra, ac mari monstrosis rerum imaginibus,
& oraculis deprehensa. Exultat, & triūphat
Lusitania dum se ex cruentis faucibus incr-
uentam, ex lupinis dentibus incolumem, ex
medijs flammis illæsam, atque inuiolatam
videt euasisse. Digitus Dei est hic Quis
crederet deformem, & pene exanguem regni
faciem sexaginta annorum spatio, miserando
seruitio oppressam, sine cæde, sine sanguine,
sine exercitu, sine dimicatione, sine aperto la-
trocinio, sine dissensione ciuili, sine Olyssiponē-
sis reipublicæ calamitate, sine aliqua ciuium
diminutione, aut domesticarum rerum jactu-
ra, vnius horæ curriculo ex seruitute in liber-
tatem esse vendicandam? Quis crederet ex
haustas, & penitus consumptas Lusitanorum
vires

vires ad facinus post hominum memoriam
maximum esse instaurandas, & instar Phæ-
nicis in ipso tumultu, atque ex ipsis cineribus
renouandas? Quis crederet Lusitaniam mul-
torum annorum decursu instar avis diutur-
nis compedibus, & laqueis impeditam, atq;
ab omni ope, & humano auxilio destitutam,
breuissimo temporis momēto, posse ex laqueo
atque ex vinculis euolare? Quis crederet tā
incredibili, atque inopinato rerum euētu, sa-
tis lugubrem, & luctuosam patriam in risū
& plausum tam subito esse commutandam?
Mærori voluptas, infelicitati felicitas, capti-
uitati libertas, egestati opulentia, inquietu-
dini tranquillitas, luctui risus, aduersitati
successit prosperitas. Dies illa ter, & quater
fortunata semisepultū Lusitanorū robur ex-
citauit: quiq; otio, & ignauia torpebant sub
externo Rege, iam Martiū furorē ore, oculis,
naribus spirant sub acri, & bellicoso Impera-
tore, qui non molliter educatus, non volup-
tibus effæminatus, non delicijs enervatus, sed
ad æstum, algorē, sitim, inediaque toleran-
dam a natura compositus, non imbelles, &
enerues, sed acres, duros, callosos, strenuos mi-
lites

lites in exercitu reget. Philippus immensos pecuniarum acervos theatris, scenis, iocis, & gulæ impendebat; Ioannes non priuatis, sed publicis patriæ commodis inuigilans, solam suorum clientium salutem cogitat. Philippus tanquam pastor mercenarius non oves tondere, sed deglubere, imo omni epoto, atque exhausto sanguine euiscerare contendebat; Ioannes tanquam proprius pastor suas inter oves natus, cereoque ingenio, ad misericordiam ita est ab ipso genio propensus, ut iure optimo cereus princeps possit appellari.

Sed iam nostræ captiuitatis initia, atque exorsus altiori indagine perscrutemur, ut inde non difficili coniectura perspiciamus, quo iure, vel qua iniuria Philippus cognomento prudens, vel potius ad inhiandum suis lucris sagacissimus, nostræ Lusitanæ fines tam iniquè & violenter inuaserit, & fas omne abrumpens, litem non hæreditario iure, sed armis, & militaribus copijs dirimendam retauerit. Quæ omnia ut liquidò constent, nos rerum originem altius repetamus, ac nostræ captiuitatis exordia sigillatim reuocemus.

Illuxit dies illa toti Lusitanæ exitialis,
qua

qua Rex Sebastianus male ominatum bellū
in Mauros suscipiens, non solē suæ ætatis
primæuæ, sed etiam sui regni florem perdidit.
Egregium sane documentum posteritas omnis
accepit, & alieno capite experti sumus, au-
daciam sine consilio plus habere inconsultæ
temeritatis, quam virilis fortitudinis; imo, &
vim consilij expertem sua semper mole rui-
turam. Quid non tentat inconsideratæ impe-
randi ambitio? Quid nō aggreditur temerarij
animi leuitas? Quò se nō præcipitat impru-
dens adolescentia? Nescit belli incomoda cui
bellum est inexpertum. Qua ratione posset
exercitum continere, qui se ipsum non con-
tinebat? Vbi erāt imperatoriæ virtutes? ubi
scientia militaris? ubi aduentitiæ multorum
Regum, & nationum copię? ubi equitum, &
peditum turmæ? ubi æraria pecunijs referta,
qui bello administrando solidiores sūt nervi?
Quos potuit felices exitus, quos fortunatos
euentus sperare, cui nihil ad subsidium presto
erat, imo omnia vastitatem, exitium, & rui-
nam minitabātur? Propter Maurum cortice,
& pluma leuiorem, vanum, incōstantem, nul-
lius fidei, exigui momēti, alterius religionis,

quietos populos bello sollicitare, in pacatis urbibus serere inquietudinem, otij leges, & quietem interrumpere, id profecto nec superis, nec hominibus gratum est. Cur etiā tam sœdæ & iniuriosæ irruptioni obsecundaret Deus, qui etiam in bellis inferendis ius, & æquum seruari iubet? Qui igitur Sebastiani profectio- nem lacrymis, absentiam desiderijs, reditum spe profecuti sumus, nostris infortunijs patientem ianuam vidimus, ubi primum cū suo Rege corruit male auspicatum regnum, & ille animi feruor, qui intra sui regni limites vix capiebatur, in alienis finibus est sepultus.

Post miserandum Sebastiani casum, ad eas angustias regiæ stirpis proles redacta erat, ut ex innumeris Regis Emanuelis filijs, ac nepotibus, solus superesset Henricus, quem corporis imbecillitas, & morbosæ senectutis infirmitas sic premebant, ut non ad imperij sollicitudines, sed ad priuatum otium, & quietē aptus esset. Inerat viro innata quædam modestia, & ad omnes vitæ actiones genuina moderatio, neque ad aulicam, sed ad monasticā disciplinam ab ipsis incunabulis videbatur institutus. Ancipiti animo fluctuabat, & varijs
cusa-

curarum stimulis pungebatur, incertus quid
ageret, quò se verteret, quid consilij caperet,
quem regni successorem eligeret. Hinc illum
patriæ amor urgebat, illinc Philippi Regis
potentia, & diuitiarum magnitudo stimula-
bant. Nunc ad Serenissimam Catharinam
Odoardi Infantis filiam propendebat, nunc il-
lum Philippi auctoritas, & formidolosa do-
minandi ambitio retardabat. Secum luctaba-
tur nō concors animus, & nunc ad has, nunc
ad illas partes distractus rapiebatur. Non erat
facilis deliberatio, imo res magni momenti ab
omnibus putabatur, ex qua communis omniū
ciuium pax, & utilitas dependebat. Magni
enim refert si Rex non sit extraneus, sub quo
corrumpuntur ciuium mores, languescit virtus
militaris, cessat mercatorum industria, ponit
artificum labor, friget bonarū artium exer-
citatio, viæ latrocinij infestantur, mare præ-
donibus est refertum, & quod peius est, pieta-
tis, ac religionis ardor refrigescit. At cum Re-
ge domestico, & conterraneo crescit morum
probitas castigatior; augetur studium militā-
di robustius; mercaturæ negotiatio fit indu-
strior; sudat opificum manus ingeniosior; opti-

marum artium splendor enitescit ardentius; non iter latronibus, non mare piratis est infestum; ipsa pietas, ac religio firmitus, & stabilius habent propugnaculum; omnium denique bonorum, ac fortunarum copia manat affluetior, & cumulatior. Cum enim flagitiorum turpitudine maximè crescat impunitate, virtus verò præmijs nutriatur, ubi deest Rex domesticus tum flagitijs frænū, tum virtuti deest incitamentum,

Hic erat omnium curarum, & molestiarum scopus, quibus Henrici Regis senectus vehementer diuexabatur: hic aculeatus stimulus, qui illum frequentius pungebat. Hæc una fuit noxa Regis improuidi. In hoc non leuiter culpandus, neque istud in Lusitanos commissum crimen unquam est ignoscendum. Qui enim excellentissimam habebat Catharinam fratris sui Odoardi filiam, omnibus imperatorijs virtutibus ornatissimā, ad quam hæreditario iure regnum deuolvebatur, quid ulterius in deliberando hærebat? Frustra consilium quærit, qui rem in promptu habet. Si uiuus potuit litem decidere, cur mortuus indecisam, imo potius ferro, armis, & ancipiti popu-

populorum contentione decidendam reliquit?
Cur nostram lusitaniā, quæ exteris gentibus
ac nationibus amori erat, ac formidini, vnius
hominis externi auaritiæ, ambitionique su-
biecit? Cur per quingentos prope annos non
interruptam Lusitanorum Regum lineam tā
inēliciter abrupit? Cur opimam, & fertilem
regionem quā vbertate agrorum, quā varie-
tate fructuum, quā omnium rerum multitu-
dine, quā onerarijs exterarum prouinciarum
mercibus abundantem, satis graui, atq; igno-
minioso Castellanorum iugo submisit? Cur in
publicis priuatisque periculis expellendis non
caste atque integrè versatus est, qui ob solum
Regis nomen patriæ pater, ac defensor debuit
appellari? Cur districtum Hispaniæ gladium,
immo nostris iam ceruicibus imminentem, dum
potuit non auertit? Cur patriam bellicis ter-
roribus, atque incendijs conflagentem non
extinxit? Cur virginum imbecillitatē, vidua-
rum, ac pupillorum orbitatem, coniugatorum
pacem, & otium non defendit? Cur huic reg-
no impende rem miseriarū tempestatem non
serenauit? Omni imperio indignus est, qui si-
bi nescit imperare.

sed armata manu obtineri sceptrum? An nesciebat omnem regnandi aleam, & regnorum salutem in ferro consistere, solumque enses strictum, & proprios tueri, & alienos fines inuadere? Quorsum pacis emolumenta belli incommodis permutabat? Si pacificus nostrum regnum potuit stabilire, quare nostrum ius in bellum vertit, & in litigium. Si Lusitaniæ rebus diffidebat in pace, cur iisdem fidebat inter arma? Non Regis, non patris, non pastoris, non defensoris nomine dignus erat, qui utrumque munus tam ignauè obijt.

Cum frigidus, & sene Rege frigebat, & senescebat regnum. Paulatim cadebant vires cum caduco imperatore: neque enim vigebit regnum, si regenti desit vigor ad res magnas bene gerendas. Cum igitur vires, & valetudinis firmitas regem in dies magis ac magis deficeret, quæ sunt certiora fati iam instantis prænuntia, nihil prius habuit quam aucti regni successorem deligere, & coram prouincialibus procuratoribus regis dignitatis hæredem instituere. Sed (proh dolor) nihil boni, aut æqui est institutum, imo rex omni consilio, & ratione destitutus taciturnitate regnum perdidit:

didit : & qui unico nutu, vel abnutu potuit
rem totam feliciter conficere, suo intempestiuo
silentio prodegit infeliciter. Varia, & anceps
opinio per animos indoctæ plebis peruaserat
circa regni successionem. Ille tamen rumor
firmius, & constantius increbruerat, Serenis-
simam Catharinam ad oppidum Almeirim,
ubi tunc Rex cōmorabatur, eo consilio fuisse
acceritam, ut communi omnium ordinū con-
sensu, nullisque tum plebis, tum procerum re-
pugnantibus suffragijs, Lusitanorum Regina
crearetur. Quis enim auderet repugnare, quis
reclamare, quis inficiari, quis non constantis-
simè persistere, ubi ius, & æquū seruabatur?
Quia verò in rebus humanis summa poten-
tia habetur summum ius, iam tunc infestus
serpebat rumor, & in omnium aures influe-
bat, Philippum regni hæreditatem sibi uni
arrogare, imo clandestina negotiatione, & ea
qua pollebat sagacitate, omnes ad regnandū
aditus præoccupare, nunc muneribus, nunc
pollicitationibus, nunc blanditijs Lusitanorū
animos corrumpendo. Ita sibi nō iure, sed cal-
liditate agendum putabat: neque ad verita-
tis, sed ad auri, & argenti cotem esse acuen-
da

da tela, quibus in hac conflictione dimicaret,
iuxta illud, argēteis pugna telis, atq, om-
nia vinces. O tempora calamitosa! o inuersi
mores! o inexplebilem regnādi sitim! leges pro
contemptu habentur, iura conculcantur, ratio
penditur vili, & posthabito meritorum pon-
dere, sola pecunia dominatur. Cum enim in
duplici cardine lis tota volueretur, nempe in
Philippo, & Catharina, ad illum cuius poten-
tia quamplurimis nationibus tunc erat for-
midolosa, regni summa deuoluitur. Malum
consilium sera sequitur pœnitentia: semperq;
rerum initijs obstandum, nam in medijs ma-
lis serū est cauendi tempus. Tunc o Lusitani
procures debueratis præcauere, tunc ad omnes
infelices euentus vigilanter excubare, cum
viuente adhuc Henrico res in tuto erat, &
Regis dabatur optio. Mersa enim puppe, quid
nauclemum, & gubernatorem iuuat suam in
nauigando fateri imperitiam? Membris tabe
corruptis, quid medicæ artis auxilium, quid
salutaria prosunt medicamenta? Vim morbi
primò inuadentem oportet iugulari, postquam
enim altius conualuerit, frustra petitur artis
Apollineæ adiumentum.

Quid

Quid verò tam inauditum, atque iniu-
ratum, quid tam præter sapientissimorum
hominum consuetudinem, quam regendi pro-
uinciam extero homini demandare? Quid
tam periniquum, & non ferendum, quàm
ex alienis finibus Regem extraneum auoca-
re, prætermiffa Serenissima Catharina, non
solum a Lusitanis Regibus oriunda, sed etiã
inter Lusitanos nata, & in lusitano solo per
omnes ætatis gradus enutrita? Id profecto
Lusitanis vitio est vertendum, quos edacis-
simus inuidiæ liuor ita corrodit, vt magis
laudent extraneos, quam conterraneos, &
domesticos. Meum ferio clypeum, dum in
meam inuehor nationem: æquis tamen ani-
mis o Lusitani meas excipite querimonias.
Quid quaeso ab extraneo Rege petebatis?
Quam in illo reipublicæ bene gerendæ spem
constituebatis? An illa Castellanae gentis
inueterata inuidia noui regis consuetudine
posset aliquando aboleri? An fides, & amor
tam discordes populos conglutinaret? Quan-
ta lupis, & agnis sortito obtigit, tanta ab
ipsis Regni incunabulis, per quingentos prope,
& quadraginta annos Lusitanorum genti,
& Ca-

Et Castellanis discordia est. Quæ igitur nostrarum rerum cura, quod ærumnarum leuamen, quod afflictis, Et prope desperatis rebus præsidium, quod in assiduis malis solamen, quod omnium miseriarum subsidium a Castellano Rege posset sperari, qui nos non ut filios, sed ut priuignos amaret? Esset ille amor naturæ legibus præposterus. Quis enim ex niue flammæ, vel ex flammis niues, non sine magna naturæ confusione, aliquando sperabit? Quis de spinis vuas, aut de tribulis ficus decerpit? Quis in ter accipitrē, Et columbam firmas amicitiae lezes, aut incorrupta pacis fœdera obfirmabit? Si pristina reipublicæ dignitas, Et libertas aliquando reuiuisceret, hæc sub alieno Rege opprimeretur. Si maxima annonæ vilitas alicuius regni felicitatem consequeretur, hæc sub Rege alienigena in summam rei frumentariæ inopiam verteretur. Si ex aeris puritate, Et salubritate corporibus firmitas, atque incolumitas oriretur, hæc sub Rege alienigena, corrupto cæli tractu, in tabem, Et pestilentiam iret. Si pax, Et ciuium tranquillitas nullis bellorū tumultibus, aut inquietæ plebis seditionibus fœdaretur, hæc sub

sub Rege alienigena ferratos Iani postes aperiret. Quid plura? sub Rege domestico libertas, saturitas, pax, incolumitas, & felicitas floret; at sub Rege extraneo captiuitas, fames, bella, infelicitas, & varia morborum genera cum ingenti hominum clade inualescunt. Vestrum erat ò Lusitani imminentem patriæ pestem salutaribus medicamentis impedire. quis enim constantis animi adolescens irruentem in se feram venabulo non excipiet? Quis aduersos inimicorum ictus clypeo non auertet? Quis sæuientis leonis incursionem non declinabit? Ille est prudentior nautclerus, qui impendentem procellam cautus vitat, quam qui præsentem fugit. Cum primum o Lusitani, vidiſtis Regem Henricum nō iudicata lite obijſſe, tunc ad arma confugere, tunc regni fines cōstantiſſimē tutari debueratis, priuſquā Hispanus leo ſuo vos rugitu perterrefaceret, atq; in tam opimam prædam ungues verteret.

Ille igitur dies quæ Henrico fuit a vita exitus, nobis fuit aditus ad omnes calamitates, & acerbiffimam captiuitatem. Ille terrenis fœcibus liber, & corporis vinculis abſolutus ad ſuperos auolauit, nos a libertate in
vin-

vincula detrushi nostro damno experti sumus, quid sit discriminis inter pastorem, & mercenarium, & quam detestabilis sit noueræ amor in priuignos. Post Henrici mortem silet regnum in suo interlunio, sed nō diu sedit interregnum. Cum enim plures adorent orientē Solem quā cadentem, quamplurimi ex Lusitanis, qui se sub Philippo satis munitos, & fortunatos fore existimabant, in eum ōnes suas spes animosque conuertunt, solumque Regem Philippum ad Lusitani imperij culmen euehere contendunt. Horum ope & auxilio parantur copię militares, & cum magna hostium manu sit irruptio ex improviso. Hinc equitatus excursiones, inde pedestrium militum incursiones vastant agros, pecora diripiunt, agriculturam impediunt, pagos, oppida, & ciuitates turbant. Nostri enim quā inopinato metu perculsi, sibi, & suis rebus consulere, alij fugere, alij arma capere, alij in neutram partem inclinare, alij patriæ libertatem defendere, alij fortunæ ludum expectare victoris partes secuturi. Non acer, & bellicosus Rex armatā Lusitaniam superat, sed calidus, & vaserrimus emptor venalem tenet.

Erant

*Erant omnia tunc venalia inter Lusitanos,
nec defuit emptor opportunus, qui se pro libito
faceret versipellēm. Vbi enim deerat leonina
pellis, assuebat vulpinā, illud vulgo dictitans,
dolus an virtus quis in hoste requirat?
Nihil audacter, nihil fortiter, nihil viriliter
gestum est. Quod enim facinus fuit memoran-
dum, quietam, & imbellem gentem inuadere?
Quæ laurea spontaneos, non inuitos homines,
in seruitutem dare? Quæ palma inermē mul-
titudinem armatæ cohorti cedere? Si res ho-
stiliter ageretur, non esset victoria incruenta,
nihil enim Lusitanorum audaciæ inausum,
atque intentatum est: imo illorum virtus tūc
validior, ac potētior apparet, cum durioribus,
ac difficilioribus prælijs exercetur. Qui ferro
orbem domuere, cur non domarent Castella-
nos, in quibus maior virium infirmitas, &
animi imbecillitas accusatur? Qui Indum, &
Gangem tributariū ad seruitutis iugum coe-
gerunt, suæque ditioni tradiderunt, cur pro-
brosam Castellæ iugum subirent? Qui effra-
natos Lybiæ, & Numidiæ populos toties aper-
to prelio, & infestis signis contuderunt, cur
ad inertiam, & luxum pessumdatos Hispanos.*

nos non contunderent? Quibus numero exiguus, sed bellico ardore, & præliandi fortitudine maximis totus paruit orbis terrarum, cur non pareret Hispaniæ angulus? Quos tot, & tam præclari Reges Orientis quæ nauali, quæ terrestri prælio fatigati toties timuerunt, cur non timeret vnus Philippus? Non igitur arma, sed fata vicerunt Lusitanos. Fuit illud fortunæ ludibrium, & vicissitudo, quæ regna, & imperia instar pilæ huc illuc rotat, nec diu stare permittit.

Antonius Ludouici Infantis filius illegitimus potentissimo Hispaniarum Regi se opposuit regni petito rem, non tamen potuit obsistere, aut sui voti cōpos euadere. In regno quippe discordi, & factioso nihil constans, nihil firmum est. Vulgus Euripo mutabilior tot fluctibus, quot amoris, odij, & cupiditatis affectibus mouebatur. Non quod reipublicæ utilius, sed quod privatae utilitati commodius studebant. Sui quisque palato inseruiebat, & regnandi ius pro suo quisque lucro, & commodo metiebatur. Ex mancipijs, & seruitijs, atque ex alijs infimæ plebis hominibus, quorū magnæ copię ad eum concurrebant, non par-

uam manum collegerat Antonius. Sed nullū
præclarum facinus ab illis erat sperandum,
quos degeneres, & obscuros arguebat timor.
Nusquam seruilis exercitus poterit esse pa-
triæ liberator. Solis enim verberibus, nedum
armis, terrentur, & fugatur seruitia. Ita me-
moriæ proditum est Scythis olim contigisse,
qui cum satis difficilem, & laboriosam expe-
ditionem susciperent, & octo annis dulcissimo
uxorum, ac liberorum aspectu fraudareptur,
coniuges longa virorum expectatione suspen-
sæ, imo iam desessæ, neque ulterius sperantes
illos ex tanto bello cum vita digressuros, ijs
nubunt seruis, qui ad pecorum custodiam re-
licti erant. Interea annuit Scythis victoria,
& cum læti ad patriā redirent, occurrit ar-
mata seruorum manus, & aperta cōiuratio-
ne conspirant omnes, quo dominos suis fini-
bus prohiberent. Ancipiti victoria sæpissime
est certatum, donec post variam belli fortunā
admonētur Scythæ mutare genus pugnæ. me-
mores non cum hostibus, sed cum seruis esse
certamen: ac proinde non armis, sed virgis, &
flagellis esse agendum. Quo probato consilio,
ad hostem cum verberibus accedunt, & quem

ferro non poterant, metu verberum superant.
Non aliter Antonij seruilis acies solo flagel-
lorum metu esset debellanda.

Ea tempestate popularibus seditionibus
regnum atrociter agitabatur. Illorum tamen
vanitas, & ingenij leuitas grauiter culpāda
erat, quibus cōsultius videbatur regnum sub
iniquis pecuniæ pactiōibus ad exterum ho-
minem deuoluere, quam in patrio solo Regem
quærere. Quod consilium illis haud probaba-
tur, quibus bonum, & æquum diuitijs carius
erat, neque animus cupidine cæcus ad prodi-
tionis scelus rapiebatur. Multos ignauia, &
secordia corruptos inuasit timor: credebant
enim rerum necessariarū penuria bellum diu
non trahi posse a Lusitanis, maximè aduer-
sus Philippum, qui rebus ex sententia paratis
compositisque in magnam spem victoriæ erat
adductus, imo regnum iam spe præsumebat.
Nam quamuis Antonij exercitus esset nume-
rosus, ex illa militum copia plus timoris, ac
solicitudinis, quàm auxilij, & spei accedebat:
omnes enim jerme ignobiles, hostem fugere,
quàm sequi assuefacti, & prædæ, quàm pu-
gnæ erant auidiores. Si verò gentes, aut
viribus

viribus, & multitudine æquales arma inter se conferant, tunc ex fortunæ, & Martis ludo anceps pendeat victoria: at ubi imparibus telis, viribusque concurritur, non bene sperare docet timor.

Primariæ igitur nobilitatis viri partes Philippi constantissimè tenebant, qua timore adducti, qua honorum, & diuitiarum spe allecti. Satiùs quidem foret pro libertate patriæ fortiter occumbere, quam turpissima dedecoris, & infamiæ nota apud omnem posteritatem iniustos, florentissimæ patriæ proditores, & venditores haberi. Fuit verò Philippus tum temporis adeo fortunatus, ut non solum homines in maritimis rebus, pugnisq; naualibus, sed etiam equestri pedestrique certamine exercitatissimos habuerit, qui sub Ducis de Aluæ signis inoffenso pede totam ferme Lusitaniam peragrarunt. Non armatus, sed togatus vicit. Alij ferro, hasta, iaculis, bellicis tormentis hostes domant, hic blanditijs, & calliditate vincit. In Veneris palæstra non minis, sed blanditijs est agendum: nō terrore, sed amore amor cōciliandus: at in Martis ludo inusitatū certādū genus nō ferro, sed dulci

imperio bellum gerere. Martem in vultu furor, in oculis vindicta, in sermone arrogantia, in incessu vastitas, & superbia comitatur: at Philippus nō seueritate sed comitate armatus, non munitionibus sed largitionibus fultus, regni prædator, non debellator fuit. Vobis, o Lusitani, vitio, ac dedecori vertendum est, optimam regni prædam hosti incruentam dare. Extrema quippe dementia fuit ab illo capi, quem impune possetis capere, & alba parma recedere inglorios, quam possetis hostili sanguine insignire.

Quamplurimas in Lusitania simultates partim obscuras, partim apertas vidit illa maiorum nostrorum ætas. Quotidianas in foro contentiones excitari: populares seditiones commoueri: turbari omnia: misceri vulgus factiosum: discordantibus studijs accendi hominum voluntates: omnes suis priuatis commodis, neminem publicæ utilitati inservire. Maxima procerum pars noui Regis voluntatem venari, & turbato flumine diuitias, honores, ac voluptates expiscari studebat. Paucos vidimus patriæ, & iustitiæ amantissimos, qui non sibi, sed reipublicæ libentissimè inuigila-

gilarent. Hos inter Comes de Vimioso D. Frā-
ciscus de portugal, vir bellicis artibus perit-
lustris, viribus pollens, praelio strenuus, consi-
lio maturus, animo munificus, ingenio solers,
industria vigil, quem non diuitiarum, sed so-
lius boni, atque honesti occupabat cura, cū Lu-
sitānorum opes maximè attritas videret, &
sub extero Rege pessum ituras crederet, inopi,
atque ærumnis deformato regno manum de-
dit: & Antonium, qui se non Regem, sed re-
gni defensorem nuncupauerat, omni virium
contentione ad Regiam dignitatem euehere
contēdit. At omnes hi conatus incassum abi-
ere. Cum enim in nauali expeditione constan-
tissimè pro Antonio aduersus Philippum di-
micaret, & iam extremo halitu discessurus
spiritus colluctaretur, suum confessorium his
vocibus dicitur compellasse. En morior patriæ
meæ defensor, & fortissimus propugnator.
Nihil verò dulcius, aut optabilius mihi ūquā
potuit euenire, quā patriæ altrici exhausto
venarum sanguine cruentā mei corporis vi-
ctimam immolare. Qui dquid studio, labore,
cōsilio, ingenio, fide, auctoritate, & cōstantia
valui, id omne ad hanc rem conficiendam

*Sponte obtuli. Præterea sanctissimum, & im-
mortale numen, cuius nutu, & arbitrio con-
stant uniuersa, quodque omnibus præsidet, &
omnium mentes perspicit, iterum atque ite-
rum contestor, me neque spe, neque præmio
inductum hanc regni defensionem suscepisse.
Sola patriæ salus, & libertas meis sæpe ocu-
lis obuersata hanc mihi iniecit cogitationem,
neque aliquo præcipiti, vel temerario motu,
sed consultò, & cogitatò arma cepi, credens
meum nomen æterna afficiendum turpitudi-
ne, si amantissimæ patriæ proditor, aut deser-
tor esse n. Quàm plurimi in Lusitania proceres
istud proditoris crimen, vel saltem criminis
suspicionem nunquam satis diluent, aut pur-
gabunt. Neque hanc de Lusitanis meritissimo
conceptam opinionem vlla vnquam ratio la-
besectabit, & penitus extorquebit. Quos illa
ætas vidit Codros pro patria nō timidos mo-
ri? Quos Regulos turpissimis cōditionibus dis-
sentientes? Quos Brutos publicæ libertatis
acerrimos propugnatores? Quos Neruas pa-
terno amore erga populum affectos? Quos
Mutios, vt obsessam patriam liberarent, nec
ferri aciem, nec ignis voracitatem metuen-*

res? Nullos profecto patriæ amantes, ac studiosos, imo potius multos vidit Coriolanos patriæ infestissimum bellum inferentes. Multos Catilinas patriæ pestem nefariè molientes. Multos Neronēs patriam incendio conflagrantem siccis oculis spectantes. Multos Julianos barbarorum iugo florentissimam regionem subijcientes. Qui vero Philippi maiestatem miseræ, multumque iactatæ Lusitanorum fortunæ portum, ac persugium futuram esse sperabant, sua capti, & decepti inani spe, in omnia mala præcipitantur, & iniquas captiuitatis vices experiuntur.

Interea temporis dum Antonium, & Philippum regnandi cupiditas detinebat, & utriusque animus ad eam curam accendebatur, Serenissima Catharina nihilo humanarum rerum sollicita, sed omni fastu, & ambitione maior, suo in otio ætatem agebat sceptri adeo immemor, ut neque procerum gratiam quærere, neque plebis leuolentiam conciliare, neque leuissimis indicijs purpuræ honorem ambire videretur. Admiranda quidem fœminæ

maiestas, quæ pluris faciebat videri imperio
dignam, quam imperium indignè quærere.
Clara equidem, & magnifica res est impera-
re, at non omnes qui imperant sunt clariores,
illi maxime, qui per latrocinia, per fraudulē-
tiam, per malarum artium gradus ad impe-
ria, & honores nituntur. Quis non videt tur-
piter, ignominiosè, indecorè, imo, & tyrânicè
regnantem Abimelech, qui Gedeonis ex con-
cubina filius, occidit septuaginta fratres
super lapidem vnum? Quis nescit cum ma-
xima dedecoris, ac turpitudinis labe regnā-
tem Athalias, quæ furens, & impudens sæ-
mina belluinam induens feritatem, & omnis
humanitatis oblita, regias manus ita cruen-
tauit, ut omni Ochoziæ Regis semine inter-
empto, ex mortuorū cadaueribus gradus fa-
ceret ad imperium? Non igitur meritum ex
imperio, sed potius imperium ex merito me-
tiendum est. Ideoque illarum gentium sum-
ma credebatur felicitas, in quibus non pote-
rat esse potentior nisi melior, moribusque, &
virtute probatior. Qua enim ratione fieri po-
test, ut alijs imperet, qui suis cupiditatibus
nescit imperare? An corruptos ciuium mōres

componet, effrænatasque libidines refrænabit
quiad vitia effrænis. & præceps ruit? An alios
extra iracundiam, auaritiam, turpitudinem,
& cæteras animi labes continebit, qui se ip-
sum non valet continere? An iustitiæ viola-
tor, & diuinæ legis transgressor, poterit sine
vultus sui rubore, humanarum, ac diuinarū
legum violatores digno supplicio afficere? An
poterit aliena vitia corrigere, qui propria ad-
mittit? Quale fuerit dominantis arbitrium,
talis erit ciuium aspectus: neque enim infor-
mis princeps recte formabit rem publicam.
Mens quippe regentis publici decoris ma-
ter est.

A patre Odoardo cum regijs virtutibus,
atque ornamentis, ius regnandi ad filiam Ca-
tharinam transmissum erat. Quod ut meri-
diana luce clarius elucescat, agite nūc, o Iberi
mecum descendite in arenam, neque enim cū
cataphractis equitibus nobis erit decertandū
sed cum validissimis argumentorum arieti-
bus ipsius mentis, & rationis arces erūt op-
pugnandæ. Dicite quæso (non vobis intumes-
cat bilis, neque ad iracundiam excitemini)
dicite cur Philippus Lusitaniæ regnum tam
violen-

violenter, tam iniuriosè, tam fraudulenter,
inuasit? An imbellem, & prorsus imbecil-
lum fœminæ sexum habuit despiciatum? Erāt
quidem imbelles manus, sed non imbelle ius:
erat infirmus sexus, sed firmissimum ius Ca-
tharinæ. An ignoratis a primo Alphonso Lu-
sitaniæ Rege in comitijs Lamecensibus lege
cautum, & sancitum esse, ne unquam ad sce-
ptri culmen eueheretur illa fœmina, quæ ex-
tra Lusitaniæ fines esset maritata? Si ergo
Isabella Emmanuelis Regis filia Carolum
Imperatorem conjugem habuit, quodnam ab
his externis parentibus ad Philippum filium
tantum ius potuit deriuari, ut Lusita-
niæ sceptrum sibi crederet, imò arrogaret hæ-
reditariū, & Serenissimam Catharinam in-
ter Lusitanos natam, atq; enutritam vir ex-
traneus patrio solo, & regno deturbaret? Ini-
quum profecto, & non ferendum fuit, nullis-
que tum naturæ, tum rationis legibus con-
sentaneum, externum Philippum contrerra-
næ, prorsusque indigenæ Catharinæ præ-
ferri. Præterea quis est qui ignoret, ab Al-
phonso quinto, nec non a Ioanne huius no-
minis primo Lusitaniæ Regibus constitutum
esse

esse, ut ultimo possessore absq; liberis decedente, imperandi ius ad transuersalem consanguineū in meliori linea deferretur? Si ergo post Henrici Regis obitum duo supererant consanguinei transuersales, alter Philippus Isabellæ filius, altera Catharina Eduardi filia, quæ nobiliorem, & potiore lineam obtinebat, (ut pote quæ a viro, Philippus verò a femina ortum duxerat) ad illam procul dubio regni summa erat deuoluenda. Tandē quis est qui nesciat, quantas vires habeat beneficium repræsentationis, quod tum patriæ legibus, tum consuetudine, tum deniq; ipso iure firmatum est. Constat enim primum, & quintum Alphonsum Lusitanicæ Reges decreuisse, ut defuncti fratris filia patruū à regnandi iure excluderet. Si ergo Serenissima Catharina patrē suū Eduardum repræsentabat, cur nō esset præferēda Philippo ex Isabella sorore nato? Maximè cum ex ipso agnationis iure liquido constet, agnatam in re indiuidua, quale habetur sceptrū, semper cognato esse præferendam, quanuis æquali sanguinis gradu sint propinqui. Cum igitur Catharina fuerit Hērici Regis agnata, Philipus verò cognatus, illa

illa ad purpuræ honorē erat extollenda. Ergo Philippus non regnum iure obtinuit, sed vi, fraude, armis, muneribus, pollicitationibus extorsit. Quod non latuit pastorem curam, & sollicitudinem Gregorij XIII. qui Christi in terris vicarius, Philippum per literas, & legatos adhortatus est, ne armorum præsidio, sed legum arbitrio Lusitaniam occuparet, neque in re tanti momenti sibi fideret, sed viros utriusque iuris doctos consuleret, quos non adulatio, non supplicij timor, non aucupanda Regis gratia, non captandi honoris, aut diuitiarū spes, a recta iudicii norma deflecteret, aut in dirimenda tanti ponderis lite transuersos ageret. Verum Philippus nouæ dominationis cupidine excæcatus, tam salutari omiſſa, imo cōtempta adhortatione, culpatae, & corruptae fidei iudices, consiliariosq; elegit, nec se legum, sed legionum subsidio satis munitum credēs, a toga ad Martem fugit: atque adeo fas omne abrumpens, quod sibi a iure erat negatum, non quidem armis, sed armorum metu extorsit. Non inquam, armis, quia si vniuersi, & concordēs Lusitani ad arma concurreremus, non est nobis dextera bello

bello frigida, ac proinde si victoria non annu-
eret, saltem ancipiti alea belli cursus, & for-
tuna volueretur, neque Hispani duces incru-
ento vestigio nostram Lusitaniam peragra-
rent. Pugnavit pro Philippo nō ratio, sed am-
bitio: non æquitas, sed iniquitas: non inuola-
tum, sed violatum ius: nō incorrupti, sed cor-
ruptissimi iudices, quibus ille magnam vim
auri, & argenti contulerat. Non muros belli-
cis artibus, & machinis oppugnauit, sed Lu-
sitanorum animos quā numeribus, quā pre-
cibus, quā promissionibus, quā literis regia
comitate, & benignitate plenis expugnauit.
Quod quidem optimum bellandi, & vincendi
genus est. Validiores quippe sūt aureæ, & ar-
genteæ, quā amentatæ hastæ. Auro acrius,
quā ferro pugnatur: & fortior crumemis,
quā lacertis fit dimicatio. Nec sine infamiæ,
ac dedecoris nota illi sunt habendi proditores,
qui aliqua mercede infatuati patriam auro
vendunt, atque eò insaniæ deueniunt, ut plu-
ris fortunam quam fidem, pluris pecuniam
faciant quā honorem.

Ergo quid profuit Catharinæ ius hæredi-
tarium cum iure repræsentationis coniunctū,
si res

si res non iure, sed auro. & ferro fuit dirimē-
da? Quid profuit ex ipsis legum visceribus
deducta hæreditas, si non erat legibus stan-
dum, sed collatis signis dimicandum? Silet
ius, ubi clamat ferrum. Obmutescit ratio, ubi
adeſt iuris violatio. Conticeſcit legis perito-
rum ſapientia, ubi vel auri pallore inuitatur,
vel minarum acerbitate deterretur. Si enim
ventorum impetu æratæ fores ſuo cardine
conuelluntur, ipſæque arbores quavis altif-
ſimis radicibus ſint deſixæ, vi tempeſtatis cō-
cutiuntur, & labefactantur, quid mirum ſi
mortalis homo, & caducus, aut vrgentibus
malis, aut inſtantibus muneribus a ſano
mentis, & conſilij ſtatu deiſciatur? Frontem
rugis contractam, & vultum iudiciali ſeue-
ritudine caperatum, auri conſpectus explici-
tum, & exporrectum reddit. Cordis duritiem
emollit timor, & quam peruiſaciam non in-
ſeſcit ratio, euincit ferri acies omni iure va-
lentior. Hinc eſt, ut ſi iura vociferentur inter
arma, nihil proſit clamor, & vociferatio. Om-
nis illa vocis contentio, & iuriſconſultorum
proclamatio, tumultuoſo armorum ſtrepitu
obruetur. Ancipiti ferro imperia decernuntur.

Nam

Nam si magnus Alexander dubios in nodo
Gordiano nexus quæreret, illa nodorum im-
plicamenta tortuosis in se ambagibus redeun-
tia nunquam dissolueret; ferro etenim opus
erat ad soluendam, vel potius ad rumpendā
inextricabilem ligaturam. In dubijs quippe,
& malis rebus præceps via sæpe est capienda:
& nonnunquam ferro melius, quàm consilio
agitur. Hinc barbarus olim Scythæ districtum
mucronem in altū efferens, ita fertur exclamasse.
Hic libertatis pater, hic orbis domitor,
hic regnorum arbiter, hic reipublicæ modera-
tor, & conseruator est. Hinc Atila cognomen-
to flagellum Dei (cum pastor quidam suam
buculam claudicantem videret, & per cruo-
ris vestigia vulneris auctorem quærens, Mar-
tis ensē, quem incauta bucula calcauerat,
forte reperiret, effossumque ad eundem Atilam
deserret) oblatum Mauortis gladium
cum veneratione intuitus, mox totius orbis
imperium sibi insolens, ac temerarius arrogauit.
Huic, inquit, mucroni vel
spontaneus, vel inuitus parebit orbis: hu-
ius formidoloso aspectu concussæ gentes no-
stræ erunt ditionis.

Hinc etiam illa anceps quæstio inter Græcos, & Phænices orta est, utrum regna fortius armis, quàm pecunia expugnarentur? Quod certamen pari utrimque lance ambiguum ita dirimebant. Græci Deorum suorum simulachra armis cincta, inserto clypeo, nudo gladio, truculento vultu, scintillantibus oculis effingebāt: at Phænices Deos suos non bellatores, sed mercatores cum loculis, & crumenis pingere solebant. Quo hieroglyphico illi regnorum ius in armis, hi vero in pecunijs situm esse testabantur. Neque solum ad obtinendum, sed etiam ad conseruandum regnum, plurimum valet armorum vis. Quæ fuit olim Cyri Persarum Regis vox crudelissima, dum districtum efferens acinacem exclamauit: hoc mucrone meis ero clientibus formidandus. O vocem non regiam, sed tyrannicam? Nullum est infirmius regni propugnaculum quàm seruilis timor. Solus amor ciuium est inexpugnabile Regis munimentum: neque regnantis violentia, sed subditorum beneuolentia regno stabilimentum, & firmitatem parit. Qui enim alicuius principis nimia potentia inducti, vel armis perterrefacti,
inde-

*indecoro seruitutis iugo ceruicem subdunt,
tandiu in amore, ac fide continentur, quā-
diu regentis fortuna est incolumis; at simulā-
fortuna delapsa est, euolant omnes, & præ ni-
mia seruitutis impatientia iugum excutiūt.
Nam si morū dissimilitudo amoris vinculum
dissoluit, quænam inter tyrannum, & clientes
poterit esse amoris fides? Quemadmodum ma-
ris saporem non imbres, non amnes, non fon-
tes mutant, aut remittunt, imo potius in ma-
rinam salsedinem omnis illa aquarum inun-
datio conuertitur, ita profectò peruersus Re-
gis animus omnes clientes in suum colorem,
& saporem trahit, nec tamen illius pertinax,
& obstinata mens vel mutatur, vel remitti-
tur. Facilius est clientes Regi, quam Regem
clientibus morem gerere.*

*Dum Philippus vel armis, vel nummis,
vel pollicitationibus Lusitaniam corrumpit,
furtimque expugnat, Theodosius Serenissimæ
Catharinæ filius duodecimum agebat annum.
Immatura profectò ad regnandum ætas, ius
tamen præmaturum, necnon, & ingenium
perspicax iam tum singulare sui specimen
ediderat. Apud Mauritanum Regem, viuentem*

adhuc Enrico, detentus fuit, non sine mærore,
ac lacrymis carissimæ parentis. Quid enim
amantius, quid dulcius, aut indulgentius es-
se potest quàm maternum nomen? Nec sola
mater abientem filium assiduo fletu, suspirijs,
ac desiderijs prosequabatur, sed etiam quam-
plurimi procures, quos patriæ, & iustitiæ
amor inflammabat, in solum Theodosium su-
as spes, cogitationesque conuerterant. Quod
non leuiter coniecturis subodoratus Rex Phi-
lippus, sagacissimus rerum coniecter, quò om-
nem bene sperandi ansam Lusitanis præci-
deret, ea qua ad regnandum libidine effræ-
natè incitabatur, nihil prius habuit, quàm
Theodosium a Lusitania auertere, vel saltem
extra Lusitaniæ fines in vrbe Sanlucar de-
tinere, donec labantes consilio Lusitanos quàm
muneribus corrumpere, quàm auctoritate pel-
liceret, qua precibus deliniret, qua promissio-
nibus caperet, quàm belli rumore, ac terrore
perterrefaceret. Si enim Lusitani suum prin-
cipem Theodosium ætate inualidum, viribus
infirmum, unicam regni spem præ oculis
haberent, & præsentem illius vultum intue-
rètur, id omnium animos, ac vires ad pugnam
uehe-

vehementius excitaret. Talis olim Europi infantis præsentia Macedonibus tam ad pugnandum, quàm ad vincendum non mediocre fuit incitamentum. Cum enim Macedones bello multoties fracti, & victoria Thracibus annuente pulsi discederent, ut pote qui infantem haberent Regem, qui ob teneram, imbellemque ætatem hostibus non terrori, sed despectui esset, hoc ad vincendum usi sunt stratagemate. Regem suum nomine Europum incunis prolatum ante aciem ponunt, mox eo viso omnium militum virtus, ardorque militaris, tanquam ad motis calcaribus, acrius stimulatur, atque accenditur: fit durior concertatio: victoria inclinatur ad Macedones, qui se antea victos ideo fatebantur, quod bellantibus Regis præsentia deesset. Si igitur Macedones mouit præsentis Europi infantia, non minores ad mouendum, atque ad incitandum vires haberet Theodosij pueritia. Quæ si absens timorem, & desperationem iniecerat, præsens amorem, spem, & alacritatem conciliaret. Quos enim etiam perditorum hominum flagitiosos greges non emolliret illa ætas puerilis, in qua non inter mortuas, sed adhuc viuæ,

*Et spirātes regæ dignitatis scintillæ intuēt iū-
mentes accenderent, vires firmarent, animos
adderent, voluntates inflammarent . Atque
utinam Lusitani ea tempestate pro obseruā-
do, & non violando Theodosij iure glorio-
sam susciperent dimicationem, in qua
aut fortiter vincerent, aut viriliter
occumberent . Multo quidem
gloriosius, atque honestius es-
set, si pro incolumi patriæ
libertate mortem oppete-
rent, quam si patriæ
captivæ super
essent.*

FINIS LIBRI PRIMI,




ARGV-

ARGVMENTVM

In Librum Secundum.

Secundi, tertij, & quarti Philippi dominatio Lusitanis perniciofa. Summa tyrannis: nulla legum obseruantia: improba morum corruptio: immane tributorum pondus: nullus iustitiæ cultus: mira ignauia, & armorum desuetudo. Arcem de Ormuz oppugnant, & expugnant hostes. Nostrum mare peruagatur piratæ. Naues onerarias, Insulas, & loca maritima deprædantur impune. Brasilica prouincia venit in Batauorum ditionem. Collector Pontificius iniuriosè vexatur, & per summum scelus regno expellitur.

LIBER SECVNDVS.

 *Vamplurimi in Lusitania proceres, diem, quæ Philippo regnum dederat, toti Lusitaniæ infelicem, & inauguratam, illamque non laborum finem, sed maximarum ærumnarum initium fore affirmabant. At in ipsis regnandi initijs felicitatis, vel infelicitatis euentus in incerto erat. Nā subdolum, & perfidiosum Regis ingenium in bello pacem, in odio amorem, in ambitione, & auaritia pietatem simulabat. Atque ita haud facile discerneres, utrum patris, an hostis nomen gereret. Sic erant omnium animi noui Regis expectatione suspensi, ut neque illius varios mores ad*

huc perspectos, neque calliditatem satis notam haberent. Verendum tamen erat, ne astuta hominis sagacitas omnia ad suam utilitatem ita referret, ut in regno tractando non quod esset Lusitanis utilius, sed quod suis priuatis commodis aptius meditaretur. Lusitanorum opes attritas, atque extenuatas non quidem resarcire, sed in dies magis, ac magis infirmare studebat. Nec deerant leuissimi homines, qui nunc mendacijs, nunc assentationibus Regis aures onerarent, & illius animū erga Lusitanos corrumpere, frigidique, & maligni nostrarum rerum laudatores exiguum beneuolentiae vestigium verterent in maleuolentiam. Quod malum postquam Philippi medullis altē insedit, incredibile dictū est quā sinistram de Lusitanorum fide opinionem conceperit, quibus proinde neque omnino fidere, neque diffidere audebat, sed inter spem, ac metum dubius, nostra tanquam seruorum opera utebatur, & dum verbis pacem, factis bellum asperrimum promittebat, neq; clientes, sed seruos credebat, quos sub aeneum iugum miserat. Ex quo omnium malorum seminario, tanquam ex fonte de-
fluxit

*fluxit illud primi, secūdi, ac tertij Philippi re-
gimē nobis inauspicatū, & prorsus exitiale.*

*At non satis liquet inter sapientes, fuerit
ne auus, an filius, an nepos huius regno perni-
ciosior? Auo prudens calliditas, at in propagā-
dis sui imperij finibus mira erat ambitio,
nec non incomparandis, retinendisque diui-
tiji avaritia: doctus non æquitatis, & sancti-
tatis normæ, sed utilitatis legibus inservire,
illud æquius esse ducens, quod sibi erat utili-
us. Filiō innata, & genuina virtutum indol-
es, & maximus inerat religionis cultus; at
sui immemor, & extra libertatem positus, nō
ex suo, sed ex alieno pendebat arbitrio. Mi-
ra profectō Regis infelicitas, qui ad omnes
alienæ voluntatis status circumagitur. Id
quidem non regere, sed regi: non imperare,
sed parere est. Nepoti neq; mentis sagacitas,
neq; morū probitas assidebat, imo potius ab auo
atq; a parente multum degenerans, nō uno tā-
tū scelere maculosus, vix ipsis pepercit aris, & q;
hominibus, ac superis insensus. Neq; a verita-
tis scopo multum aberravit quidā Lusitanus,
qui aliquando inter maledicos cōmiciatores
nō nihil vel salis, vel mordacitatis inspergēs*

sub illa Nabuchodonosoris celeberrima statua
Carolus Imperatorem cum filio, nepote, ac
pronepote expressum esse affirmavit. Nam Ca-
rolus fuit caput verè aureum, sanctitatis, ac
fortitudinis luminibus fulgens, cuius fama
pace, ac bello semper æquabilis, & inuiolata,
virtusque non aliunde proueniens, sed suis
nixa radicibus, omni posteriorum commenda-
tione dignū imperatorem finxit. Huius præ-
clarissimi viri, siue inter armorum strepitus,
siue inter aulæ delicias, idem fuit vitæ tenor.
Par corpori, atque animo constantiæ digni-
tas: illud nullis laboribus fatigari, hic nullis
difficultatibus vinci assuetus. Ita semper vi-
xit, ut in periculis nullum timoris, in congres-
sibus nullum infirmitatis, in victorijs nullū
insolentiæ, in diuitijs nullum avaritiæ, in
honoribus nullum ambitionis, in voluptati-
bus nullum luxuriæ vestigium reliquerit.
Felix vitæ cursus, sed felicior à vita disces-
sus, prius enim ex sceptro, quàm ex vita mi-
grauit: atque ita non illi mors a rebus caris
separatio, sed fuit ad cariora migratio. Huic
aureo capiti pectus, & brachia ex argento
connectuntur, Philippus scilicet prudens, cu-
ius

ius imperiosum supercilium præ nimia regnandi ambitione vix toto terrarum orbe capiebatur: at quantum ab auro distat argentum, tantum ille a paternis moribus degeneravit, magis gloriæ, & dominationis, quam virtutis appetens. Mox in alio, atq; alio Philippo æs, ferrum, & lutum, quibus inferiores illius statuæ partes conflatae erant, non incongruè exprimuntur. Huius ergo statuæ portentosam molem non de cælo tactam, sed exigui lapidis collisione percussam, & contritam vidimus. Qui lapis factus est mons magnus, & implevit universam terram. O vii nam, quid quid mens augurat, fas esset præsagire, & futuras Lusitaniæ felicitates prædicere. Verum aliò festinat calamus: & prudens futuri temporis exitum caliginosa nocte premit Deus. Quapropter præsagos bene sperantis animi motus nos interim comprimamus.

Quæ ex secundis rebus nascitur insolentia Babylonici Regem perdidit, omnemque illius potentiam cum statua in somnis obiecta deturbavit. Nocentes diu stare, aut nunquam, aut rarò vidimus. Idem ultionis flagellum

*in Reges, & in clientes sæuit : & easdem le-
uitatis, ac seueritatis partes æque cum omni-
bus agit Deus. Imo cum Reges in terris, quid-
quid lubet contra fas, & æquū impune fa-
ciant, plerumque fit, vt Rex improbus fiat
impunitate improbior, & maior illius im-
probitas maiori supplicio digna sit. Verum
summus orbis conditor, & moderator non so-
lum Regibus de vita excedentibus seuerus
adeſt vindex, nullumque eorum scelus dimit-
tit impunitum, sed etiam ijsdem adhuc vi-
uentibus se terribilem exhibet ultorem, &
quanuis clemens sit in supplicio differendo,
eſt iuſtus in inferendo. Cum enim Regum de-
lictâ cadant in publicam perniciem, habentur
grauiora, neque Dei diſſimulatione, sed acer-
rima egent ultione.*

*Vt igitur noſtrum ius luculentius, & no-
ſtra iniuria intolerabilior appareat, omnia
Philippi Regis deliria, imo potius miniſtrorū
errata in vnum colligamus. Et qualia ſub
primam auroram arborum, & herbarum fo-
lia melle roſcida inueniuntur, quod gutta-
tim diſperſum apes colligunt, & aluearibus
conſtipatum in faucos, cellasque diſtendunt,*

non

non aliter nos Matinæ apîs more, mod̃ que,
per omnes illius vitæ gradus dispersos er-
rores decerpamus, & in fauos cōstipemus, ex
quibus dulcissimus libertatis fructus in Lu-
sitanos fluxit, tandemque illud odium, quod
inter Lusitanos, & Castellanos inueterat im-
tacitis discordijs fouebatur, apertè erupit, &
quo erat occultius, eo prorupit acerbius. In-
feliciter errauit Philippus, vt nos feliciter
viueremus, qui ærumnarum assiduitate, ac
diuturnitate paulatim consumebamur. Ex
illis erroribus, tanquam ex amaris radici-
bus, nostri regni libertas, & felicitas pullu-
lauit. In magnis quippe laboribus vel sola li-
bertas, vel sola mors honestus exitus iudica-
tur. Qualis vero in corporibus illa maxime
laudanda est incolumitas, quam per omnem
vitæ cūrsū non morbus superat, sed se-
nectus ipsa dissoluit: talis in regnorum im-
perio illa potior libertas, quæ non ferro, sed
iure acquiritur, & quæ non militum ca-
daveribus, sed iniuriosè afflictorum ci-
uium vocibus comparatur. Quid igitur
mirum est si in tam peruerso rerum statu
grauissimis offensionibus prouocati, & laceffi-
Lusi-

Lusitani, omni virium contentione eniteren-
tur ad libertatis assecutionem? Quid nouum,
atque inusitatum si iugum excuterent? Si
enim voluptatum assiduitas multum fastidij,
& satietatis aliquando affert, quid non
afferet molestiarum, & calamitatum diu-
turnitas? Si Philippo fixum, destinatumque
in animo erat nostram Lusitaniam perdere,
nostri nominis gloriam, & amplitudinem at-
tenuare, & penitus obscurare, omnes regni
vires consumere, cur non ad libertatis studiū
prorumperet accensus, & stimulatus dolor?
In longo maris, terrarumque circuitu nemo
est qui ignoret, quam iniquē, atque acerbē cū
Lusitanis actum sit a Philippo, vel potius a
Philippi ministris; neque enim tremendam
Regis maiestatem, vel leuissimē offendere ani-
mus est. Non Regem, sed regimen culpamus.
Imo quidquid delicti est, id totum ministro-
rum vecordiae, nequitiae, imperitiae, fraudu-
lentiae vertendum est; qui saepissimē argente-
os, atque illimes regij pectoris fontes impro-
bissimo consiliorum suorum veneno turbant,
atque inficiunt. Multum igitur interest ad
regnorum conseruationem, ut ij qui clauo as-
sident

sident consiliarij, sint vita, & fide inculpata, qui non suis, sed publicis commodis inseruiant. Nam si in exstruendis ædibus loca salubria, & insalubria considerantur, cur non ad componendum, & cōstruendum regnum illi homines eligentur, qui sanis, & incorruptis moribus sint? An erit literatus, vel gladiator, qui nunquam literarium, vel gladiatorium ludum ingressus est? An erit rei nauticæ peritissimus, qui nunquam in alto nauigauit? Haud aliter non erit opportunus consiliarius, qui neque consilio, neque prudentia, neq; experientia pollet. Nam qualis terra ut uberes rei frumentariæ edat prouentus, non satis est si leui vomere sit sauciata, sed profundè aratro debet esse inuersa, talis mens leuiter exculta, nunquam fertilem vel prudentiæ, vel consilij segetem promittit. Dum ergo errores meminimus, hos non Regi, sed imprudentibus, atque inexpertis ministris imputamus.

Sub Rege igitur Philippo videres omnia sinistra, & in peius fluere: summam flagitiorum impunitatem grassari: honores immerentibus dari: iudices muneribus corrumpi: robur luxu, atque inertia perdi: omnes qua delictijs

licijs luxuriare. Fuit verò in Lusitania quidam extremæ stultitiæ Comes, qui morti iam vicinus, non quidem fatidico, sed vano, & mendaci afflatus spiritu, quamplurimas sub Rege Philippo felicitates prædixit, affirmans ipsa viarum strata auro, & argento reficienda, ipsamque Cornucopiam omni bonorum affluentia locupletissimam nostræ Lusitaniæ æssuturam. Omnes quippe nationes cum mercibus, atque oneribus ad nostros portus undique commearent, atque ex gleba Peruana uberrimus diuitiarum riuus ad nos conflueret. Verum quàm infelix fuerit ille augur, & quàm sinistra cornix, nostro malo, & experientia didicimus. Nam post multa belli, famis, & pestilentiae incommoda, quæ nostros fines inuaserunt, quidquid erat in Lusitania pretiosum in Madriti curiam asportabatur; ubi omnia erant venalia, neque illa aulica hircudo nostram cutem erat missura, nisi cruoris plena.

Non solam pecuniam ex publico ærario depromptam exugebat illa insatiabilis Philippi sitis, sed etiam ex priuata vnius cuiusque re quotidiana pecuniarum emunctiones nostram

nostram prouinciam depauperabant, alienam
locupletabāt. Ad immodicos aulicorum sum-
ptus, & luxuriam inexplebilem neque tota
Lusitania erat satis. Nos egestate, & mendi-
citate depressi ad ærumnas, at illi nostro sudo-
re proni ad delicias. Quidquid rusticanus la-
bor dura, & callosa manu colligebat, id to-
tum ignauo aulicorum otio consumebatur.
Passim gemebat afflicta plebs; clamabant pu-
blicæ calamitates; iustissimæ audiebantur
querimonie; impatiens viduarum, & pupil-
lorum fletus tributa tributis addita execra-
batur; opifices, quorum labor vix alendæ fa-
miliæ insudabat, tributorum exactoribus ve-
xabantur; neque ullus fuit tam abstrusus
nummus, quem tributorum architecti non
obsacerent. Non ipsa orborum scrinia, non tē-
plorum sacraria, non cænobiorum claustra
intolerandæ cupiditati obsistere, & sacram
auri famem explere valebant.

At quibus extruendis templis, Xenodo-
chijs, mænibus, propugnaculis, vel alijs publi-
cis ædificijs tantum pecuniarū exhaustum?
Cui publicæ utilitati tātū nūmorū fuit impē-
sum? Quas triremes, quas classes, quos bellicos

D appara-

apparatus, quas militares copias instruxit
hæc pecunia? O scelus, o pudor! Ad comædias,
ad tragædias, ad scænas, ad mimos, ad saltus,
ad histriones, ad conuiuia, ad sumptuosas cæ-
nas, ad scurrilitates, ad turpitudines, ad io-
cos, ad demos voluptarias, ad stagna, ad galli-
naria, ad piscium, & ferarū viuaria, tot auri
atque argenti inundationes confluxerunt. O
nunquam satis deplorandam temporis cala-
mitatem, & Lusitanie captiuitatem! Vtinam
hanc constructam, coaceruatamque pecuniam
quam ab exhaustis miserorum opibus tribu-
tim decerptam aulici suis cupidinibus insu-
melant, eo animo, & portento videret Rex
Philippus, quo in re J. mili vidit Eduardus
Angliæ Rex. Nam cum sæuissimi tributorum
exactores ingentem pecuniariam aceruum
coram Eduardo Rege adduxissent, ut viso
auri, & argenti colore omnem mæroris acer-
bitatem deponeret, atque illas, quibus frequē-
ter vexatur, curarum, & sollicitudinum
mordacitates abijceret: Rex non sine magno
stupore circa ipsum nummorū aceruum dæ-
monem ludentem vidit; ac si festiuis huc illuc
saltibus, & gesticulationibus suam de collecta
pecu-

pecunia lætitiā testaretur. Quo portento veluti perterrefactus Rex, illamque pecuniam abominatus, tanquam funestam, & male ominatam ab oculis auferri, restituique populo iussit.

Ab illis etiam, qui victum ostiatim quærebant, & summam patiebantur mendicitatem vidimus tributum exigi. Quo quid crudelius fingi potest? Quid impudentius, atque intolerabilius cogitari? Nos laboriosam, & ærumnosam vitam duceremus, ut delicatius, atque voluptuosius in Madriti curia multi viueret Sardanapali? Si Madriti proceres equitarent, si iacularentur, si cursu cum æqualibus certarent, si discum iacerent, si gladiatoria arte exercerentur, si noctes solidas humi cubarent, si nunc æstu, nunc algore corpus indurarent, si in ediam, & sitim paterentur, si Martio calore accēderentur, si ad regni defensionem armis cincti inuigilarent, hæc profecto essent pulcherrima iuuentutis incitamenta, ad quæ nutrienda nostras libentissimè pecunias expenderemus. At verò delicatos, & uoluptatibus affluentes iuuenes nostro sudore alere quis non ægrè, & iniquè feret? Qua dexteri-

tate gladium stringet, quo lacerto hastam
intorquebit, qua virium intentione decerta-
bit, quam pro patria dimicationem suscipiet,
quos hostium impetus sustinebit, qui non so-
lum animum, sed etiam corpus habet volup-
tatibus enervatum? Quæ inter delicias lan-
guescit, & emoritur virtus, a ferro vitam su-
mit. Si marcet sine aduersario, in aduersis
pullulat, & reuiuiscit. Hinc fortissimus Albu-
quertius Orientis domitor, & noui orbis in-
dagator, vulgo dictit are solebat, voluptates
esse nouercas virtutis. Cumq; ab Albuquer-
tij moribus, & consuetudine delicati iuuenes
multum abhorrerent, illos hac voce sæpissime
increpabat. Ne patiamini, o Lusitani, vestræ
virtutis aciem hebescere in delicijs, vestram
audaciam, & alacritatem marcescere in cu-
pidinibus. Non delicatæ, sed callosæ manus
militem decet. Non redoleat pastillos, sed pul-
uerem tormentarium. Non in bysso, & pur-
pura, sed humi cubet, doctus pariter sub dio
hyemare, & æstiuare. Qui enim voluptatum
illecebris, ac lenocinijs se corrumpendos tra-
dunt, nunquam erunt hostibus formidolosi.
Ipse etiam imperator Vespasianus militaris
disci-

*disciplinæ diligentissimus obseruator, cum
semel adolescentulum vnguentis fragran-
tem videret, illius effæminatam viuendi
consuetudinem hac increpatione deterruit:
maluisssem allium oboluisse. Et iure op-
timum sapientissimus Lycurgus affirmauit, vo-
luptatem, & virtutem sic inter se compo-
nendas, vt voluptas virtuti seruiat, non
imperet. Multum quippe discriminis est in-
ter virtutem, & voluptatem. Nam in vir-
tute, nec satietas datur, nec tædiū, nec pæniten-
tia: at in voluptate delectamēto satietas, satie-
tati tædiū, tædio succedit pænitentia. Di-
gnum igitur est, vt ignobilius seruiat no-
biliori.*

*Si ergo militiam non iners, ignauaque
mollities, sed mascula alit durities, quod præ-
clarum, aut inusitatum facinus ederent illi
homines, qui sub Philippo tam molliter, &
delicatè viuebant? Hercules in cunis angues
pressit, & non nisi ferendo, & tolerando, per
concatenatos labores didicit orbem do-
mare. Alexander impigros, atq; acres milites,
multis laboribus exercitos suas in acies dis-
ponebat. Ille etiam veritatis amantissimus*

*Epaminondas vulgo dictitabat, ab homine
molliter educato nihil unquam viriliter ge-
stum esse. Matthias Corvinus (Hungarorum
decus eximium, & præsidium singulare) as-
perioribus semper studijs suos milites exerce-
bat, qui sub diuo hyemarent, & estiuarent,
algore, atque æstu adeo obdurati, tantisq; mi-
liticæ laboribus obfirmati, ut nihil esset ita
arduum quod non expugnarent: nihil ita dif-
ficile, & laboriosum, quod non aggredierentur:
nihil ita durum, quod non emollirent. Ac pro-
inde cùm horum militum vultus solibus ef-
sēt perusti, vocabatur, Nigrorū exercitus.
Illa nigredine Mauors delectabatur: ad illos
vultus vstulatos, & decoloratos horrebat ho-
stis, illorumque hirsuto supercilio, & prolixo
capillamento terrebatur. Romani denique
tandiu viguerunt, quandiu durioribus stu-
dijs fatigati, & bello attriti fuerunt. Sed
quos non vicit armatus orbis, vicerunt Ca-
pæe delicie. Atque ex hoc deliciarum fonte
innumerae clades deriuatæ florentissima or-
bis terrarum imperia funditus euerterunt.
Quod quidem videre est in Sardanapalo, cu-
ius flagitiosa socordia, moresque corruptis-
simi*

simi ad eam effrænatae libidinis intemperantiam deuenerunt, ut corpore animoque effeminatus inter scortorum greges lanam, & purpuram colo neuerit, & pensa inter virgines distribuerit. Quam viri impudentiam indignatus Arbaces, facta coniuratione, in aula irrupit, & indignum imperatorem sceptrum spoliauit, atque ita Assyriorum imperium in Sardanapali delicijs extinctum, ac sepultum est. Non aliter Heliogabalus ad imperij culmen astu, & calliditate prouectus, cum vitam ageret omni mollitia, & luxuria inertem, suae intemperantiae meritis penas luit a militibus interfectus, eiusque caduer per urbis vicos, & plateas vinctum, ac ludibrio habitum in Tyberim est abiectum. Non igitur vberes audaciae, & virtutis prouentus ab ijs hominibus possunt sperari, qui primum adolescentiae robur voluptatibus effeminantes, atque in caeteris vitae partibus semper sibi similes, in luxu viuunt, in luxu consenescent, in luxu sepeliuntur. His defensoribus non bene staret nostri regni incolumitas. His humeris qui, instar niuis Solis ardore liquefcentis, voluptatibus, & mollitia flu-

unt, non benefulciretur nostri imperij magnitudo. Qui enim apes aculeum vix patienter ferunt, quo stomacho cuspidatum armorum acumē sustinebunt? Quos præteruolans musca terret, cur non terrebit leo?

In hoc voluptatum luto Hispana iuuentus immoderatè volutabatur. His delicatioris vitæ studijs exercebatur. Atque ita haud facile dictu est, in quantum Lusitaniæ dedecus, & nostri nominis opprobrium, hostilis furor non solum nos inuaserit, sed, & sæpissimè eluserit. Arcem de Ormuz ditissimum totius Orientis emporium, institoribus, mercatoribus, negotiatoribus frequentissimum, quæ omnes ex mari Persico diuitiæ confluebant, postquam per multam annorum seriem Lusitano nomini, imperioque seruierat, hostis inuasit, & diuturna obsidione fatigatam sub suam potestatem redegit. Qua in re maximè culpandus Rex Philippus, cum enim Ormuziæ opes in summo periculo versarentur, & iam extrema vastitas timeretur, nullum desperatis rebus auxilium misit, imo ipsis scopulis surdior Indicas res iam iam ruituras minimè curauit, sui, ac nostri æquè im-
memor

memor . Semel atque iterum clamauit affli-
cta Lusitanorum manus , & aduersus ap-
propinquantem hostem auxiliares copias a
Rege implorauit , quibus militum animus
iam demissus ad defensionem erigeretur: Re-
ge tamen obstinatas aures præbente ,
cum nihil subsidij mitteretur, omnis defendē-
di arcem de manibus elapsa occasio nostris
militibus spem minuit, hostesque ad pugnan-
dum alacriores , & ad vincendum prom-
ptiores fecit . Nunc verò ex prospero certa-
mine facti ferociores , non solum minaci-
ter fremunt, sed nostro nomini arroganter il-
ludunt . Hic fuit rerum Indicarum infeli-
cissimus status sub Philippo , qui tamen olim
sub Regibus Lusitanis feliciter auctus, & for-
tunate fuit conseruatus . Illi enim, tanquam
patriæ patres studiosi, subleuandis suorū Lu-
sitanorum periculis summū laborem, ac vigi-
lantiam impertiebant , Indiamque tan-
quam alteram oculorum pupillam ita ama-
bant , ut nil nisi nefarijs finitimorum Re-
gum consilijs occurrere , armis obsistere,
& audaciam debilitare cogitarent . Cumq;
insestis signis bellū sæpissimè ab illis gentibus

esset illatum, tanta dexteritate a nostris militibus decertatum est, ut ex promiscua barbarorum hominum colluione prope infinitam conlatam turbam non semel contuderimus, & penitus compresserimus. Qui tamen militandi, & praeliandi feruor deserbuit sub Philippo. Miserandus profecto Rex, qui cum ea quæ apud Indos agerentur, exnuntijs accepisset, saxo tamen frigidior hærebat, consilijque, & deliberationis inops, suis clientibus neque erat adiumento in periculis, neque solatio in laboribus, neque refugio in calamitatibus. Quod quidem haud mirum videatur, si voluptatum Sirenes, & mollissima incantamenta irretitos Regis sensus habebant, & tam propriæ, quam alienæ salutis oblitum reddebant.

Quamquam verò principis animus neq; semper rebus serijs sit intendendus, neq; semper iocosus remittendus, nunquam tamen publicarum rerum curæ deesse, imo potius diuino quodam consilio, ac prouidentia ad omnes aduersos ictus debet inuigilare. Hinc vera Regum efigies apud Ægyptios oculata pinzebatur. Nec non ille draco Hesperidum custos,
non

non sopitis, sed vigilantibus semper oculis ad
custodiam excubabat . Si enim in principe
oculorum acies caligauerit, quis cæcos popu-
los ducet ? Si in voluptatibus iaceat desidio-
sus, quis desides, & iacentes militum animos
excitabit ? Si rebus suis diffidat, quis clientes
in spem, cogitationemq; meliorem inducet ? Si
ab hostibus circumuentus dormiat in peri-
culis, quis quotidianas capitis insidias evita-
bit ? Principes sūt reipublicæ naues, quas sicut
in magnis tempestatibus oportet exonerari,
ita virum principem omni vitiorum onere
oportet esse liberum. Imo sicut nauium guber-
nator vigil, atque insomnis clauo assidet, &
quanuis plenissimis velis nauiget, nunquam
a gubernaculo dimouetur, ita princeps ad re-
gium munus dignè obeundum debet intende-
re, & quidquid suis clientibus est nocumen-
to, longè, lateque arcere. Hinc ego factum cre-
do, ut Egyptij Reges aureo sceptro Ibim ex-
pressam gestarent, quæ auis oblongo collo, ri-
gidis, & excelsis cruribus, corneo, proceroque
rostro, serpentibus maximè infesta, pestem ab
Ægipto auertit, illamque vastissimam regio-
nem purgat, dum omnem serpentium vim ita
confi-

conficit, atque consumit, ut neque morfu pestilenti noceant viuæ, neque mortuæ odore teterrimo auras corrumpant. Regio quippe officio ille princeps perfectè fungitur, qui se nō sibi, sed suis natum credens, publicis calamitatibus medetur, omnium ciuium damna, atque iniurias propulsat, & non solum inuadentem, sed adhuc imminentem pestem vitat. Neque abs re dixit, qui Reges bifrontes Ianos appellauit, quibus curæ sit præterita noscere, & futura præuidere. Ex præteritis discāt cautè viuere, & ad futura fortiter, ac sapienter tendant. Omnes a tergo, & a fronte declinent ictus: & tam apertè, quam occultè ingruentes hostes callidissimè eludant.

Non solum arcem Ormuziā perdidit Rex improuidus, sed maiora adhuc incōmoda ex illius socordia, atq; ignauia defluerunt. Illā prætereo non prætereundā vocē, quæ in Marditi curia intonuit, vox quidē perniciofa, cuius atrocitas, atq; impudentia aures excruciat: uberrimā scilicet Orientis regionem nihil emolumētī parere Lusitanis, illasq; merces trās marinas, quæ ad nos quotidie asportantur, nō in regni utilitatē, sed potius in publicam
perni-

perniciem verti, illisque tantum hominibus
esse utiles, qui solo quæstu, & lucro ducti
emptionibus, & venditionibus intendunt;
atque adeo illas Indiæ prouincias insana
prorsus nauigatione non quærendas, sed pro
contemptu habendas. Qua voce quid stulti-
us, aut insanius fingi potest? Fuit ille im-
probissimæ linguæ latratus, into venenatus
morsus, qui Lusitani nominis amplitudinem
labefactare contendebat. Si verò non unum,
sed multiplex habetur linguæ venenum,
quo nunc inficit turpiter loquendo, nunc in-
famat mordaciter obtrectando, nunc iugu-
lat mendaciter deferendo, nunc fallit auda-
citer peierando: ille profecto consiliarius, qui
tam execrandâ vocem protulit, non vno tan-
tum, sed mille modis Lusitaniæ nocebat: fidēq;
& catholicâ religionē in illis prouincijs disse-
minatâ extinguebat. Quâ Lusitani pluris fa-
cimur, quâ lucidiores Oriētis gēmas articulis
insertas. Esset quidē lacrymandū, si hominum
genus primò rude, barbarū, atq; incultū, quod
a nostris fuerat mansuesactū, & politioribus
artibus excultū, ad pristinā barbariē rediret,
& quâ deposuerat feritatem, iterū induerēt.

Illam

Illam tamen imprudentissimi consiliarij vocem cum sibilo , & cachinno explodendam, vidimus illorum auribus, atque animis altè imbibitam, qui res Indicas tam parui faciebant, ut illam satis gloriosam expeditionem omnino deferendam putarent. Hæc Regis incuria Malacam perdidit, quæ clarissimorum virorum sanguine parata, & conseruata post diuturnam obsidionem, cum nihil auxilij mitteretur venit in hostium potestatem.

Nec solos Indos tetigit infelicitas, sed etiam in Brasiliam grassatum est infortunium. Nemo nescit præpinguem Brasiliæ regionis ubertatem, ubi nullus brumæ rigor, nulla hyemis inclementia, nulla aeris intemperies, sed perpetuum, & placidissimum spirat ver, mira elementorum pace, & salubritate coniunctum. Nec facilis deliberatio, sit ne maior cæli salubritas, an terræ fertilitas. Illud unū pro comperto est, nullibi cæli faciem esse elementio rem, neque terræ genium benigniorem cui magis abunde tam diuitiarum, quàm deliciarum suppetat ad mortalium usus. Hic est Brasiliæ prouinciæ situs omnium humanarum rerum vsui opportunus. Hunc Ba-
tauo-

taurorum vires , quæ nobis olim non terrori,
sed contemptui erant, semel, atque iterum op-
pugnant, & expugnant, suæque ditioni, ac ser-
uuti tradunt ciuitatem vulgo Bahiam,
quæ quanuis situ esset munitissima, nullos ta-
men habebat bellicos apparatus , ad propul-
sandos , & repellendos inimicorum impetus.
Quis enim ad defensionem locus relinqueret-
ur miseræ ciuitati, ubi nec milites subsidia-
rij, neque armorum, & nummorum copia, ne-
que bellica erant instrumenta , imo potius
omnia ita auxilio, & consilio destituta, ut la-
tissimi ad bellum , & ad victoriam aditus
hosti paterent . Ac proinde ex nostris partim
capti, partim interfecti, partim fusi, partim in
fugam versi , partim in loca saltuosa recepti,
partim metu, & lassitudine exanimati, in syl-
uis, atque in dumosis rupibus ferri aciem ef-
fugientes , pauci verò intra muros hostium
præda facti, Bataurorum potestati se dedice-
runt. O indomita Batavia protervis Hispaniæ
ruinis altior, & gloriosior! En Bataui rerum
a se gestarum maximi iactatores, iam se His-
panorum damnis iactantius, atque insolenti-
us efferunt . Nos cum maxima rei familia-
ris

ris iactura Brasiliam prouinciā amissimus,
sed iterum recuperabimus; si Bataui sanctè,
& religiosè ictum pacis fœdus nequè nefariè
frangant, neque scelestè violent, aliter enim,
& datæ fidei violatores, & mentientes re-
darguemus. Fateor quidem Batauos ad ex-
cogitandum acutissimos, & ad efficiendum
esse acerrimos, nec non in naualibus prælijs
apprimè exercitatos; verum circa illorum
fidem non leuis mihi est iniectus scrupulus.
Quid enim profunt dimidiatæ pacis leges?
Quid predest in vno loco pacem prætere,
in alio bellum gerere intestinum? Lusitani nō
personatam, sed nudam colimus fidem. Qui
enim simulatam ineunt amicitiam, hi sunt
amoris occisores. Si Bataui se amicos pro-
fidentur, amicè agant; si hostes, hostiliter viuāt;
si fraude, & dolo est certandum, nos utrinq;
dolosos, & fraudulentos exhibeamus. Nam cū
vulpe est vulpinandum, & Græco fides Græ-
ca adhibenda.

Mitto alia dedecora quibus Lusitanorum
auctoritas terra, marique iugulabatur. Vidi-
mus sub Philippo mare ita prædonibus refer-
tum, ut ex omnibus orbis terrarum prouin-
cijs

cijs, & priuato, & publico commeatu prohiberemur, neque ullam rem maritimam satis tutò obire possemus. Vidimus nostri maris littora, quæ sub Lusitanis olim Regibus pacata, & tranquilla erant, Maurorum, Turcarum, hæreticorum, pyratarum nauigijs infesta, quò miseris piscatoribus, qui hamo, & retibus quotidianum victum quærebant, omnis ad sustentandam vitam aditus claudebatur, & sæpissimè ab illis infestissimis prædatoribus virorum, ac sæminarum corpora inopinatè capiebantur, quibus nunc Maurizana ergastula sunt referta. Nunquam profecto gentè Maurusiam nostræ genti vehemētius insultare, nunquā suis velis insolentius volitare, nunquā liberius in nostra littora inuchi vidimus, quam sub Philippo. Quod quidē testatur plurima loca maritima. quibus nulla dies formidinis, ac periculi erat libera, hostibus maximè sollicitis, atq; intentis, ne quod prætermitterent nocendi tēpus, nosq; nunc hostili, nunc prædatorio more insectarentur. Vidimus onerarias ex India naues quā vêtorū impetu, quā inimicorū vi modo sūmersas, modo litoribus impactas, modo scopulis illisas idq; ob Re-

gis incuriā, qui non solū homines rei naualis
inexpertos classi præficiebat , sed etiam im-
prouidos, ac temerarios, qui nondum tempe-
stium ad nauigandum mare tentabāt ; &
quanuis homines rei nauticæ peritissimi ma-
nifestis indicijs deprehenderēt, quantum ma-
li classi impenderet , ipsi tamen sua temeri-
tate, imo sua insania præcipites , priuatum
errorem damno publico præferebant : & plu-
ris faciebant ex suo cerebro illatum damnū,
quā ex alieno partam salutem. Cum tamen
satius sit errare ex alieno consilio, aut ex pu-
blicæ rei affectu, quā ex proprio arbitrio, atq;
ex priuato commodo veritatis scopū ferire .

Hæc inter difficili bile feruēs iecur intumescit , imo totus in Lusitanos excandesco,
qui præ inani maiorum suorum iactantia,
pluris faciunt generis claritudinem , quam
alias prudentiæ, virtutis, sapientiæ, & con-
siliij dotes. Hi profectō non ignauiam, non so-
cordiam, non timiditatem, non morum turpi-
tudinem , sed solam generis ignobilitatem,
atque obscuritatem homini obijciendam esse
putāt. Credunt enim ex ignobili, atque obscu-
ro viro nihil præclarum edi posse . Credunt
solos

solos homines illustri loco natos ad præclara
reipublicæ munia obeunda esse idoneos; ac si
morum probitas, mentis acumen, consilij ma-
tunitas, prudentiæ pondus, iustitiæ integritas
solam nobilitatem comitentur, cæteri verò
homines omnibus naturæ ornamentis desti-
tuti nascantur. Vide quæ superbia, quæ sui
ignoratio, quæ intolerabilis arrogantia? Di-
cite, quæso, quid profunt fumosæ imagines,
quid stemmata gentilitia, quid in atrijs pen-
dentes ceræ, si nihil in moribus clarum, nihil
in vita illustre geritis? Quid prodest auitus
prosapiæ splendor, si vobis prudentiæ, veri-
tatis, fortitudinis, & reliquarum virtutum
est ieiunitas? An creditis nunquam ex stre-
nuo ignaum, neque ex forti, & bellicoso pa-
tre timidum filium procreari? An creditis
nihil abiecte, nihil timide, nihil ignauè, nihil
muliebriter a viro illustri fieri posse? An cre-
ditis virtutem semper nobilitatis esse comi-
tem indiuisam? Erratis profectò erratis, vi-
demus enim quamplurimos genere illustres
viros, qui vitiorum illecebris, & cupiditatū
lenocinijs ita capiuntur, ut nil nisi ientacula,
prandia, cænas, comeſſationes, ebrietates, &

*fcurrilitatis cogitent : nil nisi diem solidum
ventri, atq; epulis dare: nil nisi fraude, ac dolo
humiliorem plebem decipere: nil nisi mendacia
mendacijs contexere: nil nisi in pace garruli-
tatem, animositatēq; prætere, at in bello ti-
miditatē exhibere: nil nisi in pace verba ses-
quipedalia proijcere, in bello terga vertere,
salutemq; non in manibus, sed in pedibus po-
sitam existimare. Hæc est inanis, futilisq; no-
bilitas, & tamen huius farinæ homines ita
argumentantur, & hanc satis mendosam, atq;
inanem inferunt cōclusionem. Hic homo est
illustris, ergo dignus qui sit Episcopus;
ergo dignus qui classibus, & militiæ præ-
ficiatur. O futilem, o ridiculam, o mendacem
consequentiam! Si vanus, si ebriosus, si impu-
dicus, si illiteratus, si litigiosus, si ira-
cundus, si libidini deditus, quo iure ad
Pontificiam dignitatem est euehendus? Si
imprudens, si timidus, si improuidus, si
ignauus, si inexpertus, si militiæ impe-
ritus, si temerarius, qua ratione ad classis,
vel militiæ præfecturam est extollendus?
Sit regio sanguine procreatus, non eo infi-
cias, Sit clara stirpe excisus, non abnuo.*

At

*At quid hæc profunt , si vitam adeo turpi-
ter habet institutam , ut non unum solum
erratum , sed multiplex in eo vitium repe-
riatur ? Generis obscuritas fit clarior , si ad-
sit castigata morum temperies ; at generis
claritas fit obscurior , nisi adsit morum pro-
bitas . Illa tandem hominum natio lauda-
tione digna est , in qua non haustum amaio-
ribus generis decus , sed sola facta illustria , &
gloriosa hominem faciunt illustrem .*

*Hoc fuit per hosce annos in Lusitania
multorum malorum seminarium . Hoc ex
fonte clades , cædesque deriuatæ totum re-
gnum miseranda contagione corripe-
runt . Cum enim non hominum , sed meri-
torum conditio inspicere , atque expendi de-
beret , tam domi , quàm militiæ clarissimos
viros sæpissimè vidimus indonatos ; illos
verò qui nihil præclarum , atque illustre in
republica gesserunt , ob solum inane nobi-
litis nomen , maximis præmijs , & mune-
bus affectos . Quo quid acerbius , aut cala-
mitosius fingi potest ? Quæ ad optimos ho-
minum mores inuertendos via compèdiosior ?*

*Iam verò imberbes adolescentulos rei milita-
ris imperitos, imo omnibus publicis muneri-
bus obeundis prorsus inhabiles, quis non mi-
rabitur, vel classi præpositos, vel alijs publi-
cis ministerijs esse præfectos, non ob aliud ni-
si ob hæreditariam a maioribus nobilitatem?
Quibus iniurijs iactata, & agitata æquitas,
omnisque iustitia a Lusitanis magis, ac magis
exulabat. Cum tamen hæc semper vigil, &
oculata ad regni custodiam, & propugnaculū
debeat adesse, trutinam æqua lance libra-
tam manu gestans, quod est viuum iustitiæ
hieroglyphicum. Cuius rei iconicum simula-
chrum fuit inter Romanos, qui iustum, &
moderatum principem ita effingebant, ut al-
tera manu aurum, & flagellum, altera truti-
nam teneret hac inscriptione: Rex Iuppiter
omnibus idem. Hoc est, in clientibus non
generis claritas, aut obscuritas pendenda, sed
sola probitatis, aut improbitatis ratio est ha-
benda. Omnes homines ab eodem limo, & ab
eodem figulo in corpore mortali animum ge-
rimus immortalem, & rationis capacem, nec
non pulcherrimam sensuum, ac potentiarum
supellectilem; atque adeo non splendor nata-
lium*

lium, sed virtutum decor, & nobiliores, & digniores faciat. Præterea in auro, & flagello præmium innuitur, & supplicium: a Rege enim maximè est providendum, ne quid incommodi suis clientibus eueniat, atque ita flagitiosorum improbitatem flagello coerceat, probos verò, & bene moratos viros auro ad honestatem alliciat. Flagello utatur ad terrorem, auro inuitet ad amorem. Si in tranquilla, & pacata ciuitate turbulentos, vel criminosos agnouerit, in hos flagello, aut si opus fuerit, ferro animaduertat. Si verò aliquos fortitudine præstantes, virtute excellentes, animi moderatione egregios intellexerit, hos auro locupletet. Non aliter Æolus ventorum arbiter, ac moderator, quò luctantium inquietudinem, proteruiamq; comprimeret, habenis utebatur, quas nunc premeret, nunc laxas immitteret, pro ut dissoluta illorum rabies exigebat. Ita profectò ad moderandam ciuitatem, atque ad coercendos ciues moribus, legibusque solutos, habenis utatur Rex, quas prudenter, ac fortiter moderetur. Nam quemadmodum apud sapientem, & prouidum patrem familias rei familiaris ratio tam sapi-

enter habenda est , ut neque cum prodigali-
tate dillabatur , neque cum aliqua illibera-
litis , aut auaritiæ suspitione retineatur;
ita bonus princeps intra præscriptos iustitiæ,
clementiæ , & seueritatis fines ita incedat,
ut medio semper insistat . Quæ tandem , &
Regis, & regni est optima habitudo .

Sub his Regibus nulla gens , aut orbis
natio pertimescenda est . Sub his in summa
pacis, & otij tranquillitate viuent ciues. Sub
his erit in iudicijs æquitas , in supplicijs
æqualitas, in muneribus liberalitas, fontibus
vincula, in fontibus præmia decernentur . Ve-
rum his omnibus ornamentis nuda fuit per
hosce annos Lusitania sub Philippo . Vidimus
enim pro æquitate regnare iniquitatem, pro
temperantia libidinem, pro liberalitate aua-
ritiam , pro veritate mendacium , pro fide
periurium . Vidimus nullam sacrosanctis
Ecclesijs concedi immunitatem ; nullam re-
bus sacris seruari auctoritatem; nullam cum
viduis, & cum pupillis exerceri fidem; nul-
lum benemeritis dari præmium ; nullum cri-
minosus adiungi supplicium . O tempora cala-
mitosa! o patriæ inuersos mores !

Hanc

*Hanc verò tam iniquam, & sinistram
mali regiminis rationem non quidem in Re-
gem Philippum, sed in Regis ministros de-
torquemus: & sane essem infantissimus, si
subditorum culpas Regi imputarem. Nam
quanuis hæc suspicio imperitorum hominum
sermonibus conualescat, qui omnia publica
errata credunt esse Regum deliria, ab inge-
nijs tamen, & linguis prudentiorū repudia-
bitur. Videmus enim quàm sæpissimè in re-
gnante æquitatem, in subditis verò iniqui-
tatem. Videmus Regem honesta imperantem,
at populum inhonesta, atq; indecora molientē.
Præterea quis crederet Regē catholicum in tot
malefactis, in tot maximis sceleribus, in tot
seditiosorum hominum flagitijs conniuere, cū
potius omnium delictorum inquisitor, ac puni-
tor deberet esse acerrimus. Quis crederet fures,
adulteros, sacrilegos, homicidas, & alios tam
diuinæ, quàm humanæ legis trāsgressores per
Regis dissimulationem, nullas sui delicti pæ-
nas recepturos, imò libere, atq; impune vaga-
turos? Longū esset singula minutatim recēserē,
sit satis sūmatim exponere, neq; enim cōiectu-
ra, sed oculis, ac manibus tenentur omnia.*

Neminem igitur latet , quamplurimos
fuisse viros sacrilegos, qui ut Philippo impe-
ranti morem gererent, Pontificiæ auctoritati,
maiestatique obistere, sacrosanctis Romanæ
Ecclesiæ leges violare, scelestis manibus sa-
cros Dei ministros contingere, Nuntios Apo-
stolicos grauissimis contumelijs afficere ausi
sunt, & tamen illorum scelus summa impu-
nitate est prætermisum : cum illi homines
digni essent, qui ictu fulminis deslagrarent.
Si enim Regis Ieroboami manus aruit, quam
sacrilegè, atque audacter ad Dei ministrum
percutiendum extenderat, non dissimili, imo
grauiori supplicio erat mulctanda illorum
hominum detestabilis audacia, qui Summi
Pontificis vicarios, vel leuissimè offendunt,
ipso Deo attestante, Qui vos tangit, tangit
pupillam oculi mei. Quid verò in humano
corpore pupillis delicatius, quid subtilius,
quid pretiosius, quas natura palpebrarum,
& ciliorum muro obuallauit, membranisque
tenuissimis circumuestiuit, ut undique illæ-
sæ seruarentur? Quid inter homines maioris
dignitatis, & præstantiæ fingi, aut cogitari
potest, quàm sacro oleo inungi, aris ministra-
re

re, Deum manibus attrectare, ipsi Deo quodam modo imperare, qui ad prolatam consecrationis vocem ita hominì paret, ut panis, & vini substantia in verum Christi corpus, & sanguinem conuertatur? nulla igitur maior improbitas, nullum est audacius flagitium, quàm lædere has diuinorum oculorum pupillas.

Mihi verò non difficile dictu est, utrum impudentiores, an sceleratiores fuerint Regis ministri, qui posthabita dignitate Episcopali, contemptis decretis Pontificijs, proculcato diuino iure, tam seuerè, imò tam iniquè, & iniuriosè conspirarunt in Collectorem. Fateor sceleris immanitatem, sed non dissiteor impudentiæ magnitudinem. At, inquit, hoc delictum Regis proprium est, neque ad ministros est detorquendum. Non ita quidem. Quauis enim peccatum in Regibus sit maius, & magis perniciosum (cum Reges multos habeant sui imitatores) at non ideo ministri a culpa sunt immunes, qui contra fas, & æquū Regi parent: cum tamen iniqua imperanti non sit parendum. Quod quidem experimento didicimus in Rege Saule, qui vel furore accensus

census, vel dolore stimulatus suis olim satel-
litibus imperavit, ut quanta maximè celeri-
tate possent, Dei ministros, & sacerdotes in-
terficerent. Ad Regis vocem hærent satellites,
& stupent vultu tremebundo, tam immanè,
atque atrox imperium detrectantes: neque
audet manus scelerare, imo leuissimum sacer-
dotis tactum reformidant. Noluerunt serui
Regis extendere manus suas in sacerdo-
tes Domini, inquit sacer textus. Magnum
credebant piaculum, scelusque inauditum,
si sacerdotalem dignitatem etiam leuiter of-
fenderent, manus que suas tanto flagitio con-
taminarent. Qua igitur ratione potuit Rex
catholicus imperare, ut cum Dei ministro
irreuerenter ageretur, probrisque, & maledi-
ctis vexaretur? Quo iure eundem potuit cu-
stodia detinere? Apud quos non male audiret
Rex catholicus, qui omni contentione contra-
verum nitebatur, & asperius, ac liberius
quàm par erat, hominem Episcopum, &
terrore, & minis insectabatur. Fuit illa laico-
rum in clericos audax, & immoderata li-
centia, quam superi non prætermitterent
impunitam. Quæ etiam gens est tam fera,
tam

tam immanfueta , & tam immanitatis plena, quæ suos sacerdotes, quanuis vanæ superstitionis, & idolorum cultores, non magni faciat , summoque honore , & veneratione prosequatur ? In sacerdotibus aliquid humano maius , atque augustius est suspiciendum, qui propius accedunt ad diuina . Ipse etiam Magnus Alexander a cuius audacia nihil unquam inausum , nihil illacessitum, atque intentatum est , cum semel præ iracundia , & bellico ardore impatiens ad devastandam Iudæam procederet , iamque urbibus, oppidis, atque agris extrema vastitas timeretur , ubi primum summum sacerdotem Iaddum sibi occurrentem vidit, Pontificia auctoritate tanquam Dei numine percussus , gradum cohibuit, furorem compressit , minas posuit , ferrum condidit, suæque feritatis , & ferocitatis oblitus , ac si prorsus imbellis , & inermis esset , ad summi sacerdotis pedes prouolutus , non iam minis agendum , sed precibus contendendum esse iudicavit . Ita profectò sacerdotalis dignitas imperatoricæ maiestati, terrori , ac venerationi esse debet.

Solæ

Solæ barbaræ nationes, quæ neque moribus, neque legibus, neque cuiusquam imperio reguntur, hanc in sacerdotibus dignitatem non agnoscunt.

Illud pro comperto habetur, atque ex annalium vetustate eruitur, commissum scilicet in sacerdotes irreuerentiæ scelus nunquam a Deo impunitum omitti, imo semper in homines noxios acerrimè fuisse vindicatum. Qua in re testes inuenio locupletes Strodi incolas in Angliæ regno, qui ut Diuum Thomam Cantuariensem aliqua afficerent iniuria, non sine magna irrisione, equi quo tum vehebatur caudam amputauerunt, credentes multum ignominiae ex illo facto Thomæ inferri. Sed ne diuinæ ultionis in impios excandescentis furor tantum scelus inultum sineret, non multi temporis interiectu factum est, ut omnes illius loci incolæ caudati nascerentur, ex quo ortum habuit illa paræmia, fugite Angium caudatum. Non minorem diuini supplicij grauitatem expertus est Valentinianus Imperator, qui regiae celsitudinis fastigio insolentior, & inani purpuræ splendore plus nimio inflatus, ac tumens, cum

Marti-

Martinum Episcopum ad se venientem videret, illique non reuerenter assurgeret, subito ex gestatoria sella ignis erupit, qui ipsum coegit Imperatorem non solum surgere, sed adstare, imo, & procumbere ad pedes Pontificis. Credo ipsum Deum tantæ irreuerentiæ ultrices flammæ accendisse, ut suo damno cognitum, & compertum haberet Imperator, Pontificiam dignitatē regiæ maiestati multum anteire. Quantum igitur quā lucis pulchritudine, quā orbis magnitudine, quā situs altitudine, quā agendi efficacitate Sol Lunæ præstat, tantum Pontificia maiestas Regiam maiestatem antecedit. Ad illius dignitatem nullius dignitatis collatio. Ad illius ornamentum nullius ornamenti comparatio. Quos igitur prosperos suarum rerum euentus Rex Philippus potuit sperare, qui Pontificiam Collectoris dignitatem iniuriosè affici passus est? Nil mirum si omnia in peius ruerent, ubi nullus religioni dabatur cultus.

FINIS LIBRI SECVNDI.

ARGV-

ARGUMENTVM

In Librum Tertium.

Philippus nostram Lusitaniam redigere tentat in provinciam tributariam. Ciuitas Eborensis pro libertatis defensione concitatur. Lusitanorum proceres ad Madriti curiam auocantur. Margarita Mantuæ princeps regno affidet gubernatrix. IOANNES Brigantiæ Dux iubetur cum Margarita belli curas partiri, & in oppido Montemor per aliquot menses commorari. Ad oppidum Almada Regis imperio proficiscitur, & ad Margaritæ colloquiū Olyssiponem venit. Ad Cataluniam vocantur Lusitani. In Brigantinos Duces, & in serenissimum Odoardum Hispanæ gentis odium inueteratum.

LIBER TERTIVS,



REGNI vires non solum imminuere, sed etiam Lusitanorum dignitatem, auctoritatemque labescere maximè contendeant Regis ministri. Iam rumor per omnium ora, & aures dessemminatus percrebruerat, nihil regis ministris maiori curæ esse, quàm nostri regni immunitates violare; Lusitanorum Regum leges, & sanctiones continere; omnia nostra iura proculcare; nec iam instar regni, sed instar provinciae nostram rempublicam esse gubernandam. Quis verò non iniquè, & peracerbè ferret, per quingen-

tos prope annos non interruptam, atque inter-
turbatam nostrarum legum rationem, nobis
inuitis, & repugnantibus perturbari? Quis
non doleret in publicis muneribus obeundis,
in ciuitatibus administrandis, in beneficijs
distribuendis, nullo discrimine agi Iberum,
& Lusitanum, imo sæpissimè exteros homines
domesticis anteponi? Nos tempestiuam cultu-
ram, & sementem terræ daremus, illi ex no-
stro labore fructus meterent? Nos ad pingua
pascua oues duceremus, illis, & mulgere,
& tondere esset labor? Nos ancipitem, & la-
boriosam Martis aleam iniremus, illi in otio,
ac desidia ante oculos nostros laureati ince-
derent? Nos armis cincti, cursu, & lassitu-
dine exanimati nostros fines ab hostium
incurSIONibus tueremur, illi inertia lan-
guentes regimini assisterent, ac præsiderent?
Nos qua diurna, quâ nocturna manu
in assiduam librorum lectionem incumbe-
remus, illi pinguiore Ecclesiarum reddi-
tus perciperent? Nos pugnaces, & lacer-
tosi milites in acie caderemus, & exhau-
sto venarum sanguine, instar mutæ pecu-
dis, immolaremur, illi inermes, imo eneruati

F duces

duces puluinis delicatiori pluma refertis
molliter cubarent? Non ita ab ineunte ætate
educati, atque instituti sumus, ut hæc dede-
cora, has ignominias, hæc opprobria patere-
mur. Clarissimum Lusitanorum nomen, quod
longè, lateque diffusum vagatur apud exte-
ras nationes, non erat sub prouinciæ nomine
obscurandum. Nullus esset inter nos tam
profligatus, nullus tam perditus, nullus rerū
suarum desperatione tam plenus, qui nefarijs
inimicorum votis non obsisteret. Libentius
profecto pateremur vastari agros, vexari op-
pida, erui ciuitates, ardere tecta, diripi fortu-
nas, totum regnum miserrimo incendio con-
flagrare, quàm sub illo excogitato prouinciæ
nomine Philippi iugo seruire. Si enim uno
ictu omnes concideremus, non esset mors in-
gloria, neque aliquid haberet turpitudinis:
at in seruitute turpiter, & inhoneste viuere
id sane est sæpissimè mori: toties quippe more-
remur, quoties nos turpissima seruitutis nota
inuistos cogitaremus. Nam si in exiguo vitæ
curriculo labor labori innectitur, pericula pe-
riculis contextuntur, ipseque ærumnarum se-
ries ita est concatenata, ut unius mali finis sit
alteri-

alterius initium, consultius quidem est omnem calamitatum cohortem unius mortis ictu iugulare, quàm nouis miseriarum generibus quotidie esse obnoxios.

Hinc ille est Troianarum mulierum erga filios suos inclemens amor, quæ cum à Græcis captæ ducerentur, seruitutis iugum asperius, atque inhumanius, quàm par erat, indignatæ, infantes ab uberibus, atque ex carissimo complexu auulsos in Scamandrum fluiuium præcipitabant, hac voce materni amoris indice: vos certè non seruietis. Præstat enim neque unius horæ usuram ad viuendum habere, quàm miserandæ seruituti supereffe. His aquis primæ infantie spiritus intercluditur, ne adulta iam ætate seruitutis incommoda patiatur. Qui in hac ætate obeunt, & mortis sensu carent, & vitæ experimento: at ijs qui in seruitute viuunt, & vitæ voluptas, & voluptatis sensus adimitur. Illud præterea de Caldo Cælio memoratu dignum in Romanorum gestis refertur, qui cū in Germania captiuus teneretur, catenarum seriem, quibus deuinctus, & constrictus erat tam fortiter capiti illisit, ut protinus inter

cerebri , sanguinisque profluuium , animam
efflauerit: optimum factu ratus, si omnes cap-
tuitatis ærumnas mors vna præcideret: &
satius credens semel mori , quam inter vin-
cula sæpius mærore contabescere. Omnes si-
ue ex edacitate , siue ex turpiori intempe-
rantia contractos morbos, non vnum tan-
tum , sed multiplex leuat medicamentum;
at seruituti vel sola mors , vel sola liber-
tas mederi potest . Da libertatem, dabis op-
imum miseriarum condimentum . Adime
libertatem , adimes quidquid in vita est iu-
cundum.

Hanc acerbissimam seruitutis conditionē
per sexaginta annos inique tulimus , & non
ligneo , sed æneo iugo attritum collū vincula
im recusabat , quibus impatiens ceruix ab-
solui cupiebat . Cuius rei non leuia indicia
expertis sumus anno 1637. quo ciuitas Ebo-
rensis viris, opibus, & agrorum vbertate flo-
rentissima , cum se tributorum magnitudine
oppressam videret , tumultuosis tum plebis,
tum nobilium concitatis seditioibus , ad
libertatis asylum confugere , Philippo Rege
se eximere , nouarum legum rationi se sub-
dere

dere studebat . Hoc equidem erit immortalē
Eborensis ciuitatis elogium : hæc erit sum-
ma illius erga Lusitanos Reges amoris te-
stificatio . Fuit enim prima , quæ prope in-
termortuam regij sanguinis amplitudinem
renouare , Lusitani imperij deficientem li-
neam redintegrare , nec non repentina po-
pularium voluntatum inclinatione Castel-
lanorum iugum excutere studuit . Illud
pertinax , & obstinatum libertatis studium ,
illam magno in populo coortam seditionem
nulla disertis senis placauit compta , & mi-
tis oratio . Nullis procerum adhortatio-
nibus deferbuit ille popularis seruator . Non
ipsos homines opibus , gratia , & auctori-
tate florentes audiuit concitatae plebis se-
ditio . In foro , in compitis , in plateis hæc
vna audiebatur vox , libertas , libertas ,
libertas . Omnes mortem millies oppe-
tere , quàm illa tributorum onera pati
uallent . Ipsæ etiam sæminæ , quas na-
tura imbelles , atque inermes finxit , mi-
naci , & arroganti supercilio magis metuen-
dæ , quàm metuentes , ad arma conclamare :

pueri adhuc balbutientes, & elementarij per
ip̃sos angiportus incondite vociferari: senes
capulares, & depontani, pro senio iuuentam
induentes, non armorum incommoda, sed in-
honestæ seruitutis otium execrari: inter cæ-
nobiorum claustra monachi rei militaris in-
expertum Martium calorem spirare: omnis
denique ciuitatis facies insolito furore insa-
nare. Philippus hanc urbem tanquam rebel-
latricem funditus delere parauerat, sed hu-
manarum rerum moderatrix diuina proui-
dentia aliter rem destinauerat. Quo enim tē-
pore ingens pavor, ac trepidatio urbem per-
uaserat, serenissimi IOANNIS Brigantiæ Du-
cis auctoritas fuit interposita, qui non solum
obstinatam, & pertinacem Eborensium au-
daciam ab incepto fecit desistere, sed etiam
Regem Philippum placatiorem reddidit: Neq;
mirum videatur, si omnium Lusitanorum
voluntates a Philippo alienæ, Ioannis consilio,
atq; auctoritati obtemperauerint, quem præ-
sagæ plurimorum mentes futurum Regem
diuinabant: atque adeo consultius erat
adorare orientem Solem, quàm cadentem.
Præterea clausis animorum fornacibus iræ
ardor

ardor in Eborensibus æstuabat, & præ tributorum impatientia defatigatæ ceruices Hispanum iugum detrectabant: sed ille feruor erat comprimendus, vel saltem paulisper reprimendus, donec prudentiorem occasionem tempus daret. Quam quidem annis labentibus oblatam non abire permisimus, ne postea discedentem, ac fugientem frustra imploraremus.

Non satis erat intra Lusitaniæ fines malū, & noxiam seruire seruitutem, sed ulterius progrediebatur infortunium. Qui verò omnes seditionum vias clientibus debuit intercludere, hoc imprudenter factò apertius patefecit. Regni enim libertas, & incolumitas non tam suppliciorum acerbitate defenditur, quam legum suauitate, & lenitate munitur: nec minus perdit qui dura imperat, quam qui mitia, & factu facilia nescit imperare. Rex igitur Philippus (vel prudenter, & nimis cautè præuidens quæ imminebant, vel imprudenter dissimulans quæ iam odorabatur) quamplurimos ex Lusitania viros clarissimos, Duces, Marchiones, Comites, Episcopos, Dynastas, ad Madriti curiam accersiri iubet, ut

illos quâ imperio, quâ largitione, quâ spe
largitionis deuinctos ad regni perniciem
vnanimes, & conformes accenderet, atque
ita maiorum nostrorum leges, mores, consue-
tudinemque inuerteret, & omnem regni for-
mam deformaret, faceretque provinciam
tributariam. Neque nouum, aut inusitatum
esset animos auaritia, & ambitione ægros,
quales erant ex Lusitanis quamplurimi, vel
muneribus, vel pollicitationibus corrup-
pere, ut sui regni essent proditores, suæ patriæ
exitiales, suis legibus, ac moribus perniciosi.
Durissimo regis imperio parent multi, quo-
rum aut animus, aut ratio, aut potentia im-
becillior: aut fortasse ut Regis voluntatem,
& amorem hoc obsequio venarentur. Qui
enim in solo honorum, ac diuitiarum aucupio
detinentur, quique pecuniam fide, & pa-
tria habent cariorē, nihil curant sit ne
turpe, aut honestum quod imperatur: ne-
que ad publicæ, sed ad priuatæ utilitatis
scopum suæ industriæ, & cogitationis
aciem intendunt. Alij verò quorum fides
erga patriam maior erat, cum aliquid sini-
strum de hoc Regis imperio suspicarentur,
primò

primò hæere ambigui, profectionem difer-
re perplexi, moras interponere, pars æta-
tem, pars infirmam valetudinem, pars ino-
piam in excusationem adducere, pars resi-
stere, & palam contraire, arbitantes Re-
gem Philippum posse ab incepto desistere.
Principis enim ira quavis vehementes ha-
beat repentinos motus, spatium interpositum
frigescit, & sæpissimè plus dissimulando, quam
obistendo perficitur.

Difficilimū quidem est arcanos Regum
sensus introspicere: at ex uno ad alium
animi motum facere coniecturam non ita
arduum est. Nam quemadmodum ex cæle-
stium sphærarum motu æquabili, nec non
ex immutabili elementorum constantia ra-
tis semper ordinibus procedente, aliquem
intelligimus in illa cælesti domo non solum
habitorem, sed etiam tanti operis recto-
rem, & architectum: ita ex frequenti-
bus literarum, & legatorum missionibus,
ex iterato consiliorum ordine, ex varia
rerum dispositione, ex concitatis bellorum
tumultibus, ex oblato pacis, & amoris fœdere,

atque ex alijs externis signis non admodum
obscurè deprehendimus, quid in regij pectoris
sacrario deliteſcat. Non una igitur, ſed mul-
tiplici via intimos Philippi Regis ſenſus ſu-
bodorabamur, & futuros rerum exitus præ-
uidebamus. Illa verò in dies ſingulos homi-
num opinio magis, ac magis confirmabatur,
multum ſcilicet malorum noſtræ Luſitanie
inſtare, multū impendēre miſeriarum. Quor-
ſum enim, & iuuentutis, & ſenectutis florem
ad Madriti curiam Philippus auocabat?
Quorſum viris, opibus, & armis Luſitaniā
orbabat? Quorſum in maxima bellorum
perturbatione regni neruos præcidere inten-
debat? Non erat hic aut vultu tegendus, aut
taciturnitate celandus dolor. Maxima quip-
pe ijs omnibus obtigit mæſtitudo, quibus cu-
ræ erat Luſitanie valetudini, & tranquill-
itati inſeruire. Quis enim patriæ cadenti non
manum daret? Quis illam grauiffimè laborā-
tem non releuaret? Quis deficientem non reſi-
ceret? Nam poſtquam multum ſanguinis in-
ciſa vena miſſum erat, ne tributorum pon-
dere exhaustæ vires iterum conualeſcerent,
grauius, & non ſerendum iniungitur malum.

A Luſi-

A Lusitaniæ finibus potior nobilitas auocatur, ut quò longius Lusitani proceres ab domo sua traherentur, eò infirmius præ immodicis sumptibus deficerent, atque ita totum regnum eneruaretur.

Interea Ioannes Brigantiæ Dux, quâ opibus, quâ consilijs illos iuuabat, quorum fortuna erat imbecillior. Cumque in alienis malis pumiceos oculos nunquam habuerit, quid quid laboriosi operis suis Lusitanis iniunctum erat satis ægrè ferebat, & pro illorum defensione quidquid durum, ac toleratu difficile esset, libens susciperet. Inconditas plebis voces quotidie audiebat, & totius regni vociferationes, quibus patriæ libertatis defensor, Lusitaniæ seruator, ciuiû liberator, iniuriarum vindex, iustitiæ restitutor, hæreditariæ coronæ, & sceptri dominus vocabatur. Erat intempestiua illa Regis acclamatio, cum aliter, & in aliud tempus esset differendum æternæ mentis consilium. Et ne inconsideratus populi feruor Ducis auctoritatem etiam leuissimè imminueret, aut labefactaret, consultam maturitatem erat prouidendum, ut ille popularis motus vel omnino comprimeretur, vel

velsaltem ad tempus reprimeretur . Cum enim vulgus sit pessimus veritatis interpres non quod insipienti multitudini placet , sed quod veritati consonum est amplectendum .

Regni clauo moderatrix assidebat serenissima Margarita Mantuæ princeps , & Sabaudie Ducis filia , quæ quidem eximijs animi dotibus præclarissima , sub fæmineo vultu virilem fortitudinem , & regiam maiestatem præferebat . Durum tamen est fæminam viris præsidere , quam scimus non ad imperandum , sed ad parendum natam : illam enim in primæua orbis molitione homini subditam , & subiectam voluit ille mûdi opifex , ac sator , qui ad Euam dixit , sub viri potestate eris , & ipse dominabatur tui . Penes hanc fæminam erût omnia pacis commoda , & belli incommoda . Hæc erat armorum præses , in cuius præcipuè humeris inclinatum belli pondus recumbebat . Hæc ab excursionibus , & latrocinijs nostri maris littora turbatur . Hæc erat Bellona , quæ non fæmineis lacertis , sed partim regij sanguinis splendore partim mentis acutimine , &

consi-

consilio fidens, hanc sibi a patruele suo Rege Philippo impositam prouinciam, quamuis viribus imparem, & a muliebri sexu valde abhorrentem, libens suscepit. Quod quidem omnibus Lusitanis periniquum visum fuit, qui ægrè, nec sine indignatione ferebant, tot clarissimorum virorum curam imbelli fœminæ esse demandatam; præcipuè cum in Lusitania quæmplurimi essent viri qua fortitudine, quâ consilij maturitate, quâ generis claritudine. quâ ingenij præstantia, quâ mentis æquitate, quâ maximarum virtutum ornamentis excellentes, qui optimis a pueritia artibus informati, quidquid ad conseruandam patriam esset necessarium scirent diligenter quærere, subtiliter eligere, ingeniosè disponere sapienter prouidere. Fœminam verò a natura imbecillam, illiteratam, inexper- tam, nullis militiæ laboribus eruditam, quis poterit ad militaria opera facere robustam, ad ineunda consilia literatam, ad regni moderamina disertam, atque expertam? Fateor quidem principis beneficio posse aliquem in mendicitate positum

ex ignobili fieri nobilem, ex obscuro illustrē, ex mendico locupletem; at facere ex ignauo strenuum, ex imperito sapientem, ex imbelli audacem, ex elingui disertum, id profecto solius diuinæ potentiae est. Si vero inter homines alij rudiores, alij limatiores sunt, alijs politum, & limatum iudicium, alijs hebes ingenij tarditas est; at certē inter fæminas nulla tanto pollet acumine, quā si hominibus etiam stolidis; & insipientibus comparetur, non possit dici stolidior, & insipientior. Ipse humani generis auctor hominum res ita disposuit, ut inter virilem, & muliebrem sexum longum nobilitatis; & scientiae interuallum esset interiectum.

Interea temporis Rex Philippus credens inimicorum vires, & conatus, qui intestinā perniciem Hispaniae moliebantur, non posse solo fæmineo præsidio, & Margaritæ consilio satis comprimi, & propulsari; ad Ioannem Brigantiae Ducem literas mittit regia comitate, & liberalitate plenas. Nulla erat internuntiorum cunctatio: alij alijs superueniunt: viæ tabellarijs feruent, qui hostem iam iam imminentes, iam nostris littoribus appellen-
tem

tem, iam muros inuadentem Ioanni nuntia-
rent, quò ipse omnes moras præcipitaret, &
præsto cum armis, opibus, & præsidio adesset.
Hanc inter satis importunam epistolarum
missionem, durissimumque imperium impa-
tienter fluctuabat Ducis animus, cuius nulla
apud regem admittebatur excusatio. Qua in
re non tam Regem, quàm Regis ministrum
incusamus; cuius incredibilis peruersitas, &
vesanus liuor Brigantinæ gentis celsitudinē
deprimere, maiestatem attenuare, gloriam
perdere, auctoritatem iugulare cupiebat. Neq;
enim alienæ virtutis splendor invidentium
oculos delectare, sed offendere solet. Verum ea
fuit Ioannis prudens calliditas, ut, & inui-
dorum spes fefellerit, & inimicorum conatus
eluserit, dum ex durissimis Philippi imperijs
plus dignitatis additum, quam ademptum.
Imo nihil illi ad regnandum potuit accidere
opportunius, quam a patria exire, Lusitaniæ
pagos, oppida, ciuitates inuisere, vires recogno-
scere, vulgi animos, & sensus explorare. no-
bilibus studia, & voluntates expiscari, mise-
rorum querimonias audire, ut sceptro ali-
quando potitus, se sui regni acerrimum ultre-

rem

rcm exhiberet.

*Iterum atque iterum vrgebant Regis iussa, quibus Ioannes quandiu potuit reluctatus, & inter diuturnū luctamen per literas grauius questus est, sua merita commemorauit, Regemque sæpissimè obtestatus, vt Briganti-
næ familiæ auctoritati, dignitatique consu-
leret; in memoriam reduceret quidquid Theo-
dosius, Geminus, Ferdinandus, & alij Brigan-
tiæ Duces suis maximis in rempublicā me-
ritis, præstantissimisque rebus gestis fuerint
consecuti. Se ad regni defensionem paratissi-
mum, nullumque pro patriæ libertate pericu-
lum esse reformidandum. Pecunias ex suo
æuario, arma ex suo armamentario, militum
copias ex suis oppidis dedisse. Nullum a se
officium prætermisissum, quo boni fideique cli-
entis animus probaretur. Maximè sui nominis
æstimationem dedecere, belli curas cum fœ-
mina partiri. Se manu, & consilio bellicæ ar-
tis inexpertum. Quamplurimos esse in Lusitania viros imperatorijs virtutibus claros,
& rei militaris scientia eminentes, qui in ne-
gotijs laborem, in periculis fortitudinem, in
agendo industriam, in consfciendo, celeritatē,
in*

in prouidendo consilium possent exhibere. Sed
maiori emolumento toti Lusitaniæ futurum,
si pedē ex Villauicosæ oppido nō efferret. At-
que ita omnibus rebus circumspectis, rationi-
busque subductis, nec sibi, nec regno hanc bel-
li curam profuturam. His, & alijs rationum
momentis nihilo in sua sententia immutatur
peruersus animo minister Comes de Oliuares,
imo potius iracundia exardescens, vix in-
clusum inuidiæ liuorem potuit dissimulare,
quin in verba prorumperet acerbitatis ple-
na, affirmans, se post multa rei familiaris
naufragia, cogitare de extinguenda, vel sal-
tem attenuanda gente Brigantina. Et qui-
dem in tanta rerum perturbatione maxi-
mum damnum erat pertimescendum, ni-
si optimi viri Antonij Paez Viegas soler-
tia præsto esset, qui vir miris prudentiæ, &
scientiarū luminibus clarus I O A N N I a
consilio, & a secretis erat. Ab hoc egregio
viro, tum calamo, tum consilio vehemē-
ter laboratum est, ne quid detrimenti Bri-
gantinae genti accideret, aut illius amplitu-
do leuissimè obscuraretur: imo potius tam sa-
pienter, & prudenter se gessit, ut inuidentium

improbis infregerit , & maleuolorum cogitationes debilitauerit . Iam tum vir prudentissimus, in posterum prospiciens , futuros euentus præuidebat, atq; ita fortiter cogitatione accinctus, utpote qui ex initijs rerum exitus metiebatur, dominū suum Ioannem ad regni purpuram summa ope euehere nitebatur. Testis ego auritus meum hac in re proferam luculentū testimonium . Quo enim tempore ob intolerabilium tributorum exactionem populares seditiones Eboræ concitabantur, cum eodem curru ueheremur, & mutuis sermonibus colloqueremur , ego , inquit Antonius , ex hoc populari motu uberrimos nostræ Lusitaniae fructus spero prouenturos: neque meis cæptis acquiescam , donec herus meus Ioannes regno potiatur. Fuit hoc fatale, & prope diuinum viri oraculum , quod mihi usque ad hanc diem fido silentio tectum , ac seruatum fuit .

Regi igitur obstinatè , & pertinaciter imperanti etiam cum magno auctoritatis dispendio parendum erat. Quemadmodum enim nauticæ artis peritissimi, si in nauigando aduersantium ventorum impetu extra suum cursum

cursum trahantur, tempestatibus obsequi solent, & commutato cursu modo huc, modo illuc undarum, & procellæ arbitrio iactantur, postquam tamen secundis ventis utuntur, mox velificatione mutata in portum se recipiunt; talis Dux Ioannes in magna inuidiæ iactatione, temporis, & fortunæ fluctibus cedit, donec popularium animorum aura adspirante, & portum, & sceptrum teneat, afflictâ, oppressamque Lusitaniam in veterem dignitatem, ac libertatem vindicaturus. Regnum senio confectum, sanguine exhaustum, debilitatis, & prope extinctis viribus, non alijs quàm Ioannis humeris indigebat. Nam qualis parentum ætas ingrauescens in optimorum filiorum adolescentia conquiescit: talis Lusitania sub primo Rege Alphonso quingentos iam annos nata, defatigatos, & prope cadauerosos artus ad Ioannis humeros acclinat.

Philippus igitur, qui maximis Brigantiæ gentis meritis cumulatè debuit satisfacere, inuidis, atque obrectatoribus (quibus istud crimen præcipuè imputatum est) plus nimio credens, nihil aliud cogitat, quam illius gentis authoritatem imminuere, & labefa-

flare. Quam suspicionem non mediocriter
augebat popularis rumor, qui per omnes Lu-
sitaniae vrbes passim disseminabat, præcipuos
in Madriti curia Regis ministros ruinam,
& interitum IOANNI Duci machinari, &
toti regno perniciem moliri: alios quidem
liuore tactos, alios maleuolentia suffusos, de
quibus tamen nunquam Ioannes male meri-
tus erat, cuius optimi, & modestissimi mo-
res non hominum inuidiam conflare, sed
amorem poterant conciliare. Has inter in-
uidentium procellas, & tonantis, imo
potius fulminantis liuoris ictus, inconcussa
perstabat Ioannis generositas, frontisque
maiestas, quam ille hæreditariam accepit a
patre suo Theodosio: cui post hominum memo-
riam viro præclarissimo, præter culpam, &
peccatum nihil unquam potuit accidere hor-
ribile, ac pertimescendum. Sic enim facili-
tatem grauitati, sic comitatem seueritati
aspergebat, vt regio eminens supercilio, hu-
manis rebus maior omnes humanos casus
despiceret, neque unquam ullis inuidiæ la-
tratibus perterrefactus, vel mæstitiam ore in-
dicaret, vel aliquem indignationis affectum
expri-

exprimeret.

Multa ad eneruandam Ioannis potentiam quærentur stratagemata: sed dum fragili quærent dentem illidere, solido offendunt. Quauis enim instar mollissimæ ceræ ad sui Regis arbitrium formari, & fingi debeant clientes: semper tamen moderatrix sapientia ita imperijs sit immista, ut neque imperium sit nimis acerbum, neque grauius contumeliosum. Aliter enim iugum detrectatur, & quid quid est violentum, non potest esse diuturnum. Ioannem igitur ab omni ambitionis studio longè remotum, quem Villauicosæ otium, & vitæ tranquillitas maximè delectabat, omni virium contentione a patria auertere studet, ut immodicis sumptibus exhausto ærario, infirmior, atq; imbecillior redderetur; pecuniæ enim sunt nervi maiestatis, quibus illa firmior, ac robustior sustinetur. imo nobilitas sine pecunia ludibrio, & contemptui habetur. In oppido Mōtemor, quod duodecim leucarum intervallo a Villauicosâ disiectum est, per aliquot menses iubetur Ioannes commorari. Ducis aduentus incredibile in oppidanis lætitiâ excitauit: apud quos collata beneficia

nulla unquam obliuione sunt intermoritura. Quotquot enim in mēdicitate, nuditate, viduitate, orbitate laborabant, singularem Ducis beneficentiam experti sunt, cuius liberalitas nullis unquam auaritiæ terminis circumscripta est. Cum verò quidam nobilis oppidanus miram per illos dies bonorum omnium affluentiam, atque vbertatem suo in oppido videret, lepide, ac venuste dixit: habemus in terris Cornucopiam. Ea quippe Brigantinis Ducibus erat maiestas, eaque potentia, vt ad eos ubicumque essent omnium rerum copia abundè conflueret.

At quibus curis, & cogitationibus per illos dies Ioannes intendebat? Nullum ab externis hostibus Lusitaniæ parari, sed sibi vni domesticum, atque intestinum inferri bellum videbat. Non cum hostibus, sed cum inuidia luctandum erat. Hostes, siqui essent, acerrimè coerceret: at inuidiæ ictus suo capiti infestiores qua ratione propulsaret? Omnes cauere, paucis credere, multa dissimulare, improbissimos inuidentium latratus audire, & tamen conticescere, Regi parere, bellorum studia nō interrompere, de sarciniis Lusitanorum
dam-

damnis cogitare, militiæ leges componere, omnia denique egregij Ducis munera fortiter obire. Omnes ex Madriti curia, tanquam ex specula, Ducis facta mirabantur: at quantus erat mirantium, tantus erat invidentium numerus, cum viderent illius facta hominum opinioni respondere, Ducemque a suis amari, & magnipendi. Hic erat præcipuus scopus, quem seriebat inimicorum liuor. Mallent enim, ut Ioannes plurimorum inuidiam sibi conflaret, quàm ut gratiam, & amorem conciliaret. Ille tamen ob singularem animi magnitudinem, nec non ob suam magnificentiam ad altiora natam, ita omnes sibi deuinxit, ut solum Ioannem regni clauo dignum iudicarent. Qua in re non cunctandum, sed magnopere properandum censebant, si populum in hac sententia perstantem Ducis voluntas sequeretur. Verum hæc noui Regis creatio in aliud tēpus diuino cōsilio erat differēda.

Adhuc improbissimi scelerum, & fraudum machinatores suo incepto non desistunt. Nec satis erat una tantum via nocuisse, & Ducis otium interrupisse, sed nouas quotidie nocendi artes inuestigant. Illum interposita Regis

auctoritate, & simulata temporum necessitate, propter novos belli rumores, ad oppidum Almada festinare iubent, quò mari vicinior illos Oceani portus defenderet, atq; ad arcendos inimicorum incursus, in regni limitibus præsidiarios milites constitueret. Fateor quidem esse difficilimū de hominum sensu liquido iudicare, & quid inter amicum, & inimicum intersit, apertè dignoscere. Si tamen ex uno ad aliud liceat facere coniecturam, quis non videt omnes Comitis de Oliuares conatus ad interturbandam Ioannis pacem, vel potius ad perdendum Ioannem fuisse intentos. Ast alius diuinæ providentiæ ordo voluebatur, dum suo laqueo capitur qui laqueum tendebat; & quidquid ad Ioannis perniciem struebatur, redundavit ad gloriam. Quas invidi machinabantur illusiones, erant Ioanni præludia ad triumphum. Quam illi excellentiam attenuare gestiebant, hanc Deus Optimus maximus ad supremæ maiestatis apicem extollere contendebat. Nunc verò miserum Comitē angit dolor, interpungunt curæ, mordet sollicitudo, vexat mentis perturbatio, subit tristissima
amissæ

*amissæ Lusitaniæ recordatio : at Ioannem in
sua iam obtenta , & recuperata hæreditate
sūmum otium, & tranquillitas tenet.*

*Ex Almada (quod oppidū eminentiori lo-
co ad Tagi ripas ex aduerso sitū est) pulcher-
rimam, & florentissimam Olyssipponem, paucis
mensibus interiectis, futurum suæ gloriæ the-
atrum Ioannes spectabat. Ad illam præsagos
oculos intorquebat: illam Lusitanorū Regum
sedem mēte, & cogitatione occupabat: ad illā
totis viribus accingebatur. Cū verò ad Mar-
garitæ Mantuæ principis colloquiū Regis ius-
su accederet, haud facile dictū est, quā illi vo-
luntatem, quod studium , quos plausus bene-
uolentiæ indices præstiterit gens Olyssiponē-
sis. Nunquam profusior lætitia urbem tenuit:
nunquā in ciuibus spectandi ardor fuit festi-
uior, aut studiosior. Ex omnibus plateis turma-
tim volant: feruent cōpita, & angiportus: pro-
miscua senum, puerorū, & fæminarū exami-
na cateruatim cōfluunt, atq; inter applaudē-
tium voces, hæc turbulentæ plebis querimo-
nia audiebatur. Quid adhuc immoramur?
Quis nos retardat? Cur iugū nō excutimus?
Cur illatas nobis a Philippo Rege iniurias*

voluntaria, & culpanda obliuione dissimu-
lamus? Cur grauius lacesciti non aliquando
repungimus? Cur Lusitano nomini inustam
seruit utis maculam non eluimus? Quandiu
acerbissimam tributorum exactiōem patie-
mur? Si Rex Aegypti Ptolomæus ob intolera-
bilia tributa suo regno depulsus, atque ab
Ægyptijs eiectus fuit, cur hanc pestem tandiu
inter nos grassantem patimur? Si morbis se-
nescentibus tum loci mutatio, tum animi re-
laxatio, tum curarum remissio prodesse solet:
en adest Ioannes, qui inueteratum Lusitanæ
morbum sola regni mutatione, & tributorū
remissione, atq; relaxatione depellet. En adest
præmanibus occasio, qua nihil nobis optatius
potuit euenire. Non erit nobis hac in re leui-
tatis, aut insanix fama pertimescenda, quā-
do quidem pro Ioanne ius, & æquitas pugnāt
quibus plerumque victoria comes est. Scimus
omnium Lusitanorum voluntates valde ab-
horrere a Castellānorum moribus, & consue-
tudine. Rex domesticus, & conterraneus no-
bis erit amicior, ac beneuolētior quā extra-
neus. Rumpatur tandē hæc tessera. Pudeat
fœminæ seruire viros ingenuè, & liberaliter
educa

educatos. Sub iustitiæ vexillo nihil nobis
aduersum formidandum. Alienum regnum
non inuadimus, sed nostrum per sexaginta
annos amissum recuperamus. Qui pro iure
certat semper erit impiger ad bellandum.
Gallos, Batauos, & Anglos habebimus com-
mitones, quibus Hispana superbia fuit sem-
per inuisa. Ad militares apparatus satis pe-
cuniarum suppeditabunt, & publicæ, & pri-
uatæ opes: vel si hædesint, ipsa cymbalorum
æra liquefacta ad bellicos bombardarum usus
conuertemus. Hæc nobis erit vel calamitatū
extrema, vel triumphorum prima dies: nec
minor erit occumbentibus, quam vincentibus
gloria.

Hæc erat murmurantis, & mussitantis
plebis clandestina indignatio. Quamplurimi
etiam inclusam mente iracundiam asperio-
ribus, & liberioribus verbis palam euome-
bant. Verum alia temporis opportunitas erat
expectanda, & maturioribus consilijs in re
tam graui erat procedendum. Qui enim præ-
cipitanter, & inconsiderate agunt, suæ teme-
ritati sola pænitentia mederi solent: & ple-
rumque omnis iracundia consilio inimica est:

quo

quo ad negotium tanti ponderis, & momenti
maximè opus erat. Optimus ergo mundi sa-
tor, & gubernator sic Ioannis dignitatem vo-
luit amplificare, ut omnis illa gloriæ, & ho-
noris accessio non humano, sed diuino con-
silio pendere videretur. Quidquid enim a Deo
agitur, cōsultius, & prouidentius agitur. Atq;
adeo cum iam Lusitanorum animi maiori re-
rum desperatione obduruerant, tunc præter
omnium spem, atque opinionem afflictis rebus
præsentior adest medicina. Quod ut liquido
constet, nouas quotidie Lusitanæ genti illa-
tas iniurias attexamus.

Nullum mansueti animi officium, sed po-
tius immitis, atque seueri Lusitanis præsta-
bat Rex Philippus. Nihil illi maiori erat curæ
quam nostri regni vires paulatim imminuere,
atque attenuare, nūc pecunias tributim exi-
gendo, nunc militares copias extra regni fines
amandando, nunc armorum præsidio homi-
nes destituendo, ut exhaustum regnum nullū
haberet suæ defensionis locum, aut subsidium.
Ad Cataluniæ regnum (quod tributorum
pondere fatigatum a Philippo defecerat, at-
que ad libertatis asylum, persugiumque
confu-

confugerat) quotidie mittebantur auxilia-
res copiae ex Lusitanis collectae, quibus ob
itineris longitudinem, & viarum asperita-
tem satis laboriosa erat illa expeditio. Nec
soli tyrones, sed etiam veterani milites
auocabantur, qui ad bellicas excursiones
promptiores, atque expeditiores sunt. Du-
rum tamen, & nimis intolerandum omni-
bus videbatur, nostras ciuitates viris nu-
datas, omni præsidio destitutas relinqui
ut exterarum prouinciarum auxilio con-
suleretur. Quae maior dementia quam alijs
prospicere, & se ipsum deserere? Quae intole-
rabilior insania quam externos populos an-
nonae penuria laborantes suppeditato frumē-
to releuare, domesticis interim fame contabe-
scentibus? Quid asperius, quam meos conciuēs
nudos, & frigore obrigentes aspicere, alios
aduersus aeris inclemētiam vestitus obtegere?
Potior igitur militum pars inuita, & relu-
ctans trahebatur, bellumque extra Lusitaniae
fines, non amore, sed vi, & metu
suscipiebat. Alij fugam arripiebant; alij
syluis inclusi, & inter montium lati-
bula diu abdebantur; alij per occultiores
trami-

*tramites, & loca saltuosa in patriam reuertebantur. Quauis enim fugæ vitium rusticis, ac tyronibus familiare, ab urbanis, & veteranis hominibus sit plerumque alienum; ego sanè istam fugam non indecoram, aut inhonestam puto; neque enim timor, sed patriæ amor dabat alas ad fugiendum. Nescit time-
re Lusitanus miles: imo is inter nos creditur gloriosior, qui vulneribus confossus cadit, quam qui integer, & incolumis ex acie reuertitur.*

Ex hoc tam acerbo Regis imperio ingens luctus totum regnum occupauerat. Neque solis gregarijs militibus permolesta erat illa expeditio, sed ipsi etiam duces, ac milites electissimi satis ægrè, & peracerbè ferebant, extra patriæ limites pro liberis, pro fortunis, pro vxoribus, pro externorum hominum laribus decertare. Quia vero nullus est tam felix, ad quem non deueniat aliquando sua portio in-jelicitatis, omnes in Lusitania Duces, Marchiones, Comites, ac Dynastæ ad Cataluniæ arma vocabantur, neque ulli quauis excelso, & præcellenti viro Regis iussa parcebant. Sed cum, magistra, ac duce natura, soleat euenire,

ut omnes etiam fortissimi viri in subitis, atq;
inopinatis rerum euentibus perturbentur, in-
credibile dictu est, quanta animorum pertur-
batio omnes peruasit. Videres nobilissimos
viros ancipiti cogitatione distractos nunc hæ-
rere, nunc titubare, nunc resistere, nunc crebris
literis Regis voluntatem sollicitare, nunc alias
atque alias excusationes prætexere, quibus
Regis aures obstinatiores, ac difficiliorese
quotidie præbebant. Quid facerent exulcera-
tæ Lusitanorum mentes, dum maleuolum Co-
mitis de Oliuares ingenium deterius in dies
fieri viderent? Non erat locus cum illo expo-
stulandi, erat tamē locus dissimulandi, ne inter
maledicas obrectatorum linguas aliqua da-
retur accusationis occasio. Verum si calamitas
solet esse virtutis, ac fortitudinis theatrum,
quis non videt in illo calamitatis camino tā-
quam in theatro, Lusitanæ fortitudinis aurū
clarius enituisse.

Hos inter factionum, & discordiarum flu-
ctus, quid faceret Ioannes Brigantiæ Dux?
Quemadmodum in subito exorta tempestate
turbantur nautæ, alij que per foros cursant,
alij malos scandunt, alij antennis obuertunt,
alij

alij vela contrahunt, alij nauem exonerant,
alij sentinam exhauriunt, solus tamen guber-
nator animi, & consilij nunquam inops, in
ipsa periculi magnitudine clauo immotus
hæret, & gubernaculum ne puncto quidem
temporis amittit, ita Ioannes, perterritis cæ-
teris, non terretur, imo potius ob excelsam ge-
nerositatem, omni casu maior, & supra om-
nem fortunam elatior, neque animo, neque
consilio destitutus, ad omnem fortunæ aleam
accingitur, iamque spe, & cogitatione regni
clauum præsumit. Comitum de Oliuares faci-
lem ad suscipiendas, difficilem ad deponendas
inimicitias, & nonnulla in Brigantinos Du-
ces maleuolentia suffusum agnoscebant Lu-
sitani; neque hominis versutia, & dolosa cal-
liditas Ioannem latebat, quem præcipue pe-
tebant illæ machinationes. Brigantinæ gentis
amplitudinem non leuiter obscurandam cre-
debat, si Dux IOANNES ex lusitaniæ fini-
bus pedem efferret. Hac enim ratione expensis
immodico sumptu pecunijs, potentiæ vires
amitteret non ita facile reuocandas. Eundē
in Madriti curia ad Regis imperium commo-
rantem a pristino maiestatis splendore deiciē-
dum

dum putabat: & qui reliquos Hispaniæ Du-
ces longissimo dignitatis, auctoritatis, & po-
tentiae interuallo superabat, nullo discrimine
agendum; atq; ita viri excellentiam paula-
tim deprimentam. Ad hanc spem totis viri-
bus, & summa contētionē nitebatur improbi-
ssimi sycophantæ calliditas. Cum enim in vno
Ioanne totius regni salus inniteretur, cū Io-
annis interitu totum regnum interiturum
credebat. Imo sicut vinum capiti primo insi-
diatur, ita invidentis Comitis liuor primò
ad Ioannem tendit tāquā ad caput, mox totā
Lusitaniam cum miserāda ruina perditurus.

Haecenus miserandam Lusitaniae captiui-
tatem, imo potius Lusitaniam sub Philippi iue-
go ærumnis deformatam vidimus: neque fuit
fastidiosum singula minutatim scribere. Vt ve-
rò omnia sub vnū veniant aspectum, nō qui-
dem vanus, aut temerarius ausim affirmare,
hanc satis perniciosam mali regiminis luem
æquē in sacris, atque in ciuilibus fuisse gras-
satam. Vidimus enim Ecclesiasticas sanctiones
pro cōtēptu haberi: Sūmi Pōtificis auctori-
tati, & celsitudini derogari homines moribus
corruptissimos magni pendere viros sapientia,

Et virtutibus eximios nullo pretio haberi:
Episcopales dignitates venum exponi: in or-
borum scrinijs depositas pecunias emungi:
census pro animarum expiatione ad Missarū
solemnia designatos crudeliter absumi: Eccle-
siarum pastores cum maximo ovium detri-
mento ad ciuiliū rerum curam a suis Se-
dibus auocari: iusiurandū, immunitates, reli-
gionem, viros Deo sacros violari. Hæc in sa-
cris. Quid non temeratum, quid non violatum
in ciuilibus? Vidimus totam Lusitaniam im-
māni tributorum pondere laborare: ad pro-
pulsandas hostium incursiones nullas classes
parari: nostrum mare prædonibus, vias latro-
cinijs infestari: tam publicas, quā priuatas
opes Madritū asportari: Dynastas, Comites,
Marchiones, Duces non ad defensionem,
sed ad regni euerſionem auocari: cum nostris
militibus sæuam carnificinam exerceri: ho-
mines peregrinos, contra regni consuetudinē,
honoribus, & dignitatibus extolli: Comendas,
magistratus, & equestriū ordinum insignia in
famibus dari: omnia denique pessum ferri.
Quorsum plura enumerem? Mitto alia genti
nostræ illata dedecora. Mitto ardentissimas
odij

odij faces , quo Comitris de Oliuares pectus
perfidiosum in Brigantinos Duces æstuabat.
Non tamen prætermittam rem omni fide
maiores.

Odoardu: serenissimi Theodosij filius, &
nostri Regis Ioannis germanus frater, quem
domi, & militiæ clarum quamplurima testā-
tur argumēta (hic enim ob eximias animido-
tes, & præstantissima oris lineamenta, ab ipsa
natura sceptro natus, & imperio compositus
videtur) nescio quo adductus consilio, vel
quo fatali astro impulsus, non viarum aspe-
ritate, non odiosa nauigandi difficultate, non
hiberni cæli inclementia deterritus, Germa-
niæ fines contendit, vt sub Imperatoris Fer-
dinandi signis suæ iuuētutis robur inter au-
læ delicias non molliter educatum, Martijs
studijs, & militiæ laboribus exerceret. Ma-
driti curiam ingreditur, & per internuntios
Comitem de Oliuares de suo aduentu certum
facit, vt illius interposita auctoritate ad Re-
giæ manus osculum accederet: neq; sine Regis
mutu tam nouam, atque inusitatam Briganti-
ni æ genti expeditionem susciperet. Optimum,
& sanum ratus, si nihil cliens sine sui Regis

ductu moliretur. Rei nouitate perculsus Comes
primò obstupuit, sed mox homo cerebrosus, &
suis cōsilijs semper obstinatè hærens, nunc dif-
ferendo, nunc procrastinando, nūc aliam, atq;
aliam excusationē prætendendo, neq; ad suū,
neq; ad Regis colloquium Odoardum admit-
tit, imo illum insalutatū abire sinit. Nō potuit
non concipere iracundiam animus generosus,
caute tamen est dissimulatum doloris vulnus.
Viri enim principes, ubi non datur vindictæ
locus, prudēter dissimulant, sed iniuriæ obli-
uionem difficile capiunt. Ergo Odoardus viæ
accinctus Viennam Austriæ metropolim ve-
nit. Interea Hispani cauillatores, eò deueniūt
impudētiae, vt Imperatoris aures mille in
Odoardū mendaciter dictis onerauerint, quò
illis cauillationibus Imperatoris animus ab
Odoardi amore auerteretur. Hæret in delibe-
rando Imperator, donec prudentiori consilio
victus, & Hispanorū accusationes nihili faciēs
Odoardum perquā benigne excipit, ac paucis
mensibus interiectis eundem militiæ præficit.

Incredibile memoratu est, quantū præsidij,
& ornāmēti rei militari cū Odoardo acceffe-
rit. Nullus erat ad pericula capeſſenda auda-

cior: nullus inter ipsa pericula cōstantior: nullus famis, sitis, algoris patiētior: nullus in explorādis inimicorū consilijs vigilantior: nullus in eludenda calliditate sagacior: nullus in accendendis militū animis alacrior: nullus deniq; tū bellicis, tū imperatorijs virtutibus instructior. Verum (ó fallax, & insidiosum hominū pectus!) quid pro maximis, & singularibus meritis excellentissimo viro præstitū est? Quæ fuit laborum, & vigiliarū merces? Quæ laurea ex tot victorijs reportata? Pro lauro vincula, pro triumpho datur carcer, & custodia, quā per sūmum scelus detinetur vir præstantissimus, ipsa terrarū orbe impatienter reclamāte, & periniq; ferēte hominem innocuū illo supplicio affici, quod in solos flagitiosos constitutum est. Latissimus hoc loco aperiebatur cāpus, in quo posset meus calamus spatiari, imo potius increpare Hispanæ gētis odiū inueteratū aduersus familiam Brigantinam. Verum ubi res ferro agitur, linguis parcēdū est. Pro calamo loquatur gladius, sanguis pro atramento, cāpus Martius pro papyro. Nos ad inceptū redeamus, & quō vocat dulcissimus libertatis fructus eodē scribēdi ardore festinemus.

ARGUMENTVM

In Librum Quartum.

Præclarum facinus Lusitanorum vnanimi coniuratione ad libertatem patriæ conspirantium. Occiditur Michael de Vazconcellos, qui Regi Philippo erat a secretis. Ioannes Brigantiæ Dux acclamatur Rex Lusitaniæ. Margaritæ auctoritas nihil valet ad sedandam popularem concitationem. Christi crucifixi effigies manum dexteram clauo affixam refigit. Varia memorantur prodigia, quæ per hosce annos nostram libertatē prædixerunt.

LIBER QVARTVS



HÆC fuit ærumnarum assiduitas, hæc incredibilis congeries, malorumq; omnium redundatio, quæ in dies grauius, atque acerbius Lusitanorum animos vulnerabat.

Immota tamen, diuque inconcussa stetit patientia, quam sæpissimè accendit, & stimulauit, sed nunquam superauit impatiens furor. At postquam immenso laborum cumulo ipsa tolerantia obrui visa est, neque iam dissimulatione, vel taciturnitate potuit celari dolor, non sola iuuenum ferocitas, sed etiam senum grauitas, & puerorum infirmitas libertatis desiderio, & studio accenduntur. Quod sane studium neque iniucundum, neque fuit infructuo-

fructuosum, imo res, & feliciter tentata, &
felicissimè est absoluta. Quauis enim per se-
xaginta captiuitatis annos, is esset Lusitano-
rum languor, eaque desidia, ut vel in nulla,
vel in tenui laudis, & gloriæ cupiditate ver-
sarentur: postquam tamen se nimis grauitè,
& nimis inhumanè tributis vexari, & Ca-
stellanæ genti ludibrio esse intellexerunt, tē-
poris iniquitati obsistere statuunt, & rebus
iam desperatis, fortunæ cursum aut interrū-
pere, aut penitus inhibere. Quis enim æquo,
imo potius non iniquo animo ferret, longè la-
teque dispersum, ac diffusum Lusitanorum
nomen quotidie imminui, obscurari, sepeliri?
Quis non acerbè doleret, tantum oneris Lu-
sitanorum humeris quotidie esse iniunctū, ac
si non ingenui, sed libertini essent? Quis non
ægrè pateretur homines honesta in familia
institutos, & satis ingenuè educatos, instar
seruorū durissimis agi, & exerceri imperijs,
quæ non solum liberæ, sed ipsi etiam seruili
conditioni possent esse fastidiosa? Cum igitur
hic morbus in dies ingrauesceret, & maioris
damni, ac periculi metus regno quotidie inij-
ceretur, quid facerent homines remedij ino-

pes, qui omnes suas fortunas in extremo sitas
esse intelligebant. Instar esurientis lupi inhi-
ant libertatem: ardent honestissima excutien-
di iugum cupiditate: quærunt socios, & admi-
nistros suorum consiliorum: omnes moras, &
difficultates abrumpunt: in consilio delibera-
tionem, & in deliberatione consilium ineunt:
temporis, & horæ quæritur opportunitas: in
repentino, atq; inopinato facto desideratur ce-
leritas. Quâvis enim qui properantius per-
git, præceps plerumq; ruat, & nimia festina-
tione periculum emat, prudentis tamen viri
est, ubi consuluerit, factum maturare, ne per
interpositas moras agendi ardor intepe scat,
& pro acrimonia desidia obrepat.

Multi igitur, quos vita innocentissimè
acta non mediocriter commendabat, se Deo, &
reipublicæ gratum facturos existimant, si Lu-
sitaniâ periculis circumuentam, seruitute
pressam, laboribus obsessam, à periculo liberet,
à seruitute eximant, à labore vendicent. Tâ-
tum si perpetrent facinus, credunt nulla apud
omnem posteritatem obliuione obscurandum,
imo omnem nepotum, ac pronepotum seriem
patriæ liberatores æneis laminis incisos ad
æter-

æternitatis monumentum conseruaturam.
Omnium nomina libens hæc pagina exciperet, nullusque inhonoratus, ac sine mentione à me transmitteretur, ni prudentioris operæ pretium ducerem, in magna hominum multitudine à singulorum nominibus sigillatim referendis abstinere: credens illos magis silentio, quàm scripto commendari. Illud vnum audacter dicam, primæ nobilitatis viros, quorum auctoritas plurimum in vrbe pollebat, quorum amor popularibus acceptus, quorum robur militare omnibus notum, quorum splendor, ac generis decus erat eximium non auaritia, aut ambitione præcipites, sed solo patriæ amore ductos, unanimi consensu, & diuina conspiratione ad noui Regis creationem conuenisse, fide, & fortitudine pares, ætate tamen dispares. Alios senilis maturitas, alios iuuenilis firmitas, alios primæ adolescentiæ ornabat decor, & concinnitas, ut in tam præclaro facinore prudentia simul, & temeritas emerent. Si enim soli iuuenes conspirarent, præceps æstuantis ætatis feruor ac eufari, atque insimulari posset. Si soli senes conuenirent, multum deesset ardoris,

Et in medijs conatibus senio trementes manus frigerent. Vtrumque ergo ad tam insigne facinus, Et senum prudentia, Et iuvenū audacia debuit commisceri, ne consilium sine fortitudine, vel fortitudo rueret sine consilio.

Egregiam hac in re nauavit operam Antonius Paez Viegas, qui tum temporis Ioanni erat à secretis: cuius viri eximias animi dotes iam supra memorauimus. Nec præmittendus Ioannes Pinto Ribeiro, qui Olyssipone Brigatinæ gentis res agebat, vir ingenio pollens, flagitiorum impatiens, in agendo acerrimus, veri, Et æqui seruantissimus, cuius consilio, Et auctoritate quidquid hac in re arduum erat, feliciter tentatum, Et felicissimè est absolutum. Hi duo viri modo per colloquia, modo per clancularias epistolas Ioānis voluntatem à regnandi cupiditate non auersam solum, sed etiam abhorrentem ita inflexerunt, ut totius Lusitaniæ votis non potuerit refragari, Et quanuis illi fixum, destinatumque esset, non suscipere imperium, suscepit tamen non priuatæ, sed publicæ utilitati inseruiens. Cum igitur ad tam præclarum facinus perficiendum sola Ducis voluntas desideraretur hæc

hæc ubi primum innotuit, omnes excutuntur moræ, dextris que datis in fidei argumentum, dies præscribitur a coniuratis, in qua susceptum consilium erat maturandum. Non sortitò, aut fortuitò, sed Dei prouidentia factū credo, ut prima dies Decembris tam eximio facinori eligeretur, in qua illud Pauli Apostoli ad Romanos in Ecclesiastico officio recitabatur, fratres hora est iam nos de somno surgere. Qui enim miserrimæ seruitutis sono profunde immergi, imo potius lethali ueterno deuincti tenebamur, iam tandem libertatis studio experrecti rempublicam recuperamus. Inter coniuratos mirum est quàm obstinate actum sit silentium, & quàm inuiolatè steterit Sacramentum. Filius non patri, non matri fidere: pater rem tanti momenti filios celare: amicus amico nihil detegere: coniux coniugi nihil innuere: omnes immutato vultu rem dissimulare: nec tamen à publicis, aut priuatis colloquijs discedere. Sed quia inculpata conscientia nunquam timet, imo in rebus dubijs solet esse audacior, nihil prius habent quàm per confessionis Sacramentum crimina expiare, & se diuini corporis conui-
uio

uio ad congressum reddere munitiores. & audientiores.

Erat ea tempestate Regi Philippo à secretis Michael de Vazconcellos, qui maxima animi intemperie elatus, & secundarum rerum euentu supra humanum modum intumescens, neque suis, sed fortunæ decoratus insignibus, multa simulatè, multa fallaciter, multa insidiosè machinabatur, vt regno exitium maturaret. Hic tributorum diligentissimus inquisitor, & inuestigator, plagam insanam, atque mortiferam iam iam ruent i patriæ infligebat, neque publicis, sed priuatis commodis inseruiens, solo auaritiæ, cupiditatis, & ambitionis insatiabili studio accendebatur. Erat præterea viro satis durum, & inflexibile ingenium, tam nobilebus, quàm ignobilibus infociabile. Verba inurbana, nihil habentia comutatis, plurimum feritatis: atque ob id plebi inuisus, nobilitati insensus, omnibus infestus habebatur. Vt verò suæ nequitiae adiutorem, suæ cupiditatis fautorem, suorum consiliorum administrum, & socium haberet, duplici affinitatis vinculo sibi coniunxerat Iacobum Soares in Madri-

ti curia secretarium , cui primo sororem , &
post huius decessum , filiam uxorem dederat.
Hunc Iacobum honesto loco natum scimus,
sagaci, callidoque ingenio; insatiabili pecu-
niarum, & honorum siti; suis affinibus, &
consanguineis addictissimum; patriæ suæ ho-
stem perniciosissimum , qui illam novis tri-
butorum oneribus afflictam grauius in dies
opprimebat . Erat denique homo non in re-
ctum, sed in peruersum solers, apud quem nul-
lus erat iustitiæ, probitati, & æquitati locus,
sed suis tantum lucris auidissimè intendebat.
Hunc sibi comitem , hunc egregium menda-
ciorum, & flagitiorū artificem affinitatis nodo
illigauerat Vazconcellos , ut inter se pacis, ac
belli curas partirentur , & hoc duplici car-
dine ingens regni machina uolueretur . At-
que ita hinc socer , inde gener ad improbi-
tatem vnanimis , ad regni perniciem con-
cordes ; ad sua emolumenta vigilantes , his,
& alijs artibus nostram Lusitaniam per-
ditum ibant . Cum enim Iacobus vel cal-
liditate , vel muneribus , vel blanditijs ,
vel assentationibus (quæ sunt aulicorum ar-
tes) in Comitis de Oliuaes amicitiam ,
& con-

Et consuetudinem se penitus insinuasset, atq;
immersisset, ad illius nutum, Et abnutum sta-
bant omnia. Quod quidem infortunium satis
miserandum erat, Et toti regno dedecori ver-
tebatur. Neque immerito ex Platonis, siue ex
Socratis oraculo dictum fertur, tunc regnum
aliquod funditus interiturum, Et penitus
esse inuertendū, cum æs, Et ferrum ad illius
regimen, Et custodiam fuerit deputatum. Hoc
est, cum homines consilio, prudentia, optimis
moribus destituti, atque omni virtutis præsti-
dio nudati, quorum ingenium sit æreum, vel
ferreum, alicuius reipublicæ gubernacula
tractanda susceperint, tunc illam ad omnium
ærumnarum Syrtes, ad omnium calamitatū
scopulos miserando naufragio allidendam.
Infelix regnum ubi tot ingenia verè aurea
ex ferreo, vel æreo ingenio vitæ legem, Et nor-
mam accipiunt! Infelix regnum ubi tot sapiē-
tes homines ex insipientium consilio pendent!
Nos diu sapienter tulimus, quidquid ab illis
insipienter statutū fuit. Sed tam insolens, atq;
intemperatus rerum cursus erat aliquando
inhibendus.

His consiliarijs stabat, imo potius cadebat
res

*res Lusitana. His consiliarijs, imo potius his
mercatoribus, & venditoribus erat in Ma-
driti curia iuris, & fortunarum nundinatio.
Sed quia flagitiosus animus inquietudinem
parit, utrumque pungebat malefactorum suo-
rum conscientia, & in media prosperitate
ruinam timebant. Nemini fidere. Juis rebus
consulere, suos propinquos, & familiares ad
omnes honoris gradus euehere, omnia
reipublicæ munia venalia exponere, nul-
lam inuictu, in cultu corporis, in sectandis
voluptatibus continentiam seruare, publicum
æarium exugere, Ecclesiasticas dignitates
immerentibus distribuere, homines infamiæ
labe respersos equestri ordini adscribere, pacē
denique, & militiam pro suo arbitrio mode-
rari. Illos ad eam insaniam adegerat insatia-
bilis cupiditas, ut se ipso Rege maiores, & po-
tentiores crederent, & nemini parere scirent,
indigni qui alijs imperarent. Verum hæc for-
tunæ incrementa erant aliquando minuēda,
cum nemo sit tam felix, qui omnem suam æta-
tem ducat à malis omnibus inoffensam. Solet
præterea humana felicitas tantum nebulae, &
caliginis mortalium mentibus infundere, ut
neque*

neque districtum enssem ceruici impendentem
videant, neque imminentem supplicij graui-
tatem agnoscant, neque præsentis infortunij
periculum sentiant. Illos non latebant turbu-
lentæ plebis clamores, & impatientes queri-
monia. Nouerant popularem concitationem
grauissimis tributorum oneribus reluctantem.
Audierant indignantis nobilitatis voces. Vi-
derant totum regnum sæpissimè commotum,
atque insedatum: & tamen scopulis surdior-
es in suum damnum præcipites ruunt. Ita
profectò ineluctabilis fatorum vis quorum for-
tunam mutare constituit, consilia corrumpit.

Cælesti igitur instinctu, diuinoque afflatu
concordes Lusitani adsunt ad præstitutam
diem, qua nulla vnquam felicior, aut fortuna-
tior Lusitaniæ illuxit, nulla vero Michaeli
de Vasconcellos infelicior, nulla acerbior, nul-
la luctuosior. Quæ enim mortuam Lusitaniam
suscitauit, hæc viuente, & florentem Michaelē
extinxit. Iulio Cæsari Idus Martiæ fuerunt
exitiales, cum se coniuratorum manu circum-
uentum, & strictis pugionibus adpetitum ani-
maduertit; at Michaeli kalendæ Decembris
lethales, & lugubres fuerunt, cum se ex sūmo
feli-

felicitatis cumulo ad infelicitates, & infortu-
nia depressum vidit. Illa dies mensi prima,
fuit ultima Michaeli. Ad Kalēdas igitur De-
cembris, ad nonam horam matutinam tam
præclaro facinori præscriptam, omnes qui ad
patriæ libertatem conspirauerant, cum armis
præsto sunt, ut dato signo ad suum quisq;
locum occupandum acceleret. Adsunt duces
veterani, adsunt milites bello fortissimi, adest
Lusitanorum iuventus armis cincta, mori,
aut vincere parata. Omnes uti docti erant
cū armis introducūtur; tumultuaria in aulā
fit irruptio: omnia miscentur strepitu: scrutā-
tur loca abdita: effringunt clausa: Michaeli ⁿ
armarij latibulo, ad quod pavidus profuge-
rat, reperitur: in primo armatorum hominum
conspectu timet, turbatur, expallescit, & ex
sceleris sui conscientia rebus suis diffidit: infe-
stis animis, ac telis petitur homo infestissimus:
qua gladijs, qua pugionibus miserum corpus
confoditur, & iam exanime de fenestra ad ter-
ram præcipitatur, ubi insultantis plebis lu-
dibrio, & puerorum irrisiōibus expositū, bi-
duo iacuit inhumatū. Nec fuit satis præte-
reuntiū pedibus informe cadauer proculcari,
sed alia sædior deformitas I ex

*ex truncis naribus, & præcisīs auribus adde-
batur. Ad hoc tam funebre spectaculum, in
vultu, atque oculis spectantium nullum ap-
parebat mæroris signum, imo omnes risu, si-
bilo, plausuque incredibili mortuo insultabāt.
Nihil erat quod diem illam lætissimam fune-
staret, quin potius effusior voluptas ad sen-
sus cum suauitate illabi videbatur, quoties
vox illa repetita aures demulcebat: Viuat
Rex Ioannes, viuat patriæ vindex, viuat
nostræ libertatis assertor. & seruator. Nul-
lus erat qui occiso Michaeli illacrymaret,
multi aderant, qui exprobrarēt, multi qui ia-
ctarent conuicia, multi qui illum superbiæ,
& ambitionis hac voce insimularent. Ito ho-
minum superbissimè, & quem præ nimia in-
solentia vix tota ciuitas, imo vix totum re-
gnum capiebat, exiguus terræ pugillus nunc
excipiet. I tuæ patriæ pestis, & flagellum: de-
sine probos, & benemeritos viros tuis turpi-
ter dictis, & turpissimè factis insectari. I sce-
lestissime, improbissime, audacissime Catilina,
quo nullus crudelior, nullus inhumanior, nul-
lus patriæ fuit insidiosior. I qui tuo scelerato
consilio tam fæde, atque inhonestè rempubli-
cam*

eam administrabas. I qui immerentes homi-
nes nunc vinculis, nunc verberibus, nunc iniu-
roso ad triremes supplicio abrasa barba ex-
cruciabas. I cuius insaturabile abdomen nul-
lis comeſſationibus, nullis ebrietatibus, nullis
gulæ iritamentis explebatur. Cecidit, ce-
cidit Babylon illa magna. Sed ne inſepul-
tum cadauer teterrimo odore auras inſiceret,
aut á canibus diſcerperetur, aliquod huma-
nitatis officium erat exhibendum, neque viro
catholico ſepulturæ locus denegandus. Qua-
propter eodem feretro, quo mendicantium cor-
pora ad tumulandum efferri ſolent, nulla fu-
neris pompa deportatum, atque humatum eſt.

Hanc iuſauſtam Michaelis mortem inſau-
ſta, & funeſta ſigna portenderunt. Monitus
enim ab amicis (qui magis hominis fortunã
quam ipſum hominem amabant, erat quippe
inamabilis) vt ſibi præcaueret, cui fatum ine-
luctabile iam imminebat, ipſe ad petulans, &
illiberale iocandi genus á natura compoſitus,
ſolo riſu, & ſibilo ſalutares amicorum moni-
tiones excipiebat. Quis, inquit, eò amentię,
atque audacię deueniet, vt tantum, & tam
excellenter virum ferro audeat contingere?

Quis nostram dignitatem à Rege secundam
violabit? O cæcam, & improuidam hominis
mentem, imo potius furiosi, & vinolenti ho-
minis somnia! Præstantissimi duces, Reges, Im-
peratores ferro incauti, & improuisi occubue-
runt, tu vilis homuncio hac tua personata
auctoritate coniuratorum manus deterrebis,
furorem retardabis, mucronum aciem hebeta-
bis? O caput vel cerebro vacuum, vel ellebo-
ro dignum! Iacet profecto iacet tuum ventri-
cosum corpus, quo nullum vixit sædus, nullū
inquinatius, nullum scelestius. Neque illud si-
lentio est obtegendum, quod nonnulli oculati
testes iureiurando testificati sunt. Eadem sci-
licet hora qua fuit occisus, in ipsius palatij cul-
minibus feræ aues visas esse bubonibus, &
vespertilionibus similes, quarum lugubris co-
lor, funebrisque aspectus intuentium animis
mærorem insinuabat. Aues igitur infauisti-
mæ, aues dirum, ac ferale omen, quæ ob nimiam
oculorum debilitatem non possunt non ad il-
lud clarissimum iubar conuolare, merito atq;
optimo iure adstant ad hominis funus, qui nū-
quam rectis, atque irretortis oculis iustitiæ,
veritatis. & æquitatis Solem est intuitus.

Claros

Claros profecto viros è vita decedentes clara
insequuntur præſagia, qualia Matthiæ Cor-
uini Hungarorum Regis obitum portenta
prædixere. Nam Leones qui Budæ detineban-
tur, eodem quo Rex die interierunt. At virum
moribus obscurum, & in omnibus vitæ suæ
partibus sordidum, immoderatum, atque in-
temperantem nonniſi funereæ, & luctuoſæ
aues occaſurum portendunt.

Sed mittamus hoc noſtræ ætatis monſtrū
tumulo pariter, & obliuione conſepultum. Ve-
ſtram audaciam, o Luſitani, non poſſum non
qua laudatione dignam venerari, qua venia
indignam arguere. Vobis in hoc laus eſt tribuē-
da, quod viriliter egiftis, hominem ſlagitia-
ſſimum occidendo, in hoc verò non danda ve-
nia, quod aliquos ſuperſtites reliquiſtis, de
quorum fide ſiniſtram opinionem plebs omnis
altè imbiberat, & quos poſtea regni tradito-
res, & proditores experimento didiciſtis.
O utinam illorum ſanguine gladij imbue-
rentur, illaque pernicioſiſſima ſcintilla tunc
cum decuit extingueretur, quæ ſi in ſuo or-
tu eſſet compreſſa, magnum poſtea incen-
dium ad regni conflagrationem nō excitaret.

Vestrum factum ô Lusitani foret æquè laudabile, atque imitabile, si eodem die, & eodem temporis puncto, illos omnes quos turbulenta plebs clamore, & minis insequeretur, tanquã læsæ, aut lædendæ maiestatis reos, & tanquã in patriam suspectos, eodem mucrone perimeretis. An credebatis illos, qui virtutis insignia sine virtute assecuti fuerant, & cum maxima indignitate ad dignitates ascenderant, posse in Regem æqui, & iusti seruantissimum consentire? Quæ improbitatis ad probitatem collatio? Quæ iustitiæ ad iustitiam similitudo? An credebatis conflatam ex longo inuidiam subito esse commutandam in amorem? Vtinã ex hominum numero expungerentur illi homines, imo potius immanes belluæ, quorum sæuitia, atq; immanitas eò fuit detestabilior, quo mitior, & clementior est nostri Regis indoles, cereumque ingenium, ad cuius conspectum ipsa etiam domari immanitas, ipsa barbaries poterit mansuescieri.

Cum verò repentina, atque inopinata grauiora plerumque sint, non potuit non serenissima Margarita Mâtuxæ princeps, & Sabaudæ Ducis filia, quæ regno assidebat gubernatrix

natrix, ad tam subitum, & tam insperatum
rerum euentum grauitè expauescere, pertur-
bari, expallescere. Verum quo quisque est ge-
nerosior, eò placabiliores habet animi motus.
Illa quidem primò excanduit rei nouitate
perculsa, sed mox ad tranquilliorè mentis
statum reuersa, quid, inquit, ó Lusitani sibi
vult hæc popularis concitatio? Quid fert hæc
inuitata seditio? Hæc est Lusitanorum erga
suos Reges perspecta fides? Parcite, parcite ó
Lusitani, ferrum condite, armis abstinete, iras
comprimite; satis superq; sæuitum est in uni-
us hominis nocuum caput. Quas meruit pæ-
nas luit Regis minister toti regno infestus, at-
que inuisus. Ego Philippi Regis iram demul-
cebo: ego eum vobis placatum, & conciliatum
dabo: est enim Regibus ab ipsa natura insitus,
atque ingeneratus amor in clientes. Commu-
nis hic error causas habuit honestissimas.
Quidquid fortiter, at insipienter deliquistis,
prudenter ignoscet Rex: ipsaque meam adiū-
gam operam, & omnem interponam auctori-
tatem, vt quidquid in exoranda venia ne-
gotij est, commodissime conficiatur. Ita illa.

Sed nihil valuit fæminæ auctoritas cōtra

vim concitatæ multitudinis. Clamant omnes,
& vociferantur, hæc nobis dies initium erit
libertatis: viuat Rex Ioannes: nullam à Phi-
lippo neque petimus, neque optamus veniam:
& nostrum hoc factum nulla vnquam se-
quetur pænitentia. Pro Ioanne decertabimus,
pro Ioanne in capitis periculū veniemus, pro
Ioanne omnes corporis cruciatus perferemus,
d | pro Ioanne in dubiam Martis aleam abduce-
mur, imo in ipsa extrema spe salutis tantam
virtutem præstabimus, ut cadentibus, & ia-
centibus commilitonibus ipsi impauidi insi-
stamus, atque ex sociorum cadaueribus gra-
dus ad pugnam, & ad victoriam faciamus.
Reuixit pristina Lusitanorum virtus. reuixit
militaris vigor, reuixit ille spiritus imperter-
ritus cui ferrum, & fatum parent, & quem
sibi exteræ nationes non ad æmulandum tã-
tum, sed ad imitandum proponebant. Iam Ca-
stelle iugum abieciimus. Iam non Iberos ti-
mebimus, quibus olim eramus terrori. Iam nō
Mauros metuemus, quibus olim eramus for-
midabiles. Iam non Turcarum genti erimus
ludibrio, quibus olim illudebamus. Si enim
recens natum regnum in ipsis cunabulis hy-
dros

dros comprimit , quid faciet ætate iam adultum.

Ad primam noui Regis acclamationem videres omnium animos excitatos, atque inflammatos ad regni defensionem emicare, oblatam occasionem arripere, confusâ senum, iuuenum, puerorum multitudinem per vicos, per compita, per plateas turmatim volare; omnes cæteruatim, vti quosque fors conglobauerat, in Archiepiscopi Roderici domum cōcurrere, qui ob insignem pietatem, modestiam, religionem, prudentiam, sapientiam, generis splendorem, tam plebi, quam nobilitati acceptissimus, tot, & tam præclaris viris petentibus nō refragatur, non obsistit, non contradicit. Hoc salutari remedio iam iam cadenti Lusitaniæ satis prouisum, & consultum credit, illud proferens Davidicum eloquium: à domino factum est istud, & est mirabile in oculis nostris. Præsul igitur magna vtriusque ordinis hominum multitudine stipatus in maiorem Ecclesiam descendit, grates Deo soluturus, qui exanguis, & pene exhausto regno manum dedit, rebusque afflictis insperatam opem tulit.

Quas

Quas ibi voces voluptatis plenas, quas lacrymas ex lætitia obortas, quæ suspiria singulibus interrupta, quos plausus exultationis indices circumstantium oculis, ore, vultibus vidimus prominere. Hæc est illa ætas aurea; hæc sunt regna Saturnia; hæc bene ominata dies; hic feliciter auspicatus annus. Nunc pileati Lusitani tota urbe discurrant, qualis plebs Romana, Nerone vulneribus confosso, pileos libertatis insigne læta circumtulit. Nunc insolitum, atque einusitatum plaudendi genus, tubarum clangor, cymbalorum tinnitus, organorum concentus audiat, qualis olim à populo Israelitico auditus fuit, cum interfecta impijssima Athalia, regnavit Ioas filius Ochoziæ.

In maximo virorum conuentu, & circumfluentis populi concione, semel atque iterum exclamat Pontifex Rodericus: Viuat Brigantiæ Dux: viuat IOANNES hoc nomine quartus, Lusitaniæ Rex. O insperatum, neque opinatum gaudium! Ad hanc vocem tota urbis facies miro tripudio exultabat: lætabantur ciues: electissimæ virgines ad fenestras, ad ianuas, ad portarum limina prodibant in
comptæ

*comptæ: matres ad spectaculum sistebant inor-
natæ: opificum opera pendebāt interrupta: ipsi
parietes ridere, ipsa mænia gestire videban-
tur. Alij qua stupore, qua lætitia perculsi, non
vigilare, sed se nocturnis delusos imaginibus
somnia credebant. Id tamen non somnium,
sed insomnium probavit felicissimus rerum
euentus. Illi verè somniabunt, imo potius ina-
ni somniorum umbra decipientur, qui falsa
capti spe Lusitaniae regnum ad Philippi ma-
nus credunt aliquando deuenturum. Non ita
ex maiorum nostrorum monumentis, non ex
prophetarum oraculis, non ex sanctissimorum
virorum vaticinijs accepimus. Quin potius
æternum Lusitanorum imperium nullis tem-
porum, aut dierum terminis finiendum, sed
ijsdem, quibus solis cursus, regionibus con-
tineñdum.*

*Illud verò prodigio simile omnibus visum
est, quod scilicet in tanta temporis truculen-
tia, in tanta rerum omnium perturbatione, in
ciuitate omnibus nationibus frequentissima,
in populo præ lætitia ad insaniam redactò, in-
ter ciues lymphatis similes, per plateas impunè
cursitantes, inter perditorum adolescentium
greges*

greges inter licentiosæ iuuentutis impudici-
tiam flagitiosâ, inter tot viros sceleratos præ-
dæ desiderio inhiantes, inter popularem mul-
titudinem habitu, linguis, moribus, & consue-
tudine diuersam, inter confusam gentium col-
luuiem, in vrbe totius Europæ emporio, ubi
assiduitate quotidiana lites, rixæ, iurgia, con-
uicia, ciuiles controuersiæ, & dissensiones au-
diuntur, tantam fuisse illius diei tranquilli-
tatem, tantam animorum pacem, atque con-
cordiam, ut nihil improbe, nihil turpiter, nihil
iniquè gestum sit, sed in omnibus florentissimæ
ciuitatis plateis fuerint alcedonia. Non fur-
ta, non latrocinia, non cædes, non rapinæ, non
direptiones, non homicidia, non contentiones,
sed tam quietæ, & tam pacata erat urbis fa-
cies, ut non absentem, sed præsentem Regem
habere videretur. Si ergo Regis absentia ita
omnes continuit, ut nihil licentiæ, aut insolē-
tiæ commissum fuerit, quid efficiet præsentis
Regis maiestas, quid illa frontis serenitas, &
seueritas, quæ omnibus intuentibus amo-
rem pariter, & timorem conciliat? Non
ita Cæsar Caligula, cuius potentia adeo
erat plebi infesta, & formidolosa, ut vul-
go di-

go dictitaret, oderint dum metuant, at
nostri IOANNIS hæc est vox verè regia,
ament, & metuant. Improbi me terribi-
lem, & formidabilem, at probi viri mitem,
atque amabilem agnoscant. Hi me patrem,
& pastorem, illi iudicem, & vindicem ex-
perientur. Si verò Deus Optimus maxi-
mus in corpore animum, in animo intelli-
gentiam, in intelligentia vim discretionis
concluserit, hanc discernendi prærogativam
Regibus peculiarem esse voluit, qua pro-
bitatem, & improbitatem, præmium
suppliciumque discerneret. Qui enim ali-
ter facit, similis est insipienti, stolido-
que agricolæ, qui cum noxijs, & vene-
nosis herbis triticum simul auellit. Hinc
est, ut apud Platonem princeps dicatur
mundi ratio. Quemadmodum enim in
homine (qui dicitur mundus parvus,
eo quod ad magni mundi similitudinem con-
ditus sit) ratio est præcipua, & nobilissima
animæ facultas, ob quã reliquorum animan-
tium obtinet principatum, atque à cæteris
animâibus idē homo secernitur, ita viri prin-
cipes, & qui alios regūt, aut orbi dominâtur

non

non quidem naturæ impetu, sed solo rationis ductu debent procedere ad regium munus integrè perficiendum; neque unquam inconsultæ libidinis, sed rationis consilio illis est obtemperandum.

Non uno tantum prodigio fuit terminata illa dies, sed nunquam cæli facies benignior, aut clementior huic regno aspiravit. Nunquā Dei liberalitas effusior, aut indulgentior fuit in Lusitanos. Non potuit non stare promissis Christi seruatoris nostri veritas infallibilis, quæ neque decipere, neque decipi potest: imo in hac die suam Regi Alphonso adstrictam fidem, nos omni metu, & solitudine liberauit. Cuius promissionis neque ille oblitus, neque nos dubij, aut immemores sumus, cum in cæpo Ourique iactum regni fundamentum non quidem aliquo angulari lapide, sed hoc diuino promisso solidauit, atque stabiliuit. respiciam, & videbo. Nunc tandem respexit, nec respexit solum sed etiam adiuuit. Oculos ad respiciendum contorsit, manus ad adiuuandū extendit. Cum enim in more, consuetudine que maiorum positum sit, ut crucem, sanctissimum f. dei nostræ vexillum, arboremque salutiferam

tiferam , metropolitanus domo exiens secum
præferat; ubi primum crucem illam argenteā
tam eximiae molitionis consciam , ac te-
stem, necnon , & præclaram auspicem, ac gu-
bernatricem illius diei , Diui Antonij sacello
iam propinquantē vidimus, subito ad intuē-
tium iucunditatē non mediocriter augendā,
res contigit prodigiosa , vel prodigio simili-
ma. Ecce enim seruatoris nostri effigies ex ip-
so argento expressa dexteram manum , quā
humani generis amor cruci affixerat , omni-
bus inspectantibus refigit. Inter confusam po-
puli multitudinem videres alios stupore de-
fixos, alios voluptate perfusos, alios obortis ex
gaudio lacrymis conclamantes, Miraculum.
Miraculum. En Dei manum adiutricem, en
fautricem, & noui Regis , ac regni modera-
tricem habemus. Afflicto, & magnitudine ca-
lamaratū debilitato regno nihil sub illa ma-
nu erit pertimescendum. Ad totius terrarum
orbis amplexus manus habet in cruce exten-
tas, sed ad nostræ Lusitaniae defensionem, ac si
ferrei clauī essent impedimento, manum por-
rigit expeditiorem . Sub illa manu bellorum
comite, victoriarum indice, triumphorum ar-
bitra

bitra nulla in Lusitanos poterit cadere ani-
mi infractio, aut demissio. Sub illa manu, quæ
fortunam regit, nullum poterit Lusitanicæ cō-
tingere infortunium. Fixam manum pro par-
ma, refixam pro gladio, crucem pro Martiali
campo accipiamus, & sub tanto duce armis
alacres accingamur. Si verò agrorum incul-
ta virgultis, & vepribus vestita, ad tegendos
equites, peantesque latebrosum locum solent
efficere; nos etiā in illo capite spinis coronato,
tanquam in vepreto, hostiles insidias declina-
bimus. Iam verò non sinistram, sed dexteram
manum clavis exoluit, ut omnia dextra, nihil
sinistrū Lusitanis eueniat. Vanis idolorum cul-
toribus, qui posthabito sanctissimæ religionis
cultu, verum Deum ignorant, necnon, & hæ-
reticorum leuitati, atq; instabilitati, qui quā-
plurimas mendaciorum nebulas in Christi
ecclesia excitarunt, sinistram Dei manum in-
formidanda iudicij die libenter damus; at
nos qui fidei puritatem, & Romanæ sedis vni-
tatem amplectimur, ad dexteram Dei manū
confugimus, & siue pacem, siue bella geramus
nunquam sinistros euentus, imo dexteros suc-
cessus ab illa manu dextera expectaturi: illud

Davi

Dauidicum oraculum proferemus : dextera domini fecit virtutem, dextera domini exaltauit me, non moriar, sed viuam.

Quid ergo sub illius manus auspicijs Lusitanos deterrebit ? Quæ viarum longinquitas, qui locus inter prærupta saxa ad iter faciendum impeditissimus, qui montium, aut fluuiorum transitus insuperabilis illorum passus retardabit ? Quæ locorum asperitas, quæ incultarum regionum feritas, quæ barbararum gentium immanitas illorum audaciam comprimet, aut impetus propulsabit ? Si mare procellis mugiat, vel rupta elementorū fides in eorum caput coniuret, inter medios fluctus perstabunt impauidi, suamque ad Indos navigationem, quam aliæ nationes dixerunt insanam, audacter suscipient, & perficient. Solo quippe armorum præsidio, & diuinæ manus subsidio totum orbem peragrarunt, imo, & domuerunt Lusitani, honoris quam pecuniæ cupidiores, ut pote qui propriam existimationem diuitijs præferunt, immodicæ gloriæ sitientes, & singulari dominandi cupiditate inflammati. Nihil profecto nostræ unquam

nationi erit arduum, nihil imperitium, nihil inconcessum, cui diuinæ manus auxilium præsto est.

Non solam Christi manum refixam vidit Olyssipo, sed aliud magis admirandum, portē-
rosūque prodigium apud Indos annis præ-
teritis contigisse audiimus, atque ab homi-
nibus fide dignis, maximæque auctoritatis,
necnon à grauissimis epistolarum monumen-
tis accepimus, quod quidem ad nostram æta-
tem fuit auspiciatum præludium. In ciuitate
Goa, quæ est totius Orientis metropolis, cæ-
nobium Diuæ Monicæ sub Diui Augustini sta-
tutis religiosè colitur, in quo illibatum vir-
ginitatis florem cælesti sponso consecrant ex
illo regno virgines electissimæ, quæ sacro ve-
lo obnuptæ, quâ precibus, quâ ieiunijs, quâ
corporis macerationibus Deo vacant, & diui-
narum rerum contemplationi intentæ, nullo
otio hoc salutis negotium intermittunt. Quid
quid ad vitam rectè instituendam puritatis,
integritatis, caritatis, fidei, religionis, mode-
stiæ, obedientiæ, paupertatis, cæterarumque
virtutum potest conducere, id totum cumu-
lata manu his monialibus à Deo optimo ma-
ximo

ximo concessum est. Ad hoc totius sanctimo-
niæ, & honestatis sacrarium, non solum egre-
gij duces, sed etiam laboriosis bellorum exer-
citationibus attriti milites. sæpissimè confu-
giunt, tanquam ad asylum, ut illarum moni-
alium interpositis meritis Deum sibi placat-
um reddant. In templi structura, quæ non ad
modum augusta, est tamen elegans, & per-
polita, super ferreas crates non exiguæ latitu-
dinis arcus erigitur, in cuius fastigio sanctis-
sima Iesú Christi ex cruce pendentis effigies
cernitur, quam virgines ille chorum ingre-
dientes vultu ad se cōuerso videt, atq; ad illud
sāctitatis speculū vitas suas inspiciunt, illud
cōsulunt, & in illo contēplantur, sint ne inte-
riori forma commendabiles, vel potius suo
sponso deformes, atque ita siquid moribus in-
comptum est, ad illius speculi expressam ima-
ginem comunt, & componunt. Octaua Februa-
rij die anno salutis 1636. & per alios sub-
sequentēs dies, in maximo sacrarum virgi-
num conuentu, & quamplurimis ex civitate
viris ad nouum, atque inhabitatum specta-
culum cum admiratione adstantibus ecce re-
demptoris nostri lignea effigies oculos marte

clausos atque de pressos nunc in omnes circū-
stantes intendit, nunc fixos, atque immobi-
les tenet, nunc huc, atque illuc benigni-
tate inflectit, nunc etiam cum gravitate re-
mittit, ac si lignum illud inanime, prorsusque
insensibile, & animam, & sensus gereret. Ne-
que solus oculorum obtutus erat varius, sed
in toto vultu inerat vitalis vigor, animus-
que spirabilis, quo totum corpus, & crux ip-
sa moueri: pedes, manusque extendi: san-
guis ex vulneribus fluere: labia ad voces
aperiri: vox ipsa audiri videbatur. Monia-
les admiratione defixæ ubertim flere, gemere,
suspirare, latentes tanti prodigij causas in-
quirere, crimina per confessionem purgare,
cælum precibus onerare, graues in omnium
animis cogitationes versari.

Sed cum veritatis inquisitio, atque inue-
stigatio maximè deceat scriptorem, res est
altioris indaginis, quid sibi velit hoc prodi-
gium medullitus perscrutari. Quis neget
oculos esse cordis nuntios, iræ, doloris, &
amoris indices, in quibus quidquid animo
inclusum latet, non sola coniectura, sed
certissimis signis deprehendimus? Quis ne-
get

get oculos totius corporis esse speculatores ,
qui altissimum locum obtinentes , quidquid
emolumenti est clarius insequuntur ? Li-
ceat igitur ex diuinis oculis desumere fe-
lix, & auspiciatum nuntium, quod nos ma-
nifestis indicijs certos reddat , nostram Lu-
sitaniā a Deo amari , in diuinis oculis
gestari , sub Dei tutela, ac munimine ver-
sari , singulari prouidentia custodiri , &
maiori superum patrocinio defendi , at-
que obumbrari . Habemus Dei oculos spe-
culatores , qui nostrę defensionī semper in-
uigilant , & nunquam sopore , aut lassī-
tudine depressi nostris miserijs condolere , no-
stris infelicitatibus ill acrymare solent . Si
cætera mundi regna introspicias , hæc ho-
mines plerumque habuere conditores : at
Lusitania solum Deum conditorem , & in-
structorem habuit : atque adeo primum
Regem Alphonsum parum firma valetudi-
ne, & pedibus debilem infantem , San-
ctissimę Virginis M A R I Æ protectione, sa-
nitati , firmitatiq; restitutum memorant
nostri annales . Felicia quidem regnandi
incunabula, quę a Dei matre auspiciũ sumũt.

No vis ergo honorum incrementis, & diuitiarum accessionibus quotidie decorabitur Lusitania, & quæ Deo duce, & auspice nata est, occasum nesciet. Si vero aliquando homines ad interimendam, quam ad conseruandam patriam promptiores, immiti, & inhumano ingenio fuerint, qui Regi, & regno insidias machinentur, nihil Lusitanos exanimatum, nihil interemptum, nihil perditum ibit, qui Dei manum habent auxiliatricem. Vacillanti, & collabenti regno, dominus supponet manum suam. Hæc Dei manus nostri imperij magnitudinem perpetuo stabilire, hæc illius metas extendere, hæc ab imminente periculorum metu vindicare, hæc ab hostium incursionibus liberare, hæc denique integram, atque illæsam nostri nominis dignitatem poterit conseruare.

Nec sine felici augurio factum credo, ut semisepultum Lusitaniæ regnum ex tenebris, atque ex interitu vindicetur in die sabbati, quam Brigantini Duces semper faustam, & bene ominatam habuerunt. Si verò ad explorandam huius mysterij profunditatem lineam cum plumbo mittamus, & altiora rerum initia indagemus, quis non videt primos Brigantinae

*tinæ familiæ authores Dei paræ Virgini Ma-
riæ , cui inueterata maiorum nostrorum
consuetudine dies sabbati sacrata est , mul-
tis nominibus fuisse deuinctos , & a bea-
dem Maria maximis beneficijs cumulosos ?
Primò enim Nonius Aluares Pereira, vir do-
mi, & militiæ clarus , qui ob suam eximiam
fortitudinem, se libris , & famæ loquendum
dedit, in die sabbati natus est: atque idem à re-
neris pueritiæ annis illum mater adhortata
est, ut in toto vitæ decursu sanctissimam ieu-
nij legem in sabbatis obseruaret . Quam ille
consuetudinem fortiter , ac religiose tenuit,
neque hanc sibi à suo genio præscriptam legē
vel confectus senectute, vel morbo impeditus,
vel corporis defatigatione, vel animi ægritu-
dine interrupit. Iam verò Ioannes hoc nomi-
ne primus Lusitaniæ Rex, primum Briganti-
næ gentis fundamentum, incredibile dictum est,
qua religione, qua obseruantia, quo studio, at-
que ardore uenerandam Dei matrem semper
coluerit, sub cuius patrocinio quamplurimas
ex hostibus uictorias reportauit. Inter reliqua
illud præcipuè memoratur in campis de Alue-
barrota commissū prælium pridie Idus Au-*

gusti, quam diem ob festum Assumptionis postera luce celebrandum ieiunus duxit Ioannes, & viribus nunquam deficientibus, imo acrius instauratis, tam strenue à nostris dimicatum est, ut dies illa fortunata nostram Lusitaniam Castellanorum spolijs onustam, & victrici lauro viderit coronatam. Nec mirum est sub Mariæ præsidio innumeras hostium copias esse profligatas. Si enim præstantissimi ducis præsentia militum animos solet accendere, atque ad Martis ludum ita inflāmare, ut omnes certatim velint difficiliorem in pugna locum occupare, in prima acie certare, hostium muros primi ascendere, præsidium loco deijcere, sylvarum latibula inuestigare, viarum aditus explorare, nocturnis insidijs hostes aggredi, durioribus congressibus se opponere; quid de Sanctissima Virgine Maria dicendum est, quæ fortior bellatrix hostilem furorem contundit, atque inter morientium acervos laureato curru ingrediens, deficientem, & penitus emorientem spem in suis militibus verbis excitat, promissis alit, præmijs corroborat, victorijs firmat. Hac duce, atque auspice, Nonius, & Ioannes ini-

mico-

*micorum impetus sæpissimè compresferunt ,
& futilem , atque inanem Castellanorum lo-
quacitatem continuerunt , quibus linguæ
ventositas , & pedum tarditas nunquam ad
fugiendum fuit impedimento . Hac duce , &
fautrice , in die Assumptionis Ceptam arcem
munitissimam non sine ingenti Maurorum in-
ternectione , Lusitano imperio adiunxerunt .
Si vero inter hostium cateruas in apertum
capitis discrimen adducebatur , hac voce San-
cta Maria succurre per interruptos , atque
interturbatos militum ordines volabant im-
pauidi , & magna edita strage euadebant
victores . Merito igitur sabbati dies fuit ad
regnandum Ioanni auspicatissima , eademque
erit aditus ad victorias , necnon quietis , &
libertatis initium . Si enim in die Sabbati
requieuit Deus ab omnibus operibus
quæ patrauerat , quis erit tam hebeti , ob-
tusoque ingenio , qui non intelligat no-
stram Lusitaniam à durissimo laborum iugo
illa die esse solutam .*

*Lusitanorum cæptis annuere , & obse-
cundare cælum credimus tot monstrorum ,
ac prodigiorum manifestis signis , imo claris*

deprehensionibus . Illud verò memoratu dignum est, quod sub idem tempus fertur contigisse, virisque sapientibus deliberatum, & constitutum est, id præter naturæ ordinem euenisse, quanuis ipse ob natiuam oculorum debilitatem non potuerim aliquid certum intescere . Huic tamen spectaculo sæpissimè interfui, & quamplurimos vidi tantæ nouitatis spectatores, qui defixis oculis lunam suspiciebant, & in ipso corpore lunari, quasi in intimo sacrario, sanctissimæ Eucharistiæ pixidem, & hinc inde reuerenter adstantes Angelos dignoscebant, qui illas diuini amoris epulas, illud hominum nectar, illas Ecclesiæ delicias, illum ex cælo demissum panem quâ capitis submissione, quâ poplitis inflexione venerabantur . Fateor nonnullos fuisse magnæ auctoritatis viros, qui nihil nouum, atque inusitatum in lunæ corpore fuisse affirmant, sed ipsam lunam varijs maculis, siue umbris à natura inspersam, illas intuentiû oculis imagines obtulisse . Verum cum potior hominum pars id præter naturæ cursum euenisse affirmet, non possum adduci ut credam, aliquam oculorum ludificationem ad communem

nem

nem totius regni errorem potuisse euenire. Quauis enim vnus, & alter homo ex varia radiorum inflexione falsis imaginibus decipi posset, nunquam tamen credibile est, hanc ad tot hominum millia deceptionem perualisse, in eos maximè, qui acutis, & perspicacibus luminibus pollent, & in Mathematicis disciplinis non mediocriter sunt versati, omnesque tam stelliferi, quàm lunaris cæli mutationes apprime callent. Agite nunc humani diuiniq; archani indagatores, agite portentorum interpretes, agite mirabilium rerum obseruatores, dicite quid sibi velint hæc monstra, quid ferant hæc prodigia, quid denuntiēt hæc portenta. An Turcarum vexilla, quæ lunari astro sunt insignita eripiemus, atque ex signiferi manibus extorquebimus? An Maurorum signa, quibus lunæ effigies sunt intextæ, gentilitium Mahometanæ gentis stemma, in Christianorum potestatem aliquando deueniēt, & abiecta illius Sectæ perfidia, verum Deum ac dominum in venerabili Sacramento agnoscent? An proculcata, penitusq; extincta Maurorum, & Turcarum superstitione, sanctissima Christi fides, ac religio promulgabitur? Nō erit

vanus

vanus augur qui ita prædixerit : neque ab hoc scopo longe aberrat multorum hominum præfaga mens . Si igitur lunam interposito, interiectuque terræ multoties deficientē cernimus, non immerito sperandum est, illam in Turcarum vexillis expressam lunam interposito Eucharistiæ conuiuio defecturam .

Ad hanc auream, & prodigiosam ætatem, quamplurimis per hosce annos portentosis euentibus cælum præludere videbatur: quibus ad maiores curas traductus animus tunc nō intendebat, nunc verò post secundissimos rerū euentus nostram in illis prodigijs felicitatem prædici, & præfagiri credimus. Anno salutis 1632 die sexta Nouembris, in regio, & magnifice extructo cænobio de Alcobaça, cum in sublimioris ædificij fronte marmoreum primi Alphonsi Regis simulachrum collocaretur, de improviso, atque in maxima hominū spectantium multitudine, insolitus fulgor ex maritima parte euibratus ab Occidente versus Orientem discurrit, & postquam omnia circum loca longe lateque illustrauit, in ipsius simulachri vertice paulisper commoratur, ibique rarefcente paulatim lumine euanescit.

Omnes

Omnes qui aderant dextri ominis loco hoc
prodigium vertendum putant, atque inter
frigentes Lusitanorum Regum cineres ali-
quam superesse scintillam, quæ etiam sopita,
& semisepulta ad illuminandum terrarum
orbem excitaretur. Fax illa ex Occidente ad
Orientis fines extenditur, ut Lusitani ad il-
lius fulgoris ductum ab ortu ad occasum ra-
pidissimo cursu comitantem Solem conse-
quantur, & quidquid Sol radijs lustrat, fer-
ro doment. Atque utinam noui Regis inau-
guratio occasum nesciat, sed inter senescen-
tem nepotum posteritatem nouo quotidie or-
tu senium deponat, & instar aquilæ renoue-
tur. Utinam huius facis ardore ita inflamme-
tur, atque accendatur orbis, ut intimis ani-
morum penetralibus solus ille ignis collu-
ceat, de quo Christus Dominus, ignem veni
mittere in terram, quid volo nisi ut ac-
cendatur. Si vero felix fuit augurium,
cum flamma molli tactu innoxia Ascanij
caput, & crines lambit, non sine feli-
ciori auspicio factum credo, ut in viuum
expressam ALPHONSI effigiem cæ-
lestis ille fulgor contingeret, & supra
regium

regium caput conquiesceret. Verum si pulchriora sunt animi, quam corporis lineamenta, eo-
quod animis insint quædam cælestis ignis particulae, iam nobis hoc experimento cognitum
erit, quantum cæteris regnis præstet Lusitania, quæ hûc sydereum, & cælestem ignem bis
in suo Rege Alphonso experta est: primo in câ-
po de Ourique. secundo in cænobio de Alcoba-
ça. Si quis igitur in vna libræ lance Lusita-
næ virtutis magnitudinem posuerit, in altera
diuinæ munificentiae largitatem erga Lusita-
nos, non difficile reperiet; quantum inter
hoc, & cætera mundi regna sit interuallum.
Neque enim vna tantum, sed multiplici diui-
næ sapientiæ lima fuit tersum, & expolitum
hoc regnum. Siue etenim illius infantiam, si-
ue pueritiam, siue adultam iam ætatem, siue
ad senectam inclinantes vires contempleris,
Deum illi præsentius assistentem agnosces.

Hic Lusitanæ captiuitatis exitus fuit,
imo ad libertatem aditus felicissimus. Cum
enim Lusitani gloriæ appetentes, & laudis
auidi semper fuerimus, inique, & peracerbè
serebamus non deleri illam maculam, quæ
nostro in nomine penitus iam insederat, atq;
inuete-

inueterauerat, diutina, & satis laboriosa sexaginta annorum captiuitate; essetque extrema dementiæ si pro fortitudine patiētiam, pro clamore silentium, & taciturnitatē exhiberemus, & tanquam inulti pueri in medijs contumelijs daremus lacrymas, aut more fæminarum solis vocibus fieret decertatio. Sūmmum in discrimen vocabatur omnium salus, omnium fortuna, omnium res familiaris, & tamen hæc imminentis periculi magnitudo esset diu dissimulanda? In peius, atque in deterius vergebat florentissimum Lusitanorū imperium, & tamen formidine concussi tacere-mus? Tumultuosus hinc inde laborum, & calamitatum fluctibus nostra cymba fluctuare, imo iam immergi, & ad totius infelicitatis scopulos allidi videbatur, & tamen miserandum naufragium siccis oculis spectaremus? Nescit profecto latebris occultari Lusitana fortitudo, sed emergit, atque in forensem lucē prodit. Nescit ignis diu latere, sed suo fulgore proditur. Nescit ventorum inquieta rabies, & effrænis indignatio terræ visceribus diu cōmorari, sed magno cum murmure impatien-ter fremunt, sæuiunt, debacchantur. Quales
canes

canes interdum clausi noctu acriores, & vigilantiores sunt, & quales leones in vinculis detenti terribiliores edunt rugitus: tales Lusitani ex hac diuturna captiuitate prodeunt acriores, & asperiores. Fames ex longo collecta acrius plerumque stimulat, & supplicij tarditas maiori grauitate compensatur. Claudio nonnunquam pede incedit vindicta, & ex improviso adest proforibus. Diu potuimus dissimulare, sed non diu perferre, & sustinere, quin aliquando recrudesceret soporatus dolor. Quæ opprobria, quas irrisiones, quæ ludibria, quas omnium bonorum iacturas, quæ pace belloque incommoda, quas terra, marique iactationes, quas trilutorum grauissimas impositiones, quæ infortunia, quas omnium malorum complexiones nō experti sumus Lusitani sub Philippo? Non solum in finitimis Europæ locis, sed etiam in disiunctissimis, maximeque diuersis Asiæ, & Africæ regionibus quotidie vexabamur; quique olim exteris nationibus terrori fuimus, nunc eramus opprobrio. Quis ergo seruus non clamet inter verbera? Quis tortoris sæuitiem non excretur? Quis non doleat, & vociferetur inter plagas? Quis taceat

taceat inter compedes ? Quis in vinculis non indignetur, & prorumpat in iracundiam? Sub Rege Pharaone satis molestè, & periniquè ferebant Hebræi suæ seruitutis iugum, nec tamen ad detrectandum, & abijciendum suppetebant vires, donec vidit Dominus afflictionem populi sui in Ægypto, & clamorem eius audiuit, propter duritiam eorum, qui præsumunt operibus. In paupertate, atque inopia nihil ignominie est, hæc enim cedunt arbitrio fortunæ: at servile nomen maxime est ignominiosum, nihilque libertate nobilius, aut pretiosius habetur.

Nullum præterea est tam calamitosum vitæ genus, cui non sit aliquod oblectamentum, & alternantis voluptatis remissio, qua seueriores curæ castigari, & solitudinis impetus reprimi, aut retardari possint: si tamē adimas libertatem, voluptas fit acerbitas, & ipsum oblectamentum vertitur in cruciamentum. Hinc apud Daniam vincula adeo sunt probrosa, ut potius mori velint, quā in vinculis, & custodia viuentes detineri: tolerabilius rati fatū, quod cōmunis hominū conditio admittit, quam quod servile supplicium exi-

gis. Mors etenim vno ictu omnes tã animi, quã corporis morbos depellit, curas abstergit, dissipat sollicitudines mœrorẽ fugat, calamitatibus medetur. At in vinculis. & in seruitute cura, sollicitudo, mœror, calamitas, & ærumnæ placidissimum corporis, & mentis statum turbant, semperque finis alterius mali est gradus ad futurum. Cuius rei locupletissimum testimoniũ protulit Ioannes Galliæ Rex, qui ab Odoardo Angliæ Rege in prælio superatus, & captus fuit. Cum enim parta victoria quã theatralibus ludis, quã spectaculorum varietate, quã festiuis applaudentium iocis, quã equestri certamine celebraretur, Ioannes animo, vultuque subtristi, oculis ad terram demissis, & nullũ iucunditatis signum præ se ferens, his ludis intererat spectator. Tunc Odoardus (quo nullus ad omnes iocos lepidior, nullus ad facetiarum sales erat venustior, atque hilarior) ut suo captiuo illuderet, vel ut obductam cicatricem refricaret, per iocum dixit ad Ioannem. Cur inter tot hominum exultantium plausus non promis aliquod lætitiæ signum? Tunc Ioannes quomodo inquit, cantabimus in terra aliena? Cum libertate risum,

Et voluptatem perdidimus nostræ vitæ deletionem, Et miseriarum leuamentum. Quæ igitur doloris attenuatio, quod curarum lenimen, quæ ægritudinis leuatio poterit ex his spectaculis prouenire homini captiuo? Talis erat Lusitanicæ species quandiu sub acerbissimo Philippi iugo duram seruiuit seruitutē.

At quam sera fuit hæc libertas! Quam tar-
do, Et testudineo gradu ad nos accessit? Respe-
xit tamen, & longo post tempore venit.
Ego sanè inēuitabili, Et prorsus inscrutabili
diuinæ prouidentie consilio factum puto, ut
nostrum regnum florentissimum ad exterorū
Regum manus deueniret, in illisque diutis-
simē commoraretur, ut vel ita à Deo flagel-
lati resipisceremus, Et ad meliorem vitæ ra-
tionem corruptissimi mores adducerētur. De-
us enim iniurijs hominum vitijs lacessitus,
Et multis offensionibus prouocatus, dat re-
gna, adimitque, ut omnem humani imperij
volubilitatem, ac vicissitudinem ex diuina
trutina pendentem intelligamus. Dei nutu
stant, Et cadunt regna. Ipse nostram Lusita-
niam rebus suis diffidentem confirmauit, affli-
ctam erexit, cadentem tenuit, perditam re-

creauit. Ipse Ioannem patrio, & auito regno
spoliatum, maiorum suorum solio, sceptro-
que restituit, qui nos non modo à calamita-
te, sed etiam à metu calamitatis defendit.
Ipse animos, viresque sufficiet, ut omni studio
ad patriæ defensionem incumbamus, & om-
ni virium contentione pro gloria nominis
Lusitani, pro sociorum salute, pro fortunis om-
nium ciuium decertemus. Atque utinam nul-
la fatorum vi, nullo aduersantis fortunæ mo-
tu, labefactatum regnum concidat, quod tanto
partum sanguine, tanto maximorum ducum
sudore, & labore conseruatum, nouis quotidie
gloriæ incrementis, & victoriarum accessio-
nibus ad nostram vsque ætatem perennauit,
quanuis hæc felicitatum linea per sexagin-
ta annos sub aheneo Philipporum iugo fuerit
interrupta. Sed iam exonerata ceruix nos iu-
bet bene sperare. Quæ ne langueat, aut titu-
bet spes, eam satis superque muniuit, & con-
firmauit illa seruatoris nostri Iesú Christi ex
cruce pendentis ad Alphonsum Regem vox
dulcissima: in te, & in semine tuo imperiū
mihi perpetuum volo stabilire, ut defera-
tur nomen meum ad exterass nationes.

*En Lusitaniæ imperium non trabali tantum
sed adamantino clauo fixum , immotumque
cum ipsa immortalitate nullis poterit termi-
nis circumscribi . En nostra Portugallia
diuinæ promissionis subsidio, ac præsidio
munitissima. En cælestis fidei præco-
nes, en alterum vas electionis
ex Lusitanis assumitur, qua-
lis Paulus ex Hebræis, ut
ex omni aditu clausa olim
maria nostris nauibus
patesacta, ad ultimas
Orientis oras viam
muniant , &
sternant .*

Finis Libri Quarti.



ARGVMENTVM

In Librum Quintum.

Sub auspicijs IOANNIS quarti militaris ardor reuixit in Lusitanis quorum res bello gestæ, & præclara facinora memorantur, vel potius prælibantur.

LIBER QVINTVS



*C*M diuinæ munificentiae largitas non uno tantum, sed multiplici beneficiorum genere in Lusitanos diffusa sit, operæpretium duxi, Lusitanorum felicitates sigillatim recensere, ne vel temporis decursu cō-
finescant, vel obliuione conterantur, vel aliqua obscuritate, & ambiguitate inuoluantur. Calamo quippe scriptorum uiuit bellantiū robur, & atramento comparatur immortalitas.

Per hosce dies reuixit militaris vigor, qui longo iam otio, ac desidia torpescibat. Quemadmodum enim ut fortior sit senecta, ætasque virilis, multum interest adolescentiam, iuuentutem, imo, & pueritiam Martijs laboribus esse eruditam, ita armorum desuetudine feroces

roces militum animi sæpissimè emolliuntur .
Post noui Regis creationem , nullum corpus
quanuis senectute inualidum , aut inualetu-
dine infirmum abstinet á laboriosis armorum
exercitationibus, in quibus nititur regni in-
columitas. Vidi ego superioribus diebus senem
nonagenario proximum, membris æuo tremē-
tibus, gressuque titubante , mira tamen ala-
critate feruidum , ad reprimendos inimicorū
incursus festinantem, ac si corpus nulla defa-
tigatione ingrauesceret , imo spiritus prom-
ptior. atque robustior armorum pondere leua-
retur. Ipsa senis facies non solum ingenuita-
tem, sed bellicum ardorem præ se ferebat, in il-
laque iam corrugata, & cadauerosa facie vi-
gor insolitus enitebat . Cum Ioanne enim re-
pullulant amissæ vires , & ætas iam frige-
scens recalescit . In illo sene mihi in mentem
venit fortissimus Caleb promissæ terræ expla-
rator, cuius hæc sunt verba ad Iosue : hodie
octogintaquinque annorum sum, sic va-
lens vt eo valebam tempore, quando ad
explorandum missus sum: illius in me tē-
poris fortitudo vsque hodie perseverat.
Nihil mirum si ætatis maturitas sit pruden-

ziæ mater : at in ætate matura , imo decrepita , tam incredibilem videre fortitudinem , id profecto ad portentum accedit . Nam si cut matura , & cocta poma ex arboribus sponte decidunt , cruda vero , atque acerba vi auelluntur , ita longæui senes nimia vetustate consumptas vires , omneque tum animi , tum corporis robur habent debilitatum . At sub nouo Rege , nullum est infirmioris ætatis damnū pertimescendum . Ipsam morosæ senectutis tarditatem in alacritatem conuerti videmus , puerorum infirmitatem commutari in firmitatem , fæminarum imbelles manus ad bella accingi , nullos equites desidiosa marcescere , nullos pedites igniuiatorpere , nullos duces languere inertia , nullos tyrones ad sanguinis aspectum expallescere , nullos veteranos in acie deficere , omnem sexum , atque ætatem pro libertatis defensione , manibus , pedibusque obnixè persistere . Quemadmodum ij qui graui laborant ægitudine , & febrem nunquam intermittentem patiuntur , morbo vires amittunt , sed postquam morbum depulerint , facile illis reuocant : ita Lusitani quandiu in regni venas , ac medullas miserrima seruitutis

*tutis tabes grassata est , viribus destituti
torpescabant, at nunc depulso morbo, & ex-
cusso iugo conualescunt, & reficiuntur.*

*Feruet in Lusitanie finibus intestinum, ac
domesticum bellum , æquè Lusitanis , &
Castellanis insidiosum: at inter bellicos armo-
rum strepitus feruidior in Lusitanis ardor, &
militaris virtus enitescit, quibus non mino-
ricuræ est præsens periculum vitare , quam
impendēs præcauere. Castellanos tenues, atq;
egentes sola spes rapinæ in bellum trahit, ut
sumptuosius, atque insolentius viuant: at Lu-
sitanos Regis , & patriæ amor in hostem
rapit . Illos inuitos, & magis supplicio-
rum timori , quam Regis voluntati obse-
quentes , quotidie videmus Euro fugacio-
res aciem deserere, & pedibus , non lacer-
tis salutem quærere: hos vero spontaneos ,
& Regis amore incitados in acie persiste-
re, fortiter dimicare, gloriôsè occumbere. Illos
maior bene nummati marsupij cura , quam
militaris ardor accendit: hos non prædæ
studium, non rapinæ desiderium , sed sola no-
minis, & rerum gestarū celebritas inflammat.
Quia vero præclara hominum facinora non*

satis est fama celebrari, ad exigui temporis
vsuram, sed posteritati ad imitationem
relinqui, & annalium monumentis, at-
que immortalitati mandari debent, nos
summis tantum labris ea prælibabimus,
quæ per hosce duos annos à Lusitanis virili-
ter gesta sunt.

In prouincia Transtagana leuioris arma-
turæ milites in bellicis excursionibus tam
strenue se gesserunt, vt ventosos Castellano-
rum impetus quàm sæpissimè eluserint. Testor ciui-
tatem Eluas, testor fluuium Guadianam, qui
nostros milites acerrimè decertantes, Hispanū
que equitatum velut lymphatico pauore dis-
sipatum vidit, ac nostros lusitanos instar ma-
rini æstus nunc accedere victores, nunc rece-
dere cum spolijs. Quod cum hostes molestissime
ferrent, nihil iam aperto prælio audent, sed
aliud belli genus meditantur, quanuis mi-
nus honestum, & gloriosum, magis tamen se-
curum. Montium, & sylvarum latibula ar-
mati ingrediuntur, inter frondium, ac ramo-
rum opacitatem diu latent: inde omnes adi-
tus exitusque explorant, vt optimam nacti
occasionem ad inuadendum, ex illis latebris
su-

subito emergant, & pro virtute utantur dolo.
Cum verò decem equites Lusitani iuxta
Guadianam ad explorandum campum pro-
dirent, ex improviso, atque ab insidijs erum-
punt tercenti equites Castellani, qui hostili
odio, telisque infestis nostros hinc inde cingūt,
mutuis vulneribus petunt, utrinque pertina-
citer, & obstinate confligitur, donec ex nostris
septem, cum iam defatigati equi vix possent
sine prolapsione insistere, quā lassitudine, quā
hostium multitudine pressi, imo obruti capiun-
tur. Hos inter Roquius Antunes viribus, &
ætate validior, qui tamen ob equi pernicita-
tem hostium turmas posset illæsus euadere,
cum se ab illis circumuentum, & strictis muc-
ronibus undiq; appetitum videret, nullo me-
tu perculsus, imo potius animo inconcussus,
vultuque imperterritus in pugna persistit, nec
prius deficit quā corpus vulneribus confos-
sum sanguis, viresque deficerent. Hanc stre-
nuissimi viri audaciam manifesto compertam,
atque deprehensam hostis amabat, & demira-
batur, neque illum inter arma obire, sed ex
armis ad se recipere, & fuorum militum nu-
mero adscribere volebat, hac solum lege, ut
semel

semel inclamaret, Viuat Rex Philippus. Quod nomen sibi inamabile, atque execrabile Roquius cum irrisione excipiens semel atque iterum repetebat: Viuat Rex Ioannes, cuius mihi nomen mellitum, & iucundissimum est, ac dum morienti grauiores instant curæ illius recordatio est dulcissima: & multo libentius amplectar mori pro Ioanne, quam viuere cum Philippo, à quo fateor meam voluntatem semper fuisse alienatam. Eritque facilius mare cælo misceri, aquam ignibus confundi, terram Oceano supernatare, omnium elementorum ordinem inuerti, quam me Ioanni fide, & amore adstrictum ad Philippi signa conferri. In hac voce extrema vir præstantissimus è vita decessit.

Regio igitur Transtagana (quam non minus robustissimorum virorum, quam rei frumentariæ feracissimam nemo prudens inficiabitur) quamplurimas hac tempestate neque cruentas, neque luctuosas victorias, vel vnius militis amissione à Castellanis reportauit. Verno tempore, cum floribus tanquam gemmis pinguntur, & vestiuntur prata, vidimus eosdem flores hostili sanguine inspersos, plus habere

habere ruboris, quam candoris. Didacus de
Mesquita cui par generis, & fortitudinis
decor, vir non minori equitandi, quam bel-
landi peritia, cum ex hostibus quatuordecim
equitū turmam obuiam haberet, solutis nō ad
jugā, sed ad pugnam habenis, inconfertissi-
mos hostes incurrit, acriter instat, maxi-
ma vi undique certatur, solus multorum
impetum, & incursionem sustinet, qua te-
lis, qua ænearum fistularum displosionibus
petitur, & inter pulueris tormentarij fu-
mantem nubem victor euaderet, si equum
pugnæ socium haberet. Verum equus ferrea
glande percussus ad terram labitur, & su-
per ipsum equitem humi procumbentem ag-
glomeratur hostis, ictus ingeminat, quos
Mesquita nunc audacter repellit, nunc vi-
riliter declinat, non tamen plagarum vim
omnino potuit subterfugere, qui à fronte,
à tergo, à lateribus petebatur. Capiti altè
illatum vulnus, & manus ferro leuiter
est prælibata, nec non ex mutuo conflictu
fractum, & debilitatum corpus. Hoc ex
luctamine integris, atque illæsis viri-
bus euadere difficilimum erat: neque
Neque

Neque profecto ex tam crebris vulneribus
viviùs emergeret, nisi Ferdinandus Mesquita
germanus frater auxilio præsto esset, qui col-
labentem fratrem, & neci iam destinatum
eripuit. At quales celeri meatu in aere discur-
runt aues, fugiuntque insequentem accipitrē,
tales Iberi, alas quas timor dederat, fugæ ex-
pediunt, neque manibus, sed pedibus salutem
quærent. Quos inter nonnulli strenuissimi
milites, aut in prælio capti, aut grauitè vul-
nerati discesserunt.

Se quotidie in peius ruere agnoscebant
Castellani, & tamen quæ ingrauescenti malo
adhibenda esset medicina, ipsi etiam pruden-
tiores ignorabant. Militiæ præfectis non ita
facilis erat deliberatio. Rem maturissime iu-
dicandam affirmabant omnes, sed nullus sa-
tis consulto providebat. Non idem Marti, &
Veneri remedium est. Si enim amor concili-
ando profunt amatoria medicamenta, non
ita ad bellorum felicitatem profunt herbæ,
aut incantationes. Venus blanditijs, precibus,
muneribus concilianda: at Maiors nunc vir-
tute, nunc dolo dominatur. Quicunque in bel-
lo meditatæ insidias non possunt virtute ef-
fugere

fugere, dolo saltem effugiant. Nam quemadmodum veteres olim Philosophi auream mediocritatem in boni, malique confinio positam esse affirmabant, ita bellorum successus inter dolum, & virtutem positos iudicabant. Virtus igitur pro Lusitanis, pro Castellanis pugnat dolum. Cuius rei testimonium in medium iam proferamus. In vberissima prouincia Translagana, tempore æstiuo, magna est messorum copia conductitia, qui ad quærendum victum confluunt ex toto regno, & in metendo nauant operam mercenariam. Hos despositis armis in campo dispersos, & quâ æstu, quâ labore fatigatos ex insidijs adorti Castellani. Messoribus subito intumescit bilis, & cum nihil armorum esset præter falcem messoriam, & cultros ex cingulo appensos, inter frumentarios manipulos certamen haud recusant. Quauis ergo disparibus armis utrinque pugnaretur, Castellanos metu dissipatos, & in agris palantes nostri insequuntur, & passim cædunt. Videres Castellanos ante pugnam nimia loquacitate, impudentiaque verbosos, & dicenda, & tacenda loqui: sed post pugnam mutos, ac taciturnos immodicæ garrulitatis pœnas luere

luere. Quid si gladijs, non vero falcibus, & cultris res ageretur? Omnes ad solam ferri suspicionem expallescerent, atq; obmutescerent. Quid si cum hominibus bello expertis, non vero cum messoribus, & militiæ rudibus agricolis pugna iniretur? Hos ut pote inexper-
tos sæuius urget timor: at in ijs qui bellorum sunt experti, ipsa bellandi assiduitas periculo-
rum contemptum facit. Hinc fit, ut ad leuissi-
mi vulneris aspectum tyrones in bello desi-
ciant, at milites veterani cruorem suum spe-
ctent imperterriti: ipsa etenim laborum expe-
rientia labores mitigat.

Lusitanos sub Philippo nimia armorum de-
suetudine torpescentes, velut in mari lento
iners languor, & desidia tenebat: at modo sub
Ioanne ipsi etiam homines inurbani, totius ru-
sticitatis, ac feritatis domicilium, Martio lu-
do non exercentur modo, sed delectantur. Nec
solos viros accendit hoc militandi studium,
sed etiam fæminas tenet, quæ sexu fragilio-
res, & imbecilliores sunt. In oppido Oliuença
fuit per hosce dies quædam fæmina rusticana
ætate integra, facie liberali, viribus pollens, nō
effæminata, sed mascula fortitudine, quæ vi-
rilem

rilem sexum non vultu, sed corde mentieba-
tur. Hanc dato signo armis cinctam, thorace,
& casside obarmatam, equo viriliter insiden-
tem, in campum prodire, manus conferere,
æneam fistulam displodere, hostem fortiter in-
sectari, omnia bellicosi adolescentis munia
præstantissimè obire, & quoties datum signū,
& ad arma conclamatum est, toties illam in-
star fulminis vidimus prorumpentem. Quæ
unquam inter Amazonidum cohortes fuit
robustior Penthesilea, quæ fortior Camilla
ob præclara rei militaris facinora immor-
talius, & gloriosius nomen consecuta est dum
illatas patriæ iniurias manu, & ferro ho-
stiliter vindicavit? Si primus Ioannes
Lusitaniæ Rex furnariam vultu terribi-
lem, ore trucem, lacertis validam, cor-
poris habitu metuendam in campis de
Aliubarrota habuit auxiliatricem, bel-
lique, & victoriæ sociam, quæ septem
Iberos una pala interemit: IOANNES
quartus longè fortunatior hanc habet ar-
matam Palladem, quam non inter lucubran-
tes ancillas lanæ deditā, sed inter belligeras
turmas ænea armorū luce fulgidā, nō grega-
rijs

tantum, sed ipsis veteranis militibus superiorem videmus.

Iberi non quidem magno exercitu comparato, sed nunc prædatoria manu, nunc exiguo equitatu multa Lusitaniæ loca hostiliter accedere, pagos, domosque incendere, agros vastare, ex pecoribus prædas capere, messes comburere, sylvas succidere, agricolis terrorem augere solebant. Verum id damnum non impune tulimus, imo potius eò vindictæ processum est, ut damnum damno satis superque fuerit compensatum, neque ulla unquam dies omnino lætam, aut incruentam victoriam illis concesserit. Lusitaniæ agri albent ossibus Castellanorum, nullæque vel in montibus eminentes, vel in vallibus sunt partes lacunosæ illorum sanguine, & cadaueribus non repletæ. Hominem testor in rebus serijs seuerum, in iocosjs lepidum, & venustum Ioannem Domingues Gastão, cui ob innumeras Iberorum cædes, materna lingua cognomen est, matta Castelhanos, latine Castellanorum occisor. Hunc æque viribus, & natalibus clarum, sibi non minus formidabilem, quam exitialem sæpissimè experti sunt Castellani. Cum enim semel ex

mel ex nostris finibus prædas agerent, & iam furto potirentur, Ioannes Domingues rei factus certior quam citissime accurrit, & traiecto flumine de Oliuença, illis præda exultantibus sit obuius, omnes unus inuadit, & ferro partim cædit, partim relicta præda in fugam vertit. Nec soli pedites, sed etiam equites huius viri manu vitam sibi ereptam dolent. Nam cum eminentiores iugi partes centum equites occuparent, neque multo loci intervallo distarent ab oppido Oliuença, Ioanni à longe prospicienti bilis intumuit, & furoris impatiens (quanuis nemo crederet illum ex tanto hostium numero incolumem emersurum) cum triginta equitibus hostes inuadit, qui fugam morte turpiorem haud abominantes, locum deserunt. Honestius quidem foret pugnando occumbere, quam fugiendo cedere, maxime ubi tam dispar pugnantium erat numerus.

Dictu, & memoratu incredibile est, quam exigua sæpe manu innumeras hostium copias fuderint Lusitani. Si enim non maleuolis inuidorum sermonibus, sed nudæ, atque apertæ veritati credendum sit, mira est rerum gestarum

starum magnitudo, ex quibus conceptus dolor hostiles animos quotidie accendit, & ad vindictam acrius stimulat. Postridie Calendas Nouembris in oppido Alfaiates prouinciæ Beirensis, vidimus infestis signis Lusitanam, & Iberam aciem concurrere, magna vi utrinque decertari, quâ telis, quâ æneis fistulis, quâ gladijs rem geri, & tamen confecto prælio septuaginta hostium cadauera reperta sunt, ex nostris vero ne unus quidem miles fuit desideratus. Quod est eo magis mirandum, quò minor erat nostrorum numerus. In hostibus enim quingenti equites, & quadringenti pedites, quorum veterani, & expeditiores in prima acie versabantur; at ex nostris nonnisi ducenti, tyrones ferme numerabantur, paucis exceptis, qui in prima acie collocati, pristinae virtutis memores, egregium sui specimen edidere. Horum nullus vel exiguum corpore accepit vulnus: unius tantum militis sinistrum femur glans ferrea leuissime perstrinxit. Tantus vero terror ex hac clade ad intimas Hispaniæ prouincias perlatus est, ut iam ad oppidum Madriti crederent aduersis signis hostem esse venturum.

Hæc

Hæc inter quis non fatebitur Deum Lusitani regni factorem, atque adiutorem, qui nos custodit tanquam pupillam oculi sui? Nam si natura membranis tenuissimis oculos vestiuit, ac sepsit, eosdemque palpebrarum, & ciliorum muro inclusit, ne vel leuissimum nocumentum pupillis eueniret; quis non dicet Lusitanos plusquam adamantino diuinæ protectionis muro esse obvallatos, quo inimicorum impetus infringantur, & omnia telorum genera propulsentur? Quid post hominum memoriam dici, aut memorari poterit gloriosius? Quid maius, aut portentosius de Iosue, & de Gedeone referunt sacri annales? Hi parua manu innumerabiles gentium turmas neci dederunt: Lusitani exigui numero ex magna hominum multitudine collectum exercitum multoties profligarunt. Sit ergo Lusitania neminem metuens, & omnibus nationibus metuenda, quæ Deum habet defensorem, & propugnatorem. Ab armis discedat Philippus, intelligatq; sibi neq; iure, neque bello cum Ioanne disceptandū, cui tã præsens adest Dei numen. Nos vero in maximâ spe m adducamur, regnum diuina ope recuperatum

Quid enim altum sine diuino auxilio mens
humana vel inchoare, vel perficere potest?
Quid prodest vineas, turres, machinas, arietes
ad expugnandas vrbes parare, quid mœnia
vallo, & fossa circumdare, quid turres præsi-
dijs firmare, quid suos milites hortando ad
virtutem arrigere, quid bellantibus modo
præmia, modo formidinem ostentare, si inter
bellicos apparatus auxiliantis Dei manus de-
sideretur? Omnes hominum conatus incassum
abeunt, si Dei munimine destituantur. Nihil
aut inuite, aut non fauente cælo, feliciter ten-
tandum est. Adsit exercitus ex omni virorū
flore collectus, adsit dux in periculis firmissi-
mus, contra insidias vigilantissimus, famis, si-
tis, alboris, & laborum patiētissimus, in parā-
dis rebus ad bellum necessarijs prouidentissi-
mus, in congressu, & conspectu acerrimus, in
exploranda bellandi occasione prudentissi-
mus, in eludenda hostium calliditate sagacis-
simus, omnibus denique imperatorijs virtu-
tibus ornatissimus, quid hæc omnia iuuabūt
ornamenta, si desit Dei manus, sine qua om-
nes humanæ vires breui dillabuntur, & leuif-
simo flatu instar fumi dissipantur? Armis ol-
fessa

*seſſa Bethulia tenebatur, incertumque ferro
an ſiti acrius vrgeretur. omnis enim pópulus
ob incifos aquæductus aquæ penuria labora-
bat, & præ nimia ſitis impatientia deditio-
nem meditabatur. Interim Holophernes ab op-
pugnatione non deſiſtit, ſperans ſe incruento
veſtigio intra urbis muros admittendum eſſe
victorem. Sed quæ apud Deum immortalẽ
rerum humanarum cura eſt, in manu imbel-
lis, atque inermis ſæminæ ventofam Holo-
phernis ſuperbiam depreſſit, omneſque Aſſy-
riorum copias proſtigauit, qui metu percuſſi,
ſæda fuga, & abiectis armis campum de-
ſeruere.*

*Hoc diuinæ protectionis munimento obar-
mati Luſitani in aciem audentiores deſcen-
dunt; per hoſtium munitiones volant impigri;
inter ferrum, & ignem diſcurrunt impauidi;
nec mortem, nec vulnera, mortis comitatus,
timent: & ab omni periculorum ſuſpicionẽ
alienatis animis in hoſtem rapiuntur. Vidimus
prope Minium fluuium, non procul ab oppidu-
lo Lamas de Mouo Luſitanorũ facinus æq;
temerarium, atque incredibile. Hoſtis qua
loci opportunitate, qua vallis, qua aggeribus,*

qua fossis munitissimis, neque capi, neque facile obsideri poterat. Milites Lusitani nulla difficultate perterriti acerrime persistebant, huc illuc armati discurrebant, omnia inuadendi loca, & tempora explorabant, mox ubi res postularet hostem inuasuri. Hæc temeritas nonnullis culpanda videbatur, & se consiliius facturos, si ab incepto desisterent, neq; hostem undequaque munitum aggrederentur, quod sine magna nostrorum militum inter-
necione fieri vix posse credebant. Erat enim apertus campus, nulla interposita sylvarum umbra, nullum clypeorum operimentum, le-
uiss pugnantium armatura, neq; sine ingenti clade glandes ferreæ aduerso pectore erant excipiendæ. Harum rerum consideratio posset non immerito audacissimos quosque deterre-
re. Verum omnium dictum consensu, milites ex improviso ruunt unanimis, & inter pul-
ueris tormentarij nubes plumbo commistas illesi omnes euadunt, hostem deturbant, ag-
geres demoliuntur prædam capiunt, & in fu-
gam versos insequuntur. Ac nisi præda, & mortuorum spolia nostros milites remoraren-
tur, esset magnum, & memorabile facinus il-
lius

lius diei, Qua in re nō alios, quam ipsos hostes
luculentos testes appello, qui cum fateantur
in nostro exercitu quamplurimos esse rerum
bellicarum insolitos, & non tam belli, quam
agri, & pecoris cultores, non possunt non mi-
rari incredibilem in bellando felicitatem: adeo
ut affirmant Deum Lusitanicæ partes agere,
nostrumque regnum ex parvis initijs ad sū-
mum fastigium imperij deventurum. O fortu-
natam Lusitaniam, quæ a solo Deo tuum ha-
bes incrementum, instar lunæ, quæ solaribus
incensa radijs menstruo spatio suam complet
lustrationem, & quidquid luminis habet a
sole mutuatur.

Annis superioribus indignabamur ad bel-
licas expeditiones mitti, quia iniuste domi-
nationis satietas nos tenebat; at nunc ad bel-
lum vocamur quotidie, & tamen nemo dolet
aut indignatur, imo nihil nobis felicius ca-
dere poterit, quam ex proiectis hostium cada-
ueribus gradum facere ad pugnandum. Atq;
eō libentius decertamus, quo manifestius
intelligimus, Deum nostris flagitijs olim
insensum, nunc stare pro Lusitanis. Iam
læsæ diuinæ maiestatis ira est mansuetior.

Iam non iniquis, sed æquis oculis nos respexit, qui ut nos illæsos seruet, se inimicorum ictibus murum æneum opponit. Neque enim tam felices armorum euentus fortunæ castibus, sed Dei regentis arbitrio tribuemus.

In oppido Oliuença quamplurimi erant bellatores, qui ad oppidanorum defensionem summo studio adnitebantur, atque ad omnes gerendi belli occasiones industriam uiriliter intendebant. Hos inter D. Emmanuel de Sousa non eminus, sed cominus pugnandi auidior, cū hostem ab arce Diui Petri longo interuallo distantem videret, mox iubet tympanistæ, ut pulsu concitatiore hostem prouocet, quo propius accedat ad certamen. Dictis paruit tympanista, & feruidioribus tympani ictibus ad hostiles turmas conuersus, non solum acriori sono, sed totius corporis motu, & incompeditis manuum, ac pedum gesticulationibus hostem irritare, & accendere cæpit. Ex improviso volat glans plumbea, & saltantis tympanistæ labrum superius tam leuiter perforauit, ut neq; summos dentes læserit, aut comminuerit. Quā glandem ille expuens, in genua prouolutus grates Deo soluit. Mox idem Emmanuel de Sousa

Sousa præ nimia æstus, & sitis impatientia
à quodam eremita aquam petit, qua ardorẽ
releuaret. Dum sitienti frigidam offert eremi-
ta, illius fronti plumbeus globulus impactus
nihil damni infert, imo plumbi massa cõtusa,
& quasi in bracteam extensa in terram de-
cidit, non sine magno spectantiũ stupore. Quis
vero non mirabitur molli, & flexibili carni
ferrum, ac plumbum cedere? Non ex carne, &
ossibus compacta, sed ex rigido adamante soli-
data sunt Lusitanorum corpora. Hanc illis
duritiem non quidem à natura, sed ab ipso na-
turæ auctore, & conditore fatemur attributã,
qui mutato rerum ordine, plumbum reddit
carne mollius, atque fragilius.

Non abs re sapientissimus Lyncurgus affir-
mauit, duces, & militiæ præfectos ceruicĩ e Je-
similes. Nam qualis natura ex ossibus orbicu-
latim vertebratis ceruicem finxit, eandemq;
capiti supposuit, ut oculi essent ad circumspe-
ctum faciliores, & modo huc, modo illuc flecte-
rentur. tales in militia imperatores, tales du-
ces, & peritissimi castrorum metatores, ut ho-
stium incursiones facile eludant, omnes insi-
diarum aditus, & exitus circumspiciant, atq;
instar

*inſtar, ceruicis eminentiori loco poſiti ad om-
nes dolos excubent, ut non ſolum prædam, ſed
etiam fugam, & commeatus hoſtibus interclu-
dant. Hanc in ducibus, & in militibus præſi-
dij, qui ad Miniſſi ripas, in Luſitaniæ, &
Gallæciæ limitibus ad regni deſenſionem ſunt
conſtituti, vigilantiam experti ſumus. Quan-
uis enim Gallæci ſordidi, & inculti ferme ha-
bentur, sæpe ſub illo ſordido palliolo multum
latet fraudulentia, & aſtutia militaris. At
Luſitano robori nihil imperuium, aut inacceſ-
ſum eſt. æque dolos latentes, & patentes inſi-
dias ferro domant. Oppidum Saluaterra quam
citatiſſimo poſſunt agmine noſtri milites ag-
grediuntur, tantaque oppidanos formido in-
uaſit, ut, paucis ad deſenſionem intentis, cæ-
teri Luſitanorum armis circumcluſi, non qua
dimicarent, ſed qua erumperent, locum
quaſierint. Nobis inruenta, hoſtibus luctuo-
ſa ſtetit pugna: quamplurimi enim ferro oc-
cuberunt, alios ad euadendum inuit celeri-
tas, quæ vrgetibus milis vnicum eſt aſylum.
Sed ne ex illo oppido ad noſtros fines latroci-
nij, & incendijs infeſtandos aliquando ho-
ſtis erumperet, quamplurimæ ſolo æquantur
domus*

domus, illisque solum pepercit ferrum, quibus
ad defensionem munitissimis nostri milites cō-
tinētur. Facile quidem foret nostrum exerci-
tum ad perdomandam Gallæciam circumduc-
ci, atque ab huius oppidi expugnatione ad
alias vrbes maiori conatu ferri. Verum tem-
pori, & occasione cedendum erat. Optimi enim
ducis est æque ferro, & consilio dimicare.

Paucis mensibus interiectis, Gallæci quibus
ex illo damno crudior ira, & ardentius vin-
dictæ desiderium animo iam exarserat, ex quin-
que hominum millibus conflata manu col-
ligunt, & nostros nihil tale opinantes ex im-
prouiso adoriuntur, ut illos in oppido Salua-
terraincautos opprimerent. Nostri milites præ-
sidiarii numero erant exigui, at fortitudine
maximi, qui cum magnum, & difficile certamen
illa nocte sibi ineundum viderent (est
enim periculosa paucorum cum multis cōflictio)
armati vallos circumeunt, & hostem muris
propinquantem viriliter propulsant: neque
puncto temporis à prælio cessatum est, donec
auroræ ortus armorum litem diremit, hostes-
que non sine ingenti cæde in fugam vertit.
Postero die Gallæcis exitiosior pugnae euen-
tus

tus fuit: primo enim concursu res Lusitana
adeo superior euasit, ut, ad unius bombardæ
dispositionem, septem ex hostium equitatu fu-
sis militibus, mox omnes timor, trepidatioque
inuasit, neq; iam pugnae, sed fugæ intende-
runt. Confusam, & ferme exanimatam multi-
tudinem (erant enim quatuor millia) tercenti
ex nostris insequuntur, nec prius incepto de-
sistunt, quam fugientium arma, & spolia di-
ripiant. Interea recrudescit in Gallæcis præ-
liandi ardor, & triginta capacissimis cymbis
ad Minij fluuij transitum comparatis, oritur
in ipso transitu laboriosa utrinque concerta-
tio. Nostri enim propugnatores, qui erant in op-
pido Lanhelas, cum hostem fluuiio propinquā-
tem viderent, æneis fistulis acriter insistent,
neque patiuntur cymbas viris, & armis gra-
uidas ad nostra littora appellere. Locus igitur
ad appellendum opportunior quæritur ad pa-
guum Lobcos, in quem locum hostes ardentes
emicant: mox copiae sub suis signis, ac duci-
bus diuiduntur, & militum pars vastandis
agris, pars domibus incendendis, pars explo-
randis insidijs mittitur. In confertam hostiū
turmam irruit Paulus Pereira de Andrade,
cui

cui non minus generis, quam reboris decus, & solo gladio, clypeoque obarmatus, septem ex Gallæcis primo congressu sternit. Fuit quidē facinus memorabile, at corpore ferreis glandibus perforato, vulneribusque transfixo, suam inconsultam temeritatem capite luit. Ex hac hostili vastatione, atque incendio, non multū damni nostris finibus est illatum. Procedit tamen hostis ad oppidum Villa noua militari subsidio vacuum. Occurrit obuius Gaspar Mēdes de Carualho militiæ præfectus, & in sūma rerum desperatione (deerant enim copiæ auxiliares, & sexdecim tantum militibus erat stipatus) vultus intrepidus ad hostem circumtulit, animoque, & vestigio inconcussus, inimicorum impetus propulsauit, donec lassitudine victus, & vulneribus confossus, inter hostium acervos exanimis cadit. Mox intra oppidū Villa noua quadraginta milites subsidiarij ad defensionem recepti, tot hostium millibus tam fortiter resistunt, vt ipsos etiam hostes admiratione defixos in se conuerterint. Hosti cruentum, nobis incruentum certamen, & ne vnus quidem miles fuit desideratus. Ex hostibus vero tercenti, alij ferro absumpti, alij

*alij dum præcipites ad cymbas ferecipiunt,
aquis immersi pereunt.*

*Hæc, & alia facinora memoratu digna
vidit regio Interamnensis. Verum cum
in Lusitanis militibus oriatur, imo ingenua
sit officiosa concertatio, vel potius generosa
æmulatio, dum alius alium fortitudine an-
teire, & rerum gestarum magnitudine cona-
tur superare: mirum est qua æmulatione ac-
cendatur vigor militaris inter milites Tran-
staganos, Interânenses, Beirenses, & Transmō-
tanos, dum alius alij palmam præripere, &
primas ferre studet. Cuius rei argumentum
est, quod in regione Transtagana a nostris mi-
litibus factum accepimus in expugnatione op-
pidi Valuerde. Erat hoc oppidum in Lusita-
niæ confinio hortis irriguis, & vallibus amæ-
nissimis undequaque cinctum, ea pollens gle-
bæ ubertate, tantisque riuulis intersectum,
ut nunquam ibi ob terram ingenito humo-
re egentem aliqua siccitate laboratum sit. Ne-
que immerito tum ob natiuam arborum amæ-
nitatem, tum ob herbescentem terræ viridita-
tem Vallis viridis obtinuit nomenclaturam.
Erat Lusitanis damnosa huius oppidi vici-
nitas*

mitas, ex illo enim fiebant in confines agros
frequentes hostium excursiones. Ad obsiden-
dum, & expugnandum oppidum nostræ acies
disponuntur: cumque ad loci defensionem non
deesset militare præsidium, neque bellicæ mu-
nitiones, per quatuor solidos dies ab obsessis
viriliter decertatum est. Vtrinque paribus
odijs, sed imparibus viribus dimicatur. Hostis
paulatim deficit: & cum nihil à vicinis urbi-
bus daretur subsidij, multique nunc cæsi cade-
rent, nunc vulnerati deficerent, acie iam exte-
nuata, sub æquis pactionibus rediguntur in
deditionem. Ex hostibus quinquaginta, ex no-
stris quatuordecim desiderati sunt. Quidquid
sylvarum, hortorū, vinearum, oliuætorum in
circuitu erat, incēdio absumptum est, ipsumq;
oppidum sola æquatum: sed multū olei, mellis,
frumenti militibus in prædam cessit. Huius
expugnationis, & direptionis rumor non solū
minores pagos, sed etiam oppida, & ciuitates
metu perculit.

De militibus Transmōtanis multa, & præ-
clara dici possent, quos bruiæ rigor, montium
asperitas, regionis inclementia, rarus cæli
tractus, non solum duros, & callosos, sed labo-


.is patientes, & tractando ferro natos reddit.
Videbis enim in vultu truculentiam, in oculis
vim, in membris vigorem, in pedibus celerita-
tem, in oris habitu, & lineamentis expressam
Martis effigiem. Horum pertinax certamen
haud exiguum laborum, & periculorum emo-
lumentum vidit: ferro enim domuit quidquid
erat in Brigantiæ consinio. Octo, & triginta
pagos, & oppida expugnauit: tantaque fuit
spoliorum, ac prædæ æstimatio, ut septingenta
aureorum millia exceßerit. Hanc oppidorum
vastationem, & suarum rerum iacturam do-
lent, & impune dolebunt Comites de Lemos,
& Benaunte, qui nostrorum militum vir-
tutis spectatores, & testes fuerunt. Verum his,
& alijs Transmontanæ gentis facinoribus
supersedeo. Sit satis pro victricibus Lusitano-
rum armis hæc modo prælibasse, ex quibus
nostræ Lusitaniæ non mediocris felicitatum
accessio facta est. Sic placitum sapientissimo or-
bis moderatori, cuius æternitatem nulla tem-
poris circumscriptio vnquam poterit perme-
tiri: cuius potentiam nulla hominum peruer-
sitas poterit infirmare: cuius prouidentiam
nulla sapientum calliditas poterit eludere:
cuius

*cuius voluntatem nihil cælo, terra, marique
poterit effugere. Læti, atque ouantes Lusitani
illud vulgatissimum oraculum occinamus: Si
Deus pro nobis quis contra nos? Hunc
medullitus amemus: huius obsequio, atq; ser-
uitio ardētioribus in dies studijs accingamur.
Atque utinam illius semper amoris vinculis
ita simus adstricti, ut de eo optime meriti, exi-
mium gratiæ, & amoris locum apud ipsum
obteneamus. Nullam in sectandis cupiditati-
bus luxuriem, in vindicandis injurijs crude-
litatem, in pecunijs retinendis auaritiam, in
quærendis honoribus ambitionem, in deponē-
dis inimicijs contumaciam amplectamur.
Soli Deo omni tempore, horaque vacemus, si-
ue illa sit antelucana, siue meridiana, siue etiā
vespertina. In quam mentem nos vehemen-
ter moueat, atque impellat acceptorum bene-
ficiorum recordatio. Deus enim Lusitanorum
fortunas in extremo sitas, præter omnium spē,
atque opinionem ita in pristinum reuocauit,
ut ærumnis deformatum regnum non modo
conualuerit, sed supra omnia mundi regna ca-
put extulerit. Facilius verò erit stellas dinume-
rare, aut mundi magnitudinem metiri, quam*

Dei beneficia Lusitanis per hosce annos collata minutatim recensere. Nos non quidem omnia, sed aliqua tantum dinumeravimus: siquidem hanc inoffensam in gerendis bellis felicitatem diuinæ voluntatis imperio procedere arbitramur.

L A V S D E O,
Deiparæque Vir-
gini.





B

5